

**NATIONAL ASSEMBLY OF
SEYCHELLES**

Tuesday 25th June 2024

The Assembly met at 9.01am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble. Bonzour nou piblik ki pe swiv nou kot lakour kot zot ete. Mersi zot tou pou zwenn nou pou sa travay sa semenn.

Bon, nou ava konmans regard nou *Order Paper* e nou annan en pti prezantasyon dokiman Madanm Clerk?

MADAM CLERK

Mersi Mr Speaker. Bonzour Mr Speaker, bonzour tou bann Manm, tou bann *staff* Lasanble r tou dimoun a lekout.

Papye ki pe ganny prezante i, *S.I. 45 OF 2024 International Bank for Reconstruction and Development Loan Agreement Debt Order*. Mersi Mr Speaker.

MR SPEAKER

Mersi Madanm Clerk. Nou ava al lo *Private Notice Question*. Madanm raporter ou ava apel Vis-Prezidan e son delegasyon.

Bonzour Vis-Prezidan Ahmed Afif. Bonzour Mr Ted Barbe Komisyoner Lapolis. Bonzour Mr Joseph Bibi, Direkter Zeneral Administrasyon dan Lapolis. Mersi pou zot prezans byenveni dan Lasanble.

Nou pran *Private Notice Question* Onorab *Leader* Lopozisyon ou ava met ou kestyon silvouple.

HON SEBASTIEN PILLAY

Mersi Mr Speaker. Bonzour Mr Speaker. Bonzour Vis-Prezidan, Komisyoner Lapolis e *ASP* Bibi.

Bonzour tou koleg Onorab e bonzour tou dimoun ki a lekout pe swiv Lasanble Nasyonal.

Mr Speaker, mon *Private Notice Question* i lir koumsa;

Eski Minis dan sa ka Vis-Prezidan i kapab konfirmen si Lapolis in resevwar en veikil blende oubyen en *armoured vehicle* mark *RG-12*?

1. Kote sa *vehicle* i sorti e konbyen larzan ti ganny bidzete pou aste sa veikil ?

2. Ki laz sa veikil i annan e depi kan sa veikil in ariv Sesel? Mersi Mr Speaker.

MR SPEAKER

Mersi Onorab. Vis-Prezidan ou repons silvouple.

VICE-PRESIDENT AHMED AFIF

Mersi bokou Mr Speaker. Bonzour Mr Speaker, *Leader Biznes Gouvernman, Leader Lopozisyon*, tou bann Manm Lasanble, tou dimoun a lekout.

Mr Speaker, Militer, *SPDF* sa letan - ansanm avek lapolis ti pran desizyon pou aste en *RG-12* mye koni konman en *Nyala Sud Afrique* an 2019.

Sa letan an 2019 sete Prezidan Danny Faure, ki ti Prezidan e Komisyoner Lapolis ti Mr Krishnan Labonte e Sef Lafors Defans ti Brigadye Leopold Payet.

Sa veikil ti pou ganny servi par Lapolis Sesel. Lo dokiman, sa veikil i ganny dekrir konman en *remanufactured vehicle*.

Savedir, sete en veikil ki'n ganny refer konman preski nef, me enn ki parey son non i dir, in ganny re kondisyonnen - *recondition*. Konn li konman *recon* dan sa lepok.

Le 5 Zilyet 2019, Biro Komisyoner Lapolis ti ekri *POU* pou demande ki zot ganny

egzanpsyon avek provizyon e prosedir *POU* pou rezon sekirite. An 2019.

Le 19 Zilyet 2019, *POU* ti donn son laprouvasyon pou ki sa veikil i ganny egzanpsyon e alor bann prosedir ti konmanse.

Le 7 Out 2019 lapolis ti fer en demann avek *SPDF* sa letan, pou fer en peyman 50 pousan pou sa veikil ki an tou ti kout an *rand* 1 milyon 865 mil.

Rezon pou sa se parske zot ti'n tonm dakor ki peyman pou sa veikil, ki pa ti'n ganny bidzete dan *Appropriation Act 2019*, e alors pa ti pas dan Lasanble Nasyonal. E i ti pou ganny fer sorti dan en kont spesyal *National Security Account* kot Labank Santral, an 2019.

Donk le 10 Out 2019, 50 pousan savedir 932 mil 500 *rand* ti ganny transfer kot en lakonpanyen apele *Tips Transport PTY Limited Pretoria Sud Afrique*.

I enportan pou note Mr Speaker, ki tou sa bann tranzaksyon pa'n zanmen a latansyon Lasanble Nasyonal, ni devan *FPAC* oubyen menm Oditer Zeneral sa letan.

Alors sa peyman ti deza reprezant en langazman ; savedir en Kontra ant Sesel ek sa lakonpanyen *Sud Africain*.

Avek peyman sa premye 50 poursan, travay ti konmanse pou prodwir sa *Nyala* an 2019.

Dokiman ki dan nou lanmen e korespondans i montre ki pandan peryod *COVID* i ti swiv zis apre sa in napa gran aktivite ki'n arive an relasyon avek prodiksyon sa *Nyala*.

Parey ou konnen *Sud Afrique* ti plizoumwèn dan en *lockdown* sa letan. E mon mazin se plizoumwèn sa ki nanryen pa ti arive.

An Me 2022, sa lakonpanyen ti anvoy Lapolis son dezyenm *invoice*, aköz dapre li sa veikil ti'n prezan fini pare, e ti bezwen sa dezyenm peyman pou li kapab eksport li Sesel.

Peyman ti ganny fer ankor enn fwa sorti dan sa kont aköz depi 2019 sa kou total ti'n fini ganny met dekote pou sa *Nyala* atraver sa kont.

An 2023 en delegasyon sorti kot nou Militer *SDF* ek Lapolis ti mont *Sud Afrique* pou fer en *training* e lenspeksyon lo ki mannyer pou dray *Nyala*. E familyariz zot ek bann *maintenance* nesaser. Zot ti ganny sans vwar sa *Nyala* e zot ti eksprim satisfaksyon avek son kondisyon.

Malerezman Mr Speaker, an Mars 2024 letan sa *Nyala* ti

ariv Sesel i ti kler sete pa sa veikil ki ti sipoze delivre.

Premyerman set en veikil ki ti'n ganny fer an 1993. Savedir ti deza annan 31an. Son kondisyon anndan pa ti bon. Larou sete bann vye larou, menm pete e ziska ozordi sa veikil i ankor lo Por.

Tou bann lazans konsernen enkli Lapolis ek Militer i totalman dezapwente avek sa tranzaksyon ki ti konmans an 2019 ziska la aprezan.

Tou demars pe ganny fer atraver Minister Zafer Etranzer, pou ki sa transpor *Nyala* i ganny retournen *Sud Afrique* e larzan ki'n ganny depanse i ganny ranbourse. Oubyen zot rann en *Nyala* ki nef.

Mr Speaker, mon ti ava kontan ozordi envit Komite Defans Lasanble Nasyonal ansanm avek *FPAC* e nenport lezot Manm ki ti ava enterese pou organiz en vizit pou vwar sa veikil e pou konpran pli byen ki leta i ladan e aköz ki Gouvernman pe pran en tel pozisyon.

Mon demande Mr Speaker, ki medya i osi prezan. Parske i enportan pou tou Seselwa konpran egzaktman aköz Gouvernman pe pran en tel pozisyon.

Mon demande osi Mr Speaker, ki Oditer Zeneral i pran sa konman en lenvestigasyon enportan pou li prodwir en rapor ki i ava ganny prezante ek Lasanble Nasyonal. Akoz konman en ladministrasyon nou pa satisfè ditou avek sa ki'n arive avek larzan Lepep Seselwa.

Vwala mon larepons. Mersi bokou Mr Speaker.

MR SPEAKER

Mersi VP. En pti moman silvouple. *Ok*, parey labitid nou ava konmans ek kestyon siplemanter bann Manm. Onorab Monthy i kapab konmanse.

HON PHILIP MONTHY

Mersi Mr Speaker. Bonzour Mr Speaker. Bonzour VP ek ou delegasyon e tou dimoun a lekout.

VP sa lakonpanyen avek ki Gouvernman sa letan an 2019 ti pe lyez avek pou aste sa veikil, eski *due diligence* ti ganny fer sa letan, pou vwar si sa lakonpanyen i en lakonpanyen ki kredib?

Akoz ou konnen *Sud Afrique* i fasil antre an kontak avek bann *bogus company*.

So sa Gouvernman ki ti la sa letan, eski i ti'n fer son *due diligence* avan i antre dan en

tranzaksyon avek sa lakonpanyen pou *purchase* sa veikil? Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Lo *file* mon vwar okenn lendikasyon poudir an 2019 ti annan okenn *due diligence* lo sa lakonpanyen. Mon pa'n vwar lo *file*. Mersi bokou.

MR SPEAKER

Mersi. Onorab Cosgrow ou kestyon.

HON WALLACE COSGROW

Mr Speaker, bonzour tou dimoun, bonzour VP eskiz mon lavwa bomaten.

Mr Speaker, VP in dir nou ki sa prosedir ti konmans an 2019. Me in osi dir nou ki poudir ti annan en delegasyon ki ti monte an 2023 pou al enspekte pou al sir ki tou keksoz i *ok*.

Be dir nou ki sa delegasyon in vwar? Ki sa delegasyon ti enspekte, si ozordi nou pe vwar sa kalite transpor, rouye lo Por larou pete, pa ni *start*, dir nou ki zot ti al gete?

E eski zot ti al fer zot *due diligence* ler zot ti al laba silvouple dir nou? Mersi.

MR SPEAKER

Mersi Onorab Vis-Prezidan ou repons.

VICE-PRESIDENT AHMED AFIF

Mersi bokou Mr Speaker. Mr Speaker, mon pou repet sa ki monn dir. Nou ti anvoy en delegasyon ki ti enkli Militer ek Lapolis ek bann dimoun teknik enkli drayver ek *maintenance* pou zot zisteman al enspekte sa *Nyala* familiariz zot avek e fer sir poudir i dan bon kondisyon pou anvoy Sesel. Zwenn nou demann. E zot ti satisfè.

Zot ti satisfè avek sa ki zot ti vwar sa prodwir. E se sa prodwir ki nou to pe espekte pe al ganny anvoy Sesel. Pa sa enn ki la dan Por ozordi.

MR SPEAKER

Mersi Vis-Prezidan. Onorab Hoareau, ou kestyon.

HON JOHN HOAREAU

Mersi Mr Speaker. Bonzour *VP* ek ou delegasyon. Bonzour tou dimoun a lekout.

Mr Speaker, mon ti ava kontan konnen, eski ti annan okenn evalyasyon dan rikord

pou etabli neseseite en tel veikil par Lafos Lapolis

MR SPEAKER

Mersi. Vis-Prezidan?

VICE-PRESIDENT AHMED AFIF

Mersi bokou Onorab. Sa ki mon'n vwar dan *file* napa okenn zistifikasyon ki annan lo *file* akoz sa i nesese.

I ti senpleman annan korespondans ki pe koz ek furniser *Sud Afrique* pou dir ek li donn detay lo transpor e answit sa ti ganny transmet kot Militer pou zot peye.

Napa okenn dosye ki mwan monn vwar ki montre akoz nou ti bezwen annan en *nyala* sa letan.

Selman mon mazine i bezwen ti annan kek evalyasyon ki'n ganny fer lo la. Mersi.

MR SPEAKER

Mersi. Onorab Loze ou kestyon.

HON JOHAN LOZE

Mersi Mr Speaker. Mr Speaker, lenformasyon ki nou, nou annan se ki sa lakonpanyen li i pe dir ki sa *nyala* ki in anvoye, i sanmenm sa ki ti ganny enspekte e ki ti ganny *sign off* lo la par bann zofisyè sorti Sesel.

Now si sa in arive, si sa in arive parey sa lakonpanyen pe dir, kwa egzakteman ki'n deroule ki sa lapouritir in ganny *sign off* lo la ki'n ariv Sesel ozordi? Sa i mon premye kestyon.

Mon dezyenm kestyon Mr Speaker, *from what VP* pe dir nou, an 2022 ti ankor egziste bann kont Ladefans ki ti la 2019 i ankor pe *operate* sa bann kont Ladefans la? Mersi Mr Speaker.

MR SPEAKER

Mersi. Ou premye kestyon *VP* in donn en larepons lo la. Si i annan plis klarifikasyon i kapab donner. Si son larepons i reste parey nou aksepte.

I annan dezyenm kestyon Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, mon pou repet sa ki mon ti dir. Nou ti annan en tim sorti Sesel, ki enkli bann zofisye Militer ek Lapolis, drayver bann dimoun *maintenance* ki ti mont *Sud Afrique*.

Zot ti satisfè avek prodwir ki zot in vwar laba. Ti napa en *sign off* o tan ki mon konnen. Zot ti satisfè avek prodwir ki zot in vwar, zot in *drive*, zot in teste

e zot ti tonm dakor poudir si sa i vin Sesel nou ti pou *ok* avek.

Me sa prodwir ki'n ariv Sesel i pa li. Se sa mon pozisyon.

E lefe ki pa li, nou konman en Gouvernman responsab nou fer sa ki byen. Nou dir ek zot nou pa satisfè avek prodwir ki'n vini ki'n ganny delivre Sesel e nou pe demann zot pou rebran e rann nou enn ki parey nou ti vwar, parey nou ti konplet sa Kontra, nou ti pey dezyenm bout oubyen rann nou, nou larzan. Mersi bokou Mr Speaker.

MR SPEAKER

Ti annan dezyenm kestyon *VP* si sa kont i ankor egziste?

VICE-PRESIDENT AHMED AFIF

Sa bann kont spesyal i ankor Labank Santral, *SDF* pa servi sa bann kont dan okenn fason. Zot pe fer tou zot peyman atraver Bidze. Me i annan balans ki ankor reste dan sa bann kont Mr Speaker.

MR SPEAKER

Mersi. Onorab Andre, ou kestyon.

HON CLIFFORD ANDRE

Mersi Mr Speaker. Bonzour *VP* avek ou delegasyon, tou Manm Onorab, tou dimoun a lekout.

Mr Speaker, mon kestyon i pou *VP* i letan Lapolis avek Defans ti fer *procurement* pou sa transpor, eski i ti annan spesifikasyon ki ti mete lo sa demann? E eski ou kapab konfirman ki sa spesifikasyon lo sa ki'n ariv Sesel pa koresponn, alors i annan en *breach of contract* dan sa konteks? Sa i enn.

Dezyenm *VP* se, par lefe ki sa transpor in isi depi 2023 e la nou 2024, kwa ki pe met retar dan sa negosyasyon pou *reship* sa transpor *Sud Afrique*, pou ki Sesel i kapab ganny son larzan, oubyen ganny sa transpor ki ti demande dapre son *invoice*? Mersi.

MR SPEAKER

Mersi. Vis-Prezidan, ou repons?

VICE-PRESIDENT AHMED

AFIF

Mersi bokou Mr Speaker. Mon konmans ek dezyenm. Transpor pa ti arive an 2023. Nou ti al enspekte an 2023, me transpor ti ariv an Mars 2024 transpor ti ariv Sesel.

An sa ki koncern spesifikasyon, non Onorab lo dokiman ki nou, nou annan zot

pa ti met okenn spesifikasyon detaye lo transpor, eksepte poudir ti pou en *RG-12 Nyala* blende *aircon* e bann kondisyon an zeneral.

Me selman sa ki nou ti espekte par egzamp, laz osi pa ti dan okenn spesifikasyon, ke laz i ti pou annan. ti napa tousala. Mon mazine sa ti devret en konponan enportan, parske i en *remanufactured recon*.

Alor omwen sa ti devret en spesifikasyon. E ler nou ti al espekte *Sud Afrique* sennla ki nou ti enspekte nou ti satisfè. Bann manmay ki ti al dray, *maintenance* zot ti satisfè i ti an bon kondisyon zot ti nobou fer li fonksyonn byen e zot ti satisfè pou dir si sa i desann Mahe zot ti pou zwenn zot bann bezwen.

Me sa ki'n arive finalman i pa ti li. Mersi bokou.

MR SPEAKER

Mersi. Onorab Vidot, ou kestyon.

HON AUDREY VIDOT

Mersi Mr Speaker. Bonzour Mr Speaker. Bonzour Vis-Prezidan, tou Manm Onorab e tou manm piblik ki a lekout.

Mr Speaker, mon premye kestyon pou Vis-Prezidan, eski Vis-Prezidan i kapab dir nou si, an total kou pou fer sa transpor ariv Sesel e son *cost* i plis i ariv

R3 milyon larzan oubyen pli mwens, si i kapab konfirm sa?

E dezyenmman mon dezyenm kestyon, ou'n dir ki depi an Mars 2024 ziske la Zen sa transpor i la Sesel.

Eski ou kapab dir nou konbyen pe kout Gouvernman Sesel pou pey sa transpor sa kantite letan ki la avan ler i ganny retournen ?

E konbyen i pou kout nou ankor pou nou fer tournen sa transpor laba deor ?

MR SPEAKER

Mersi onorab. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, depi Mars ziska Zen sa lannen nou'n ganny laranzman avek Por kot nou pa pe pey okenn *demurrage* lo transpor.

Son kou monn deza donneren son kou i 1 milyon 865 mil *rand*. Mersi bokou.

MR SPEAKER

Mersi. Onorab Henrie ou kestyon.

HON GERVAIS HENRIE

Mersi Mr Speaker. Mr Speaker, mon premye kestyon, mon ti ava kontan demann Vis-Prezidan si i premye fwa i ariv en lensidan kot en lenstitisyon

Leta ouswa en lakonpanyen prive i fer vini en keksoz dan Sesel, me ki apre i annan en keksoz ki arive mal nou pa satisfise avek sa prodwir ki arive e ki alor nou bezwen fer retournen. Eski sa i premye fwa ki arive? Mon premye kestyon.

Dezyenm kestyon dan son kestyon Onorab Loze in dir ki nou annan dokiman ki sa lakonpanyen in montre ki in *sign off* prodwir ki ti vini.

So mon anvi demann *panel*, eski zot ava pare pou en lenvestigasyon dan sa sityasyon, kot Parti US i ganny *summon* pou *provide* sa bann dokiman pou ed Sesel *get to the bottom of this situation?* Mersi.

(APPLAUSE)

MR SPEAKER

Mersi. Vis-Prezidan, ou repons?

VICE-PRESIDENT AHMED AFIF

Mersi.

(Interruptions)

MR SPEAKER

Order! Order! Order! Bann Manm silvouple nou pe pran kestyon, zot annan zot sans

demann kestyon, evit bann komantr an deor *off-mic*.

Ki ou *point of order* Onorab Loze?

HON JOHAN LOZE

Mersi Mr Speaker. A okenn pwen, Onorab Loze pa'n servi okenn mo ki dir dokiman. Onorab Loze in dir lenformasyon ki nou, nou annan, lenformasyon - i pa'n nonm dokiman.

Dezyenm koreksyon ki Onorab Loze i annan pou fer Mr Speaker, *sign off*. Onorab Loze pa'n nonm lakonpanyen, Onorab Loze in demande ki sa bann zofisye ki'n al laba se sa menm veikil ki lo Por ki zot in *sign off* lo la. I pa ti nonm...

(Interruptions)

MR SPEAKER

Order! Order! Silvouple, sa sa alegasyon Vis-Prezidan in adrese in dir pou dir i pa ti menm veikil, nou pou reste lo la.

Onorab Loze, mon pa vwar okenn *point of order* pou mon *rule* lo la. Nou a kontinyen Vis-Prezidan ou repons.

VICE-PRESIDENT AHMED AFIF

Mersi bokou Mr Speaker. Pou reponn premye kestyon Onorab, eski premye fwa ki en tel lensidan i arive kot lenportasyon i arive answit enportater pa satisfè e i fer retournen? Non.

Mon mazine sa i ariv non selman avek Gouvernman. Me dan sekter prive, dan komers zeneralman plizyer fwa i arive ki ou plas komann pou en prodwir i vini ou pa satisfè, swa in kase dan *shipment*, oubyen i annan en problem avek i pa sa ki ou'n komannde. E ou fer tournen. Oubyen ou demann en ranboursman i annan en prosedir ki swiv sa.

Annefe Onorab i fer mon mazin resaman ti annan en lensidan kot *Coast Guard* ti fer vin en bato atraver *L'Inde*. Zot ti annan en laranzman e apel *Hermes* e i ti vin Sesel dan zot lepok, dan lepok *US* mon pe dir.

Be bato ler ti vini zanmen i ti kapab fonksyonn parey i ti bezwen. E se dan nou lepok nou'n fer *L'Inde* rebran son bato.

E la ankor en sityasyon zot komann en veikil blende, i ariv Sesel i pa zwenn demann, malgre ki nou'n enspekte li avan i arive. Anfen nou'n enspekte *nyala* me pa li ki'n arive. E pareyman nou pe fer tournen.

Alor i pa premye fwa. Mon mazine i ariv i en keksoz ki arive, i pa devret arive, me nou, nou pou *deal* avek.

Dezyenmman, kot i konsern si i annan okenn dokiman ki devret ganny montre? Se pou sa rezon ki mwan mon pe demande pou Oditer Zeneral i fer en lenvestigasyon detaye dan sa zafer, kot tou i ava ganny devwale.

I ava ekrir en rapor, i ava plas devan Komite Defans oubyen Komite FPAC, Lasanble a ganny sans anmenn bann dimoun konsernen e demann zot kestyon lo la.

Parske nou napa nanryen pou nou kasyet dan sa zafer. Annefe nou anvi tou keksoz i ganny devwale. Nou pa satisfise avek sa lenportasyon ki ti ganny fer an 2019 avek sa prodwir final ki'n ariv la devan nou. E nou ti ava kontan ki i annan otan laklerte ladan, o tan latransparans, pou ki pep Seselwa i toultan konnen ki avek en Gouvernman LDS nou pou protez zot larzan e fer sir sa i ganny byen servi. Mersi bokou.

MR SPEAKER

Mersi. Onorab Spiro ou kestyon.

HON RACHEL SPIRO

Mersi Mr Speaker. Bonzour VP avek ou delegasyon.

Mr Speaker lefet ki dezyenm transfer ti fer an Me 2022, savedir i montre ki bann dimoun ki'n ale ki'n vizite, ti satisfise ki tou bann prosedir *procurement* ti'n ganny swiv. E ki zot...

(comments off-mic)

MR SPEAKER

Onorab, eskiz mwan. Onorab Cosgrow, mon pa pou pran ankor enteripsyon letan kestyon pe ganny demande. Silvouple...

E mon pe dir tou dimoun, tou Manm nou bezwen prosede san enteripsyon. Onorab Spiro fini ou kestyon.

HON RACHEL SPIRO

Wi, Mr Speaker e ki zot satisfise sa bann dimoun ki ti'n ale pou vizite ki tou keksoz ti annord e zot ti dakor ki nou pou *go ahead* avek sa prosedir pou nou *procure* sa *armoured vehicle*.

Mon oule konnen Mr Speaker anba sa Gouvernman LDS ki la konmela, napa en moman ki zot in santi nesessite poudir napa bezwen pou sa veikil e ki nou aret sa tranzaksyon.

E la mon'n tande ki *Foreign Affairs* pou enplike, eski *Foreign Affairs* ti enplike lo konmansman? Mersi.

MR SPEAKER

Premye ou premye kestyon in deza ganny reponn. Vis-Prezidan ou kapab adres dezyenm kestyon.

VICE-PRESIDENT AHMED AFIF

Mersi bokou Mr Speaker. Mr Speaker, parey ou'n dir e mon a koriz Onorab, ler nou ti fer dezyenm 50 pousan ti ti an Zen 2022. Lenspeksyon ti ganny fer an 2023. E zot ti monte zot ti satisfè avek sa ki zot ti vwar zot ti...

Annefe, Komisyoner Lapolis i fek *remind* mwan poudir ler zot ti monte zot ti menm met serten keksoz adisyonnèl. Par egzanp lalimyer, *siren camera* bann keksoz koumsa, ki zot ti rekomann met an plis ki sa ki zot ti vwar.

Me tousala pa'n ganny fer. E i sipoze dan sa Kontra ki zot ti'n tonm dakor lo la. Be alor nou nou pa satisfè avek sa prodwir. Nou santi nou'n fer tou sa ki nou ti nesaser, nou ti'n kapab fer konman en Gouvernman serye e responsab, pou nou fer sir

poudir larzan in ganny depanse korekteman.

Nou'n enspekte, nou'n satisfè, nou'n dir be anvoy sa enn la avek sa bann modifikasyon - ptipti modifikasyon ki nou rebran li. Se pa li ki'n vini se en lot keksoz.

Foreign Affairs ozordi i pe ganny enplike ladan, parske i en zafer ant sa de pei. E nou pe demann son lasistans pou li entervenir parske i moman pou li antre ladan.

I parey dan nenport ki sityasyon, kan en keksoz i al mal i annan lezot dimoun ki ou anmenn pou ou kapab fer bann demars pou rekiper sa ki ou pe rode. Mersi bokou Mr Speaker.

MR SPEAKER

Mersi. Onorab Roucou, ou kestyon?

HON MICHEL ROUCOU

Mersi Mr Speaker. Bonzour VP, Komisyoner, bonzour a tous.

VP si ou kapab dir nou an vi sa letan parey ou'n dir se ki Lasanble pa ti ganny met okouran lo sa demars, menm Komite Defans sa letan. Si i annan okenn lendikasyon akoz ki Lasanble li menm li sa ti ganny kasyet pou Lasanble pa okouran? Mersi.

MR SPEAKER

Mersi. Vis-Prezidan ?

VICE-PRESIDENT AHMED AFIF

Onorab, mon mazine sa letan zot pa ti anmenn devan Lasanble, parske i pa ti larzan ki zot ti pou servi ki dan *Appropriation Act* 2019. I pa ti en larzan ki ti dan Bidze li menm, parske i ti en larzan ki pe ganny servi atraver en kont spesyal ki ganny garde Labank Santral.

E sa bann kont teknikman zot tonm an deor Bidze. Alor mon mazine - annefe Oditer Zeneral Onorab ti fer en rapor spesyal lo bann kont. I ti fer en odit spesyal lo bann kont ki ganny garde kot Labank Santral, parske zot ti santi poudir a longer ditan sa bann kont pa devret ganny servi e i devret redwir e finalman fermen.

Se sa ki ozordi nou, nou pa pe servi sa bann kont, pou loperasyon Militer.

Sa bann kont evantyelman zot pou bezwen fermen e tou tranzaksyon, swa Lapolis swa Militer i bezwen ganny fer atraver Bidze e *Appropriation Act*. Mersi bokou.

MR SPEAKER

Mersi. Onorab Aglae ou kestyon?

HON EGBERT AGLAE

Mersi Mr Speaker, *VP* bonzour, *ComPol* e Mr Bibi.

VP mon pa en *expert* dan okenn lekipman militer ouswa lapolis. Me selman mon ti ava kontan petet demann ou ou'n dir poudir ti annan en kontra ki ti ganny sinyen pou *procure* sa transpor li menm.

E nenport endividi ki i pou al swa *google* sa *RG-12* i donn ou son spesifikasyon ki son *purpose* ki i fer e ki bann keksoz ki kapab fer.

So i pa kler pou mwan ki mannyer ou kapab dir mwan poudir ti napa spesifikasyon, akoz si pei in rekomann en *RG-12* sa bann *expert* militer zot konnen ki sa i fer zot *ok* e zot al fer lenspeksyon.

So mon premye kestyon, eski ou pe dir nou, poudir baze lo sa bann prosedir ki'n ganny fer depi 2019 ziska 2023 la ki'n arive, sa lakonpanyen in anbet Gouvernman *LDS* par anvoy en lekipman ki pa li ki zot ti demande? Sa i enn.

Dezyenmman, eski ou kapab dir mon si bann *fees ok*, akoz ou annan *shipment ok*, ou'n ganny *waiver* avek *Procurement* pou ganny *exemption tax*.

Sa letan ki'n reste dan Por la, eski nou pe ganny sarze akoz ou annan *demurrage* osi. Bann letan ki li in vini eski sa bann kou pe ganny *factor in*, si demen i annan en *claim* par Gouvernman LDS avek sa lakonpanyen pou rann larzan, si sa lakonpanyen li menm i refize premyerman pou reaksepte sa veikil.

Mon ti ava kontan en pe leklersisman ladan, an term monneter - finans. E si i annan en *refusal* ? Mersi.

MR SPEAKER

Mersi Onorab. Mon'n konpran ou kestyon. Vis-Prezidan.

VICE-PRESIDENT AHMED AFIF

Mersi Mr Speaker e mersi Onorab. Mr Speaker, sa ki mon ti eksplike se ki ler en peyman 50 pousan in ganny fer an 2019. I vedir i en kontra, en langazman.

E nou konman en Gouvernman nou rekonnèt en langazman Gouvernman Sesel vizavi en lakonpanyen *Sud Afrique* pou prodiksyon en *nyala* ki pou ganny anvoye Sesel.

Nou rekonnèt sa langazman. Akoz sete en Gouvernman. Alor me nou'n al pli lwen. Nou'n anvoy en tim

pou al enspekte pou fer sir poudir nou satisfè avek kondisyon sa prodwir ki ti pe al ganny anvoy Sesel.

Ou ti nonmen poudir en *RG-12* si ou al ou *google* ou konnen ki spesifikasyon i annan. Me lo nou *file* ki Lapolis ti annan. Napa okenn landrwa ki'n met spesifikasyon ki zot pe rode ladan. Sa ki mon'n dir. I napa.

Petet en *RG-12* i annan son spesifikasyon. Me lapolis pa'n met okenn demann spesyal. Apard an 2023, ler zot ti al enspekte, zot ti dir pou met serten keksoz adisyonnèl ki sa ki zot in vwar. Me sa prodwir ki'n vini finalman sete pa sa ki zot, zot in trouve.

Mwan mon pa pe la ozordi pou vin dir zot in anbet nou, zot in anvoy en keksoz ki pa li, se pou sa rezon ki mon dir devret annan en lenvestigasyon ki ganny fer par Oditer Zeneral, pou trouve egzaktman kwa ki'n pase, kwa ki'n al mal e kote Gouvernman i debout ozordi ?

E ansuit son rapor i ava ganny prezante devan Lasanble Nasyonal e Manm ava ganny sans demann tou kestyon ki annan pou fer ek sa.

Nou, nou ti ava kontan ki tou kestyon i ganny demande. Ki medya i osi prezan; ki Pep Seselwa i konn tou laverite

konsernan sa transpor. Parske nou nou napa nanryen pou nou kasyet lo la.

An term kou, monn deza eksplike poudir nou pa pe annan okenn kou ozordi pou gard an Por dan Por depi Mars ziska la. Aparid pou sa *rack* li menm ki nou'n peye.

Me selman mon napa kou sa *rack* la ozordi, me selman i pou ganny *factored* dan tou sa ki nou pou rekmanmen avek fourniser, parske nou'n pey en larzan ki 1.8 milyon *Rand* e pou ki pep Seselwa pa pe ganny ranman avek sa.

E i enportan ki nou rod tou kou ki asosye avek sa tranzaksyon e fer sir sa lenvestigasyon atraver Oditer Zeneral i ava montre tou keksoz. Napa nanryen pou nou kasyet. Mersi bokou.

MR SPEAKER

Mersi. Onorab Georges ou kestyon.

HON BERNARD GEORGES

Mersi Mr Speaker. Mersi Mr Speaker. Mr Speaker, mon kestyon, kestyon *PNQ* bomaten Mr Speaker, parey nou tou nou konnen, i sorti kot en parti ki abitye manz zot bannann apre anvoy lapo lo nou, tel parey zot ti fer pandan 43 an zot fer kriyote apre i demann

Gouvernman *LDS* vin pey konpansasyon pou zot move konportman.

Mon kestyon, mon kestyon Mr Speaker, se pou Vis-Prezidan i kapab rapel sa Lasanble avek Lepep Seselwa, lekel ki ti o pouvwar ler sa kontra ti ganny sinyen pou *order* sa veikil?

Dezyenmman, lekel ki pa'n met spesifikasyon dan sa kontra ?

Trwazyenmman, lekel Gouvernman ki'n pey 50 poursan larzan Seselwa?

MR SPEAKER

Ok, menm kestyon. Mersi.

HON BERNARD GEORGES

Rapel nou lekel Gouvernman ki ti o pouvwar 2019 ? Mersi.

MR SPEAKER

Onorab-Onorab, ou premye kestyon Prezidan in deza reponn. I kapab azout klarifikasyon si i oule.

Vis-Prezidan, ou repons?

VICE-PRESIDENT AHMED AFIF

Mersi bokou Mr Speaker. Mr Speaker, i kler poudir ki tou dokiman i montre klerman en komitman ki ti ganny fer an 2019. 2019 Prezidan sete Danny Faure, Komisioner

Lapolis sete Mr Kishan Labonte, Sef Lafors Defans sete Brigadye Leopold Payet, parti o pouvwar *US* sa letan.

(APPLAUSE)

MR SPEAKER

Order silvouple! Vis-Prezidan ou'n terminen? Mersi Onorab Gill, ou kestyon.

HON CHURCHILL GILL

Mersi Mr Speaker. Ler pou koup riban nou dir Gouvernman, ler i sanze i responsabilite i mars avek lot Gouvernman ki vini. Ler i annan problem nou pe rode lekel ki'n konmans problem.

Mwan mon kestyon pou *VP* i senp, tou *paper trail* i kler parey ou'n eksplik nou, ou'n donn nou byen detay depi *exempt procurement*, apre ou'n dir nou poudir premye peyman in ganny fer, dezyenm peyman in ganny fer e tousala in ganny laprouvasyon sa. Bezwen ganny aprouve. A sa staz tou ti byen apre 2023 en group in ale e i konfirman i byen ankor.

So si sa veikil prezan in ariv Sesel i pa li, eski in annan en kominikasyon avek sa *supplier*, vi ki tou keksoz ziska depi 2023 ler vizit ti fer tou keksoz ti annord, e ki *supplier* i dir lo la? Mersi.

MR SPEAKER

Mersi. Sa osi mon krwar in ganny adrese. Vis-Prezidan, ou kapab azoute.

VICE-PRESIDENT AHMED AFIF

Mersi bokou. Onorab, zafer riban koupe, e nou pran responsabilite, wi nou pran responsabilite, nou pran kredi osi.

Ou konnen akoz? Akoz zot ti dir pa kontiny sa bann proze e nou nou'n kontiny sa bann proze parey lakaz.

(APPLAUSE)

VICE-PRESIDENT AHMED AFIF

Dezyenmman-dezyenmman, wi, nou en Gouvernman responsab, kominikasyon avek sa fournisseur - nou pe fer kominikasyon avek sa fournisseur. Nou pe dir li nou pa satisfè ! Nou ti vizite pa sa ki ou ti dir ou pou anvoye. E mon konpran atraver lapolis poudir zot pe refize kominike.

E se pou sa rezon ki nou pe rod tou bann aveni legal, pou nou fer sir ki nou rekiper nou larzan. Mersi bokou.

MR SPEAKER

Mersi. Onorab Loizeau, ou kestyon?

HON NORBERT LOIZEAU

Mersi Mr Speaker. Bonzour *VP* ek delegasyon. Mr Speaker, mwan mon anvi demann *VP*, eski aktyelman dan Sesel i annan en nesesite pou annan en groser transpor parey ou'n dir dan Sesel ozordi? Eski i annan sa nesesite, ouswa i ti zis en ekstravagans par Gouvernman presedan ?

E mon dezyenm kestyon, nou'n ganny dir ki ler nou koup riban nou dir i annan kontinyasyon. Vi ki nou nou'n fer sa dezyenm peyman an 2022, eski sa dezyenm peyman in ganny fer aköz nou konman Gouvernman *LDS*, nou'n anvi fer, ouswa pou nou annan sa kontinyasyon vi ki nou'n siksed en lot Gouvernman ? Sa mon kestyon. Mersi.

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, nou konman en Gouvernman responsab nou pran nou responsabilite serye.

E si i annan en langazman, kot Gouvernman in siny en kontra e tou sa ki devan

li i montre poudir prodwir pe ganny fer pou ganny delivre Sesel, nou bezwen onor nou komitman. Parske nou en Gouvernman, e i nou repitasyon ki lo laliny.

E nou, nou pa pou zanmen met repitasyon Sesel lo laliny, pou bann rezon ki pa valid. Alor se pou sa rezon ki nou ti kontinyen nou ti fer dezyenm peyman, me an plis ki sa nou ti anvoy dimoun pou al enspekte.

An sa ki konsern si ti nesese pou annan en tel veikil ? Sa i ti en *assessment* ki ti'n ganny fer par lapolis sa letan. Me petet mon a demann avek ou permisyon Mr Speaker, ki Komisyoner i a dir li menm ki i panse lo annan en *asset* tel ki en *RG-12* dan son *fleet* e ki manner sa i kapab ede. Mersi.

MR SPEAKER

Mersi. Komisyoner?

COMPOL MR TED BARBE

Mersi Mr Speaker. Bon, bonzour tou Onorab ki prezan. Wi, a sa moman ler ti annan sa - si oule *assessment* - ti nesese pou annan en transpor koumsa. Me petet la ou pouvwar poudir *as we* pe progrese la petet napa en nesesite, nou annan en tel groser veikil parey.

Me selman pandan sa letan, wi. Mersi Mr Speaker.

MR SPEAKER

Mersi. Onorab Uranie, ou kestyon.

HON ROCKY URANIE

Mersi Mr Speaker. Mr Speaker, mon annan en keksoz ki pe *baffle* mwan konmsi. Mon pa pe konpran akoz ki zot pe *claim* kot en Gouvernman responsab...

MR SPEAKER

Onorab, mon pe *run out of time*, silvouple demann ou kestyon.

HON ROCKY URANIE

... selman Mr Speaker, taler Onorab Georges, ou'n...

MR SPEAKER

Onorab, prosede ek ou kestyon.

HON ROCKY URANIE

Selman avan ler, akoz avan ler zot ti fer sa dezyenm peyman, ou pa ti al fer sa vizit ek sa *training* e get ou bann spesifisite an plis ki ou ti bezwen avan ler ou fer sa dezyenm peyman.

E apre sa ki Gouvernman US ti agree an 2019, ti enn ki bon.

A ki moman ki sa in sanze ki zot in al fer ki sa enn ki koumsa ki'n antre dan Por?

E ki zot in *start starter* in kase si zot ti pe rann ki zot in *start* ki zot ti pe al fer? Mersi.

MR SPEAKER

Mersi de kestyon. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, i pe demann bokou bann kestyon ki oditer oubyen lenvestigasyon pou montre.

Par egzanp ki ou ti enspekte ? Ki prodwir ki'n ariv finalman se sa bann kestyon ki nou anvi ganny reponn nou.

Mwan monn la, parske mon pa'n fer en lenvestigasyon detaye lo la mwan.

Se sa ki nou pe demande ganny fer ganny fer dan latransparans. E an plis ki sa zot, zot ganny sans vwar sa rapor i demann kestyon.

Se sa ki nou pe demande. E mon krwar poudir nou nou'n azir dan en fason responsab, parske nou'n pran nou responsabilite konman en pei ki'n fer en komikman. Nou'n anvoy en tim pou al enspekte, nou'n satisfè avek prodwir ki nou'n enspekte.

E nou'n dir zot si ou anvoy sa nou *ok* avek. E anefe nou

ti'n fini fer peyman, apre nou ti al enspekte.

Akoz ? Akoz si ou pa ti ankor fer dezyenm peyman ou pa ti ankor fer dezyenm peyman zot pa ti pou kontinyen avek prodiksyon.

E se sa rezon zot pa ti pou *release* sa veikil. E se sa rezon ki nou, nou santi nou'n fer sa ki byen, nou'n onor nou komikman Gouvernman Sesel, nou'n enspekte veikil avan i ganny anvoye, nou pa'n satisfè. Selman ler veikil in arive e nou pe demann en lenvestigasyon konplet i ganny fer ladan. Mersi Mr Speaker.

MR SPEAKER

Mersi Vis-Prezidan. Bon, nou ava prezan pran kestyon *Leader* Lopozisyon.

HON SEBASTIEN PILLAY

Mersi Mr Speaker. Nou ava note ki en veikil 31 an in *bypass* tou sistenm *LDS* in ariv Sesel, kan en boug pe fer vini en trakter 14 an i pa kapab fer vini, en transpor dezyenmmen Seselwa pa kapab fer vini.

Zot lapolis ek Gouvernman zot in kapab fer vini en veikil 31 an. *That's* sa ki Kreol pe gannyen la.

(APPLAUSE)

HON SEBASTIEN PILLAY

Mr Speaker, avan mon demann mon kestyon mon'n fer mon resers e mon pare pou *share* ek Lasanble bann portre ki mon annan *of* sa veikil lo Por, si *camera SBC* pa vwar petet zot kapab *focus* en veikil rouye konpletman lo en *flat rack* la.

Apre in sorti lo *flat rack* in ariv ater, kot Gouvernman in sey *start* li, *starter* in kase, mon krwar Sanmdi, zot in bezwen pran *starter* al anmenn kot en garaz prive pou aste.

So zot dir nou zot pe rann selman zot in sey *start* mon pa konnen akfer zot in sey *start*.

Annou get sa ki Vis-Prezidan in dir nou en lenformasyon ki nou kapab kolekte.

Veikil i ariv Sesel le 14 Mars 2024.

MR SPEAKER

Onorab ou pa pou. Vis-Prezidan in dir tousala. Demann ou kestyon silvouple. Ou pa pou repas lo tou sa ki in dir.

HON SEBASTIEN PILLAY

Mersi Mr Speaker, pou mwan etabli mon kestyon, mon konpran serten keksoz.

MR SPEAKER

Mon konpran tousala. Ou kestyon silvouple.

HON SEBASTIEN PILLAY

Well, Mr Speaker, i annan pou fer avek *the cost*, pou mwan kapab etabli sa kou.

Veikil in ariv isi le 14 Mars, in ganny *retained* par *Customs* le 22 Avril, in ganny transfer dan *warehouse Customs* le 24 Me. In ganny retire lo *flat rack* le 21 Zen 2024.

Ou, ou dir nou poudir sa veikil in kout en R1 milyon 865 mil. Premye peyman R932 mil ti ganny fer 2019. Zot in *still* fer dezyenm peyman san vizit anba Gouvernman *LDS* ki sipoze pli efikas e al laba.

Now Mr Speaker, konbyen larzan an tou lapolis in peye?

Akoz dapre nou lestimasyon e ler nou'n regard avek bann dimoun ki servi *flat rack* an tou sa pe ariv R3 milyon. R3 milyon dan en moman kot Seselwa pe soufer. Nou bezwen rod donasyon pou...

MR SPEAKER

Onorab, ou'n demann premye kestyon, konbyen egzaktaman sa in koute. Eski ou annan en lot kestyon?

HON SEBASTIEN PILLAY

Mersi Mr Speaker, mon annan en dezyenm kestyon. Mon dezyenm kestyon Mr Speaker, Vis-Prezidan i dir nou la ozordi i pou al demann en lanket dan sa sityasyon.

Ozordi Vis-Prezidan ki ankoler ler sa. Pe al demann en lanket dan sa sityasyon *FPAC*, Oditer Zeneral *investigate* tou dimoun.

Me Mr Speaker sa veikil i lo Por depi le 14 Mars 2024, akoz depi le 14 Mars oubyen le 15 Mars 2024 oubyen le 16 Avril 2024 Vis-Prezidan pa ti demann en lenvestigasyon ?

Akoz ki apre ki mon'n demann kestyon ki i pou al demann en lenvestigasyon.

Sel keksoz ki nou konnen...

MR SPEAKER

Mersi. Vis-Prezidan ou repons.

HON SEBASTIEN PILLAY

...sa lanket pou pas parey *CCCL*.

MR SPEAKER

Vis-Prezidan, ou repons.

VICE-PRESIDENT AHMED AFIF

Mersi bokou Mr Speaker. I paret Onorab i annan tou lenformasyon li. Selman mon pa konnen, akoz i vin demann

kestyon si i annan tou lenformasyon. Mon pa konnen si i pe zis fer politik.

Be si ou annan tou lenformasyon akoz ou pe demann tou lenformasyon?

Sa ki ou pa konnen petet, se ki nou, nou en Gouvernman responsab e petet ou pa'n ganny akse bann *email* ki nou, nou pe kominik avek Minister Zafer Etranzer, depi Mars sa. Nou, nou pe travay pou rektifye sa sityasyon, nou pa pe asize pou esper ou pou vin dir nou ki zour nou pou bezwen al rezourd sa.

(APPLAUSE)

VICE-PRESIDENT AHMED AFIF

Me selman ou pa konnen ki nou pe fer, parske nou, nou pe travay pou Lepep Seselwa. Nou pe travay pou nou fer sir sa pei marse. Sak sou ki sa Gouvernman i depanse, i en sou ki ganny depanse korekteman kot Seselwa i benefis.

Sa desizyon 2019 napa benefis pou nou. Mersi.

MR SPEAKER

Mersi.

HON SEBASTIEN PILLAY

En pourtir in ariv dan Por ou pe travay ?

MR SPEAKER

Bon, nou terminen avek *PNQ*. Mon remersye Vis-Prezidan son delegasyon e mon swet zot bonn kontinyasyon.

Onorab silvouple, wi. Mersi. Onorab Pillay ou'n dir devan Minis dan son figir, ki i fer onte devan Vis-Prezidan ki i fer onte. Mon pa aksepte sa, mon pa aksepte sa e mon pe demann ou *retract* silvouple.

HON SEBASTIEN PILLAY

Mersi Mr Speaker, mon pou *retract* e mon pou *apologize* sa komanter piblik i ava zize pou li menm. Mersi.

MR SPEAKER

Mersi. Bon, nou ava pran bann kestyon ki lo *Order Paper*. Madanm raporter i ava apel Minis ek son delegasyon.

Bonzour Minis Billy Rangasamy Minis pour Later e Lozman. E egalman mon annan Mr Jitesh Shah *CEO Seychelles Infrastructure Agency*, e Mr Steve Mussard *Deputy CEO Property Management Company*.

E mon osi annan, mon napa son non, me solman Mr Denis Barbe *Principal Secretary* pour Lozman.

Bonzour zot tou e byenveni pou sesyon kestyon dan Lasanble nou'n pare pou konmans avek kestyon 149 Onorab Egbert Aglae.

En moman silvouple en moman. Mon krwar mon bezwen. Nou konmans avek kestyon 151, dan non Onorab Desheila Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Manm Onorab e bonzour tou dimoun a lekout.

Mr Speaker, avek ou permisyon vi ki mon kestyon i baze lo netwayaz dan bann landrwa spesifik dan distrik Perseverance, Mr Speaker, permet mwan an premye, remersye...

MR SPEAKER

Non, non Onorab non, non. Kestyon silvouple.

HON DESHEILA BASTIENNE

Ok, mersi Mr Speaker. An vi ki serten servis Ile Perseverance i ankor tonm anba responsabilite Minister Later ek Labita,

Eski Minis pour Labita i kapab eksplik Lasanble lekel ki pe antreprann responsabilite pou *allocate* bann kontrakter

netwayaz dan bann landrwa spesifik dan distrik? Mersi.

MR SPEAKER

Mersi. Minis, ou repons.

MINISTER **BILLY**
RANGASAMY

Mersi Mr Speaker. Mr Speaker, avek ou permisyon mon ava dir bonzour tou dimoun ou menm Mr Speaker, tou Manm Lasanble, tou bann *staff National Assembly*, tou manm ki a lekout lo radyo televizyon *internet* enternasyonalman bonzour zot tou.

E avek lagras Bondye mon priye *Almighty* i ava get nou dan nou sesyon bomaten ki i ava deroul dan en letan agreab e dan lape e nou ava kapab adres tou sa bann kestyon en fason efikas an menm tan la ki nou dan sa semenn ki nou pe selebre nou Lafet Nasyonal. Mersi Mr Speaker.

Mersi Onorab pou ou kestyon. Mr Speaker, pou reponn sa kestyon, mon pou bezwen fer kler ki i annan plizyer kategori sit e landrwa ki bezwen ganny mentenir lo zil Perseverance.

Premyerman, otour bann blok flat, I responsabilite *PMC* pou koup zerb e netway landrwa e kit li prop.

Sa i ganny fer atraver bann Kontra *maintenance* avek bann kontrakter prive.

Dezyenmman, nou osi annan bann morso later Leta ki pa ankor devlope e ki nou bezwen fer bann pti proze pou koup zerb, koup pye sed, kit li prop. E sa i ganny kordinen par SIA, anba gidans Lotorite Distrik.

Trwazyenmman Mr Speaker, i annan bann kare later ki'n ganny *allocate* anba en *lease*. E pou sa bann morso later responsabilite i touzour reste avek sa bann *lessee* nou mentenir zot propriyete ki zot in *lease*.

Finalman, i annan bann *ring spaces* oubyen bann *common areas*, li ki i sipoze ganny netwaye e mentenir par LWMA.

Sa dernyen kategori i enn ki'n okouran in annan en mank kordinasyon. E nou aksepte sa. Kot menm si i annan plizyer landrwa ki pe ganny netwaye i annan lezot landrwa ki pa pe tonm anba direktman Kontra ki LWMA i annan lo Perseverance.

Zisteman Mr Speaker, nou'n fini konmans sa legzersis pou idantifye lekel sa bann landrwa ki pa pe ganny latansyon nesaser. E nou diskisyon avek distrik e LWMA,

pou enkli sa bann landrwa dan zot program netwayaz o pli vit posib. Mersi Mr Speaker.

MR SPEAKER

Mersi. Onorab, ou siplemanter?

HON DESHEILA BASTIENNE

Mersi Mr Speaker. Mersi Minis pou ou lesplikasyon. Antretan ki mon ti le remersye LWMA pou sa travay Dimans pou sa 18 bin. Mon ti a kontan an menm tan met dan ou latansyon Minis ki detanzantan nou pe ganny sipor LWMA menm pou vin fer bann *one-off*.

E la mon ti ava voudre demann ou sa kekyon si ou kapab eksplik nou sa *car park* la devan kot *unit 64 W10* kot detanzantan LWMA i vin fer bann *one-off* si zot annan okenn plan atas en kontrakter la, vi ki nou pas dan bann problem linondasyon a sak fwa i annan gro lapli ?

E dezyenmman, mon ti ava kontan osi ganny en lesplikasyon en lasirans lo kot i annan serten pti kontrakter ki ganny *assigned* pou netway dan distrik. Me zot plifere netway zis devan dan semen piblik e zot toultan ignor bann *corridores* ki ant bann lakaz.

Eski sa osi i dan zot plan pou ki bann kontrakter prive ki

ganny sa bann kontra i met sa en sel dan zot kontra ? mersi.

MR SPEAKER

Mersi Onorab. Minis?

MINISTER

BILLY

RANGASAMY

Mersi Mr Speaker. Mersi Onorab, pou ou kestyon siplemanter. Premye pwen sa enn ki ou'n fer sorti lo sa *car park* nou osi nou byen konsernen ek sa.

E sa pou en legzersis parey nou'n fer resortir letan nou fer sa langazman tre byento avek *LWMA*, i pou enn ki nou pou tonm dakor ki mannyer nou pou *manage* sa landrwa osi. Bann pti kontrakter kot i konsern zot kontra i tipikman avek *LWMA* dan sa ka. Nou pou bezwen fer sa konversasyon pou nou determin egzaktman bann koridor osi ki i bezwen ganny netwaye.

Sa i en legzersis ki nou pou pran li a pli o profon dan sa konversasyon ki nou pou annan avek. E nou pou enkli li dan sa konversasyon osi.

An zeneral osi mon bezwen pran sa lapel avek zabitan Perseverance pou kontinyen kit zot vilaz prop, kontinyen letan i met bin, servi li byen.

E i bann fasilite ki met a zot dispozisyon. E nou ti ava kontan ki Perseverance osi i reste en landrwa egzampler. Mersi Mr Speaker.

MR SPEAKER

Mersi. Bann Manm mon zis met a zot latansyon mon annan 10 kestyon lo *Order Paper*. Letan i tre limite par kestyon, so bann kestyon siplemanter i kapab ganny limite dapre letan ki nou annan. Mon ava pran en kestyon la Onorab Michel Roucou.

HON MICHEL ROUCOU

Mersi Mr Speaker. Minis, bonzour ek ou lekip. Minis, an vi nou vwar ki Perseverance li menm li i en *housing estate* an menm tan ki i en distrik ki ankor *still* anba bann devlopman.

Si ou kapab dir nou ki plan ou Minister i annan, pou fer sir ki bann kare later ki pou lemoman pa ankor devlope ki nou vwar ki tanzantan i annan bann *ilegal dumping*, kot dimoun pe kontinyelman vin zet en kantite salte laba pou fer sir ki sa bann landrwa li menm li i pa vin i pa reste sa landrwa kot i dezerte, ki sa bann landrwa i ganny devlope ki anpese ki dimoun i ganny bann

landrwa kot pou vin vin zet
bann salte? Mersi.

MR SPEAKER

Mersi Onorab. Minis?

MINISTER **BILLY**
RANGASAMY

Mr Speaker, mon ava demann
PS Barbe avek ou permisyon,
pou li eklersi sa pwen.

MR SPEAKER

PS, ou annan laparol.

PS DENIS BARBE

Mersi Mr Speaker. Mersi
Onorab pou ou kestyon. Plan
Minister i en pti pe senp
Onorab. Nou bezwen sirkil en
lalis tou bann *lessee* an menm
tan avek Lotorite Distrik pou
nou kapab fer *monitoring*, en
fason ki distrik i ava donn nou
lanmen *chase after* sa bann
dimoun pou netway propriyete.

Bann propriyete ki ankor
lo Gouvernman, sa i ava tonm
responsabilite parey Minis in
dir atraver *SIA* pou nou fer
bann netwayaz. *Thank you*.

MR SPEAKER

Thank you. Nou ava pas lo
kestyon 152 Onorab John
Hoareau.

HON JOHN HOAREAU

Mersi Mr Speaker. Bonzour
Minis avek ou lekip. E bonzour
tou dimoun a lekout.

Mr Speaker, mon kestyon
i lir koumsa;

Eski Minis i kapab dir
Lasanble kwa ki pe ganny fer
par *PMC* pou fer dimoun pran
konsyans lo lafason ki *staircase*
dan bann blok flat i devret
ganny servi?

E eski *PMC* pe kontanple
servi *intercom* pou ede anmenn
pli bon sekirite kot bann *flats* ?
Mersi.

MR SPEAKER

Mersi Onorab. Minis?

MINISTER **BILLY**
RANGASAMY

Mr Speaker mon remerisi
Onorab Hoareau pou anmenn
sa kestyon dan Lasanble akoz
sa *issue* i preokip mwan
enormeman personnelman.

E mon asire i preokip nou
tou nou Manm Lasanble isi
prezan.

E *PMC* zot ganny pa mal
difikilte avek sa size. Mr
Speaker, i malere pou vwar ki
dan bokou bann blok flat bann
staircase pa pe ganny servi dan
en fason apropriye e responsab.

Ki nou vwar Mr Speaker, i
annan bokou dimoun ki groupe
dan bann *staircase* e zot pe
servi bann sibstans sibstans

illegal. Dimoun pe pike disan pe fannan partou lo miray *staircase*, sa ki fimen e menm kit zot salte lo peron i degradan. I tris, me se lefe anti-sosyal ki pe kontinyen afekte nou.

I pa en nouvo problemm Mr Speaker pou sir. Tousala Mr Speaker i met en kantite presyon lo *PMC* e son resours imen e finansyel.

Sa bann aksyon osi i sali sa fasilite ki preski tou dimoun ti reste la ki reste la dan sa blok flat i servi. I pa zoli ditou. I pa zoli ditou pou nou bann zanfan ki pe grandi.

Mr Speaker, mon kapab dir ki *PMC* i fer bokou pou esey adres sa problemm. *PMC* in fer plizyer *meeting* piblik dan diferan *estate* avek nou bann zabitan. E sa problemm i touzour, touzour ganny diskite.

An plis ki sa *PMC* pe tou dernyerman pas plizyer *spot* lo *SBC*. Lo sa ki konsern lo sa konsern eskiz mon. E lezot ankor parey zet salte dan bann *meter room*, eksetera.

Tou dernyerman Mr Speaker *PMC* in konmans en travay kot in zwenn tou bann dimoun ki pe al ganny en nouvo lakaz, pou konmans preparasyon pou ed zot viv pli byen ansanm konman frer ek ser dan bann blok flat e bann

problemm parey i touzour ganny diskite.

Sa nouvo program par egzant Mr Speaker in konmans resaman avek sa 16 *unit* ki nou'n donn lakle Bel Ombre Vilaz Prosperite.

E byensir Mr Speaker, *PMC* i envit Lotorite Distrik dan sa bann tel *meeting* pou zot osi partaz zot bann konsern.

Sa i lapros ki nou pou pran avan ki nou donn lakle, avan ki nou antre nou met bann zabitan dan zot nouvo flat, nou pran en konversasyon avek zot detrwa 5 semenn a 6 semenn avan *build zot up* pou zot annan sa responsabilite pou zot viv ansanm konman frer ek ser dan zot blok flat. E zot *staircase* pou zot mentenir zot *staircase*. Par egzant i tonm anba sa bann dyalog ki nou fer.

An sa ki konsern *intercom*, Mr Speaker en tel sistenm parey i ede nou aksepte poudir i ede pou kontrol akse dan bann blok flat e i tre bon propozisyon par Onorab Hoareau.

Nou pe touzour konsider tou kalite opsyon pou adres sa problemm me, mon bann frer ek ser vandaliz i reste touzour en problemm e en konsern.

Dan ka Sesel, prenon kont sa bann problemm ki nou pe rankontre mon Minister ti konmans met en baro feray dan

bann larantre blok flat par egzanp sakenn bann zabitan dan sa blok zot ti ganny en lakle sa kadnan.

Malerezman Mr Speaker, sa sistenm pa ti mars byen zeneralman. I annan ki'n perdi lakle, ouswa zot menm ki'n kit laport ouver.

An plis ki sa Mr Speaker, *SFRSA* pa ti tro rekomann en tel pratik pou rezon evakyasyon an ka en dife

Mr Speaker, pandan sa proze 24/24 nou ti konmans met en laport spesyal laport feray ki ti enkli en sistenm *coding*, en *code* kot ou kapab peze sakenn i ganny son en *code* spesifik pou sa *unit* pou ganny akse dan sa blok.

Ankor Mr Speaker, sa osi pa'n ganny mars pa'n mars ditou. Tou sa ki'n ganny mete in nepli marse. Akoz tousala in ganny vandalize. Nou pran en poz la. Parske sa i sagrinan Mr Speaker.

PMC ti pe met osi ti pe konmans osi met ganny konplent ki sa bann laport ki pe ganny kit ouver, blok i ganny met an plas pou anpes laport frenmen e tousala i envit nenport kalite dimoun dan *staircase*.

Alors Mr Speaker, i annan en pe ezitasyon la pou lemoman pou nou met en sistenm

intercom ki bokou pli avanse. Prenon kont son laspe finansyel sa problemn sagrinan ki apel vandaliz i osi pa ede. Bann antretyen *maintenance* pou sa bann tel sistenm i pou osi koute.

Mr Speaker pou lemoman *PMC* pe sey erezman kontinyen avek son program sansibilizasyon, parey mon'n eksplike pli boner.

E pou konklir Mr Speaker, avek ou permisyon mon oule profit sa lokazyon pou ankor enn fwa, parey mon fer dan tou bann louvertir vilaz letan mon partisip ladan, lans en lapel serye avek tou bann zabitan silvouple dan nou bann *housing estate* osi donn sa koudmen pou mentenir kontrol. Pa soutir bann dimoun an deor vin la vin fer dezord dan zot vilaz, dan zot *staircase*, dan zot blok flat.

Nou swe ki sa bann problemn anti sosyal ki deroule dan bann *staircase* peron i arete konpletman avek lagras *Almighty*.

Gouvernman i investir bokou larzan dan sa bann proze, e nou depans bokou larzan *tax payers money*. Alors bann zabitan annou pran nou responsabilite e pa soutir sa bann tel aktivite anti sosyal.

Mon oule azoute ki nou *Enforcement Unit PMC* avek led

Lafors Lapolis eksetera pou ranforsi zot prezans e pran aksyon apropiye lo bann tel size.

E nou pou bezwen pran en lapros zero tolerans. Nou bezwen respekte nou bann Kontra e nou bann Lagreman ler nou rantre dan nou bann blok flat, dan nou apartman.

Annou pran nou responsabilite silvouple. Mersi Mr Speaker.

MR SPEAKER

Mersi. Siplemanter Onorab Hoareau.

HON JOHN HOAREAU

Mersi *Minister* pou sa larepons ase detaye e osi sa ledikasyon ki pe kontinyelman ganny fer.

Mr Speaker, mon ti ava kontan osi demann avek Minis, si zot in evalye osi bann lezot fason striktirel ki fason ki *staircase* i kapab ganny fer dan en fason pli sekirize e osi si zot pe osi evalye sistenm *camera* ki kapab ganny servi osi ?

Tout an prenon kont ki i annan *issue privacy* osi avek sa. Me eski zot in evalye sa bann keksoz e ki fason sa i kapab ganny servi dizon pou bann prodwir parey *condominium* osi avek bann prodwir parey *social housing flats*?

MR SPEAKER

Mersi. Minis, ou repons.

MINISTER

BILLY

RANGASAMY

Mr Speaker, avek ou permisyon mon ava demann *CEO SIA* ki i responsab pou bann *design* pou nou bann batiman pou partaz son repons.

MR SPEAKER

Tre byen. *CEO*?

CEO JITESH SHAH

Mersi Mr Speaker. Mersi Onorab pou ou kestyon. Onorab, lo kote pou sekiriz sa bann *staircase* en pti pe plis sa i baze lo bann diskisyon ki nou'n annan avek *Planning Authority* avek tou bann nouvo proze ki nou pe planifye konmansman lannen prosenn, i deza en diskisyon ki nou pe bezwen met bann laport dan bann *staircase from* en laspe *fire safety*.

Pou annan bann *fire doors* ki pou ganny enstale. So otomatikman sa bann *staircase* pa pou ouver parey i ete ozordi. Selman i ase enportan pou nou fer sa sansibilizasyon avek bann dimoun akoz deza kot nou'n met bann *obviously* ler nou pe koz *fire safety doors* pa pou bann laport feray parey nou'n mete dan lepase.

I pou bann laport solid senmen ki pou annan son *fire rating* e deza si nou pou vwar poudir i annan vandaliz pe arive avek sa bann laport feray, dimoun pe servi blok pou kit li ouver, sa pa pou posib ler nou met sa bann *fire safety doors* an plas.

I pou neserer pou sa bann laport reste fermes, sansan i pa pou efektif pou li anpes en dife propaze si nou pa fer sa. Sa i en alternativ pou anpes nou met plizyer *staircase* dan en blok, ki egzaktman, akoz sa kekyon nou vwar poudir i annan bann problem ki arive dan *staircase*, nou pa oule kree lezot lespas parey dan en blok flat.

So nou'n bezwen agree avek *SFRSA*, poudir sel fason ki nou kapab mentenir zis en *staircase* e pou nou met bann *fire doors* lo sak *landing so that staircase* li menm i ganny *compartmentalize*. Lo - so sa pou arive byensir konmansman lannen prosen dan bann nouvo *design*.

Lo kote laspe *camera*, i koz en pti pe avek sa ki Minis in dir lo kote dimoun pran zot responsabilite pou zot pa vandaliz keksoz.

Si deza nou pe vwar bann lekipman bann instalasyon en pe pli *basic* pe ganny vandalize,

mon krwar i ase kler poudir menm bann zafer *camera* nou pou ganny tou sord kalite vandalizm ki pou arive avek.

I annan serten keksoz ki nou kapab kekfwa gete ki mannyer nou kapab protez li. Nou kapab ankadre li. Selman i pou toultan en keksoz ki nou pou bezwen pran kont poudir sa bann keksoz i vin avek en kou son *maintenance* tou i vin avek en kou ki an se moman avek model ki i annan i tonm anba *PMC*.

So nou pou bezwen revwar li dan son totalite avan nou kapab pran sa *step* pou nou kapab enstale.

Selman sa ki mon krwar kekfwa enportan pou nou fer resorti avek bann sistenm ki egziste ozordi avek bann *wireless cameras*, eksetera. Pou napa gran lenstalasyon lo li menm lo kote sanzman *design* dan *block* oubyen okenn keksoz spesifik.

So menm bann *existing estates* i pou posib pou nou apre ale enstale sa bann lekipman enn fwa ki nou santi nou dan en pozisyon konfortab pou nou kapab fer li. Mersi.

MR SPEAKER

Mersi *CEO*. Bon, mon ava pran enn de kekyon siplemanter

lezot Manm. Onorab Pillay, ou kestyon.

HON SEBASTIEN PILLAY

Mersi Mr Speaker. Mr Speaker, prenon kont ki bann dimoun ki pe ki dan sa bann flat zot pe aste zot flat. E i annan parfwa ki ler in aste zot flat i annan bokou retar pou zot ganny zot bann Lagreman lavant.

E lefe ki si zot ti ganny zot lavant zot kapab servi sa lavant al kot en labank *secure* en *loan* e pran en *loan* met zot *burglars bar* bann keksoz koumsa.

Eski Minis i kapab dir nou, ki zot pe fer pou aktivman travay pou ankouraz bann lokater pou al dan sa direksyon?

E prenon kont lefe ki resaman nou'n vwar ki en *condominium* in ganny vann, lavant transfer i ganny fer preski menm zour ou avek en etranze par en Seselwa ki esper sepa konbyen letan i gannyen ki ou pe fer pou asire ki Seselwa i ganny menm tretman parey ek etranze pou ki ler i ganny son lavant i ava kapab ale zisteman rod son prop *camera* ros son prop keksoz. Mersi Mr Speaker.

Be ki zot pe ankoler ler nou demann kestyon pou Seselwa?

MR SPEAKER

Hold on. Wi i annan en problem ek ou kestyon Onorab. Sa kestyon i lo sekirite servi *staircase* se *intercom*.

Ou'n entrodwi en lot size. Selman i annan en eleman ki Minis i kapab adrese si mon ava les laparol pou Minis.

MINISTER

BILLY

RANGASAMY

Mersi Mr Speaker. Mersi Onorab pou ou kestyon. Onorab, sa size lavant later pou bann dimoun so zot lavant pou zot *title deeds* pou zot bann dimoun ki'n aste en apartman dan en blok flat, i reste i preokip nou bokou i en vye sityasyon, en vye ka, bann vye ka bann vye *estate* ou vwar bokou sa in arive.

So nou pe mon pou demann *PMC* pou donn en pti leklersisman avek tou imilite, nou pe met tou nou lenerzi pou nou *tackle* tou sa bann vye *title deeds*; fer sir dimoun i ganny zot *title deed* dan zot lanmen o pli vit posibil.

I konplike dan bann blok flat i pa tro konplike lo bann *terrace housing*, aköz i annan en kare later ki al avek. Me dan bann blok flat i annan bann serten konplikasyon kot i konsern *survey*, kot i konsern

laspe anrezistre sa apartman, eksetera.

Pou sa ka ki ou'n fer resorti lo la, petet vi ki ou'n fer resorti, sa i tonm i en apartman *GICC* e zot, zot annan zot *Condominium Act* ki an plas e zot sistenm i an plas pou zot kapab fer sa bann transfer.

Ou war zis lo kote Gouvernman nou pe travay lo nou *Condominium* agresivman avek led *AG's Office* pou nou kapab fasilite sa travay o pli vit posib.

E an plis ki sa, pou osi nou pou kontinyen ankouraz dimoun *secure* zot apartman met an plas zot bann fasilite sekirite, tel ki *buglars bar* oubyen si zot oule met zot prop *camera*. Sa i pa en keksoz ki nou anpese. *PMC* i evalye e i met sa an plas. Mersi Mr Speaker.

MR SPEAKER

Mersi. Onorab Pillay, permet mwan.

MINISTER **BILLY RANGASAMY**

Mr Speaker, mon pa konnen si ou ava permet mon pou les *Deputy CEO PMC* eklersi en pti pe ?

MR SPEAKER
CEO PMC.

DEPUTY CEO STEVE MUSSARD

Mersi Mr Speaker. Bonzour Mr Speaker. Mersi Minis pou donn mwan sa laparol. Onorab, ou kestyon i byen. Nou konnen i annan en defi lo sa zafer lavant. I annan en kantite dimoun ki'n fini peye en pe letan pase.

E mon pa pou al long, mon pou zis asir ou ki nou okouran sa problenm e nou annan en programm entansif ki nou'n prepare, pou nou kapab parey Minis in dir, fer sir ki bann dimoun ki'n fini peye zot ganny zot lavant dan bann *block of flat*.

I annan en pti pe konplikasyon en pe travay i annan *estate* ki vye, nou bezwen fer bann prosedir neserer anba sa *act* ki nou pa kapab *get away with it*.

So selman mon kapab asir ou. Mon asir Lasanble la, poudir i annan en programm e nou okouran nou konn byen lekel ki'n fini peye e ki mannyer nou programm pe marse. Mersi Mr Speaker.

MR SPEAKER

Mersi. Mon ava pran kestyon Onorab Labonte.

HON ANDY LABONTE

Mersi Mr Speaker. Bonzour Minis avek *panel*. Vi ki kestyon i lo lafason servi *staircase* dan bann flat. Minis, parey nou konnen parey ou'n dir dan ou larepons se ki *staircase* pa pe ganny servi parey i merite.

E English River osi nou pe ganny serten *issue* sirtou kot Ex Pierre Hoareau e ti annan serten bann rekomandasyon ki ti'n deza ganny fer. I annan serten keksoz ki nou ti'n deza agree.

Ki rekour nou pe donn sa bann dimoun - sa bann zabitan ki ler dimoun i vini i vin bwar i annan menm ki pe dormi dan *staircase*, pou nou kapab konklir sa zafer baro kot *staircase* kot Ex Pierre Hoareau English River Castor Road? Mersi.

MR SPEAKER

Mersi. Minis, repons.

MINISTER **BILLY RANGASAMY**

Mr Speaker, *PMC* i pe *deal* avek sa *case* en pe direkteman. Alors mon ava les *Deputy CEO* pran sa repons.

MR SPEAKER

Tre byen. *Deputy CEO* ou ava kontinyen.

DEPUTY **CEO** **STEVE MUSSARD**

Mersi Mr Speaker. Mersi Onorab. Ex Pierre Hoareau i en ka tipik ki nou pe koze la, nou ava travay nou ava fer nou donn *warning* sa bann dimoun e ki nou vwar par-ler - *well most of the time* ki nou vwar se ki sa bann dimoun menm san perdi respe pou person, sa bann dimoun menm ki fer sa lankourazman pou dimoun vin bwar la.

Mon krwar la in vin nespes *drinking spot* si ou kapab met li koumsa i pre obor laboutik. E i touzour konmsi sa landrwa kot nou kontan vin asiz dan peron, dan sa *staircase* i en landrwa en pti pe konnen kwense pou nou kapab...

Anyway, selman mon kapab asir ou Onorab nou annan sa dyalog avek Lapolis ki sak fwa ler nou ganny konplent nou seye aköz nou napa *power* pou *arrest*, nou fer sa parol ek lapolis.

E la sa travay ki nou fer pli pre ek Lapolis ki nou sey kan nou ganny sa bann konplent nou sey anvoy lapolis i disperse apre ou pouvwar zot troun ankor.

So i en travay kontinyel Onorab. E ki nou anvi nou ti ava kontan se ki dimoun la zot, zot leve dir konnen pous sa

bann dimoun. Akoz parfwa la bokou fwa ou vwar se bann dimoun ki an deor pa bann dimoun la. Dimoun sorti an deor vini asize la - ou konnen i en nespes zafer Onorab fransman dir ek ou.

Selman nou annan sa dyalog ki nou fer avek lapolis ki annan sa patrol pou kapab ganny fer la kot *Ex* Pierre Hoareau Castor Road. Mersi Onorab. Mersi Mr Speaker.

MR SPEAKER

Mersi *CEO*. Bon, nou'n pas bokou letan lo sa kestyon. Mon ava pas lo kestyon 153 Onorab Sandy Arissol.

HON SANDY ARISSOL

Mersi Mr Speaker. Bonzour Minis avek ou lekip. Bonzour tou Manm koleg Onorab. Bonzour tou zabitan Bel Ombre spesifikman bann zabitan Le Niole.

Mr Speaker, mon kestyon i lir koumsa;

Eski Minis i kapab eksplik nou Lasanble ki zistans travay in arive avek demolisyon sa gro ros, ki ti en danze pou semen Le Niole ? Mersi Mr Speaker.

MR SPEAKER

Mersi. Minis?

MINISTER

BILLY

RANGASAMY

Mersi Mr Speaker. Mersi Onorab pou ou kestyon. Parey ou konnen sa problem konsernan stabilite sa gro ros Le Niole ti vin evidan apre bann gro lapli, bann dezaz le 6 Desanm, ti annan bokou glisman teren e ros deboule sirtou dan rezyon nor Mahe. Sa ti preokip tro bokou Onorab e Onorab Hoareau osi bann Onorab dan distrik kote nor. E nou ti bezwen pran en desizyon ase vit pou nou neser pou *deal* ek sa ros stabiliz sa landrwa.

Mon kapab mon kontan poudir k louvraz ti konmanse milye Fevriye e an zeneral in progres ase byen. Malgre serten defi ki nou'n rankontre.

An se moman nou'n kas anviron 50 poursan sa ros. E apre analiz ki'n ganny fer ek avek bann *expert* enternasyonal, enkli zeolog e bann teknisyen dan Minister *DRMD*, eksetera, nou'n kapab konfirmen ki travay ki'n ganny fer in erezman stabiliz sa landrwa, stabiliz sa teren.

Nou konnen ki sa in kree bokou lenkonvenyans pou sirtou bann zabitan ki reste la ki servi sa semen. Me letan travay in fer nou'n bezwen

annan en bon lantant en bon korporasyon.

Nou pe fer en pe bann travay apropiye otour sa ros pou zis asire ki lerozyon otour li pa degrad e afekte stabilite. Sa i an prosesis pou lemoman *SIA* pe okip sa travay.

Bann Lotorite konsernen in satisfè parey ou'n dir boner, travay i sa travay an sekirite prezan. E nou pe fer demars pou bann rezidan kapab kontinyen ek zot lavi normal.

E lo sa pwen mon pe sey fer resorti ki i annan demars pou ki nou swete ki sa de fanmir ki ti bezwen deplase an Desanm apre Dezas, i ava kapab retourn e zot tre byento. Mersi Mr Speaker.

MR SPEAKER

Onorab Arissol, ou siplemanter?

HON SANDY ARISSOL

Mersi Mr Speaker. Mersi Minis pou ou larepons. Mon ti ava kontan profite pou mon remerisi tou bann zofisye e tou lezot dimoun ki'n travay avek sa proze Minis e osi pasyans ek tolerans bann dimoun bann zabitan Le Nirole.

Zisteman mon ti ava kontan demann ou de kestyon siplemanter. Mon premye kestyon se an relasyon avek ou

Minister avek Minister Minis Derjaques.

An relasyon avek sirkilasyon bis *SPTC*. En keksoz ki dimoun i kontinyen konplent. Parske bis i met zot dan vale dan larantre dan vale me i pa arive ziska kot bis i ti abitye vire.

Si ou kapab dir avek nou si i annan en travay ki pe ganny fer letan zot pe *secure* tou keksoz, pou ki zot kapab donn nou en dele letan kan ki bis pou retourn son sirkilasyon normal ziska son pwen final pou ki i ava benefis bann zanfan lekol, nou bann dimoun aze e lezot zabitan.

Mon dezyenm kestyon mon ti ava kontan demann ou, letan ou'n koz an relasyon avek klasman sa gro ros i ti annan konpri de eleman. Ti annan sa eleman ti annan sa eleman ki ou'n koz lo la bann dimoun in bezwen ganny deplase, si ou kapab dir ek nou kot zot ete, si zot byen, si ou Minister i angaze avek zot ?

Dezyenmman, i annan osi sa laspe sa klinik ki ti ganny kree zisteman letan sa gro ros ti pe ganny kase la, pou ki si zanmen i ariv en keksoz bann dimoun i kapab al laba.

Eski ki'n arive, eski i ankor operasyon zot an kontak ek sa fanmir msye ek madanm

Tirant an vi ki zot ti donn zot landrwa Gouvernman pou en peryod letan. Be sa letan in eksid son letan. Mersi bokou Mr Speaker.

MR SPEAKER

Mersi Onorab. Minis?

MINISTER **BILLY RANGASAMY**

Mr Speaker, mon ava les CEO Jitesh eksplik nou en pti pe sirtou sa premye kestyon lo SPTC e eksetera bann laranzman pe ganny fer. Mersi Mr Speaker.

MR SPEAKER

Mersi. Wi, CEO?

CEO JITESH SHAH

Mersi Mr Speaker. Mersi Onorab. Onorab, lo kote SPTC pou zot retourn lo sa semen pou zot fer zot larout normal zot ti annan en pti pe konsern ki zot ti'n met devan. Mon krwar prensipalman i annan en pti pe netwayaz ki ti reste pou fer ki nou pe espekte pou fini sa semenn. E osi ti annan sa *crash barrier* ki ti ganny andomaze.

SLTA pou lemoman i dan prosedir pou zot aranz fer le neser pou aranz sa *crash barrier*.

Nou pe espekte dan sa detrwa semenn ki pe vini la pou'n fini tou keksoz pou'n fini annord *and then* nou ava fer sa kominikasyon avek SPTC pou zot kapab retournen. Mersi.

MR SPEAKER

Mersi. Okenn repons pou dezyenm kestyon si... Yes Minis.

MINISTER **BILLY RANGASAMY**

Mersi Mr Speaker. Wi, Mr Speaker, pou reponn dezyenm kestyon siplemanter Onorab, wi mon Minister i angaze ek sa de zabitan de propriyete later ki ti bezwen deplase.

Nou annan serten travay pe fer avek zot i annan pe sey demann serten konsiderasyon. Me nou, nou ti deplas zot pou stabiliz zot pou fer sir landrwa i stabilize pou zot retournen, me la zot pe profite pe demann serten keksoz.

Me ou konnen mannyer keksoz i ale, nou pe vwar, me selman lenportans se landrwa i stab e zot kapab retournen. Wi, nou angaze avek zot.

Kot i konsern msye, madanm Tirant, mon ava profite avek ou permisyon Mr Speaker pou remersye sa fanmir ki enn pa plizyer osi lezot fanmir zot manm

popilasyon ki'n ede dan sa bann letan difisil.

E sa nou'n pran li, nou'n apresye enormeman e nou pe fer en konversasyon avek zot petet i ankor an progre e pou nou vwar lavenir lo sa size ki ou'n fer resorti.

Me an tou, mon vreman kontan mon anvi osi petet profit SIA ti en keksoz tre nouvo ki nou'n fer fas avek sa landrwa ti danzere, sa ros ti vreman danzere pou zwe avek pou vin fer serten travay. Sa kontrakter osi in annan en bon linite en bon lantant travay.

E mon dir mersi senyer ki nanryen pa'n arive personn pa'n ganny aksidan dan sa travay. Mersi Mr Speaker.

MR SPEAKER

Mersi. Mon ava pran kestyon Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker, parey Bel Ombre i annan en lensidan ros ki kestyon orizinal i demande.

Solman mon anvi demann en kestyon zeneral aköz i annan bann lezot *pending cases* dan diferan distrik enkli Mont Buxton kot ros in deroule.

Mon kestyon ki mon anvi konnen lo kestyon kominikasyon, e *feedback* avek

swa bann lakour ki'n ganny afekte or Lotorite Distrik pou konnen konmsi ki pe fer ouswa ki pou fer ouswa dan ki dele letan ki zot pe fer pou asire ki sa i *ongoing* pou anpese ki dimoun i fristre ouswa mire bann keksoz koumsa.

E an pasan Mr Speaker, mon ti ava kontan swet PS Barbe *happy Birthday*.

(APPLAUSE)

MR SPEAKER

Mersi. Minis, kestyon?

MINISTER

BILLY

RANGASAMY

Mr Speaker, mersi bokou pou donn mon laparol. Mon demann ou permisyon pou mon les CEO Jitesh ki pe direktman *involve* ek sa sityasyon pou donn en leklersisman Onorab Henrie.

MR SPEAKER

CEO, ou annan laparol.

CEO JITESH SHAH

Mersi Mr Speaker. Mersi Onorab pou ou kestyon.

Onorab, mon pou aksepte poudir kekfwa i ennler i en pti pe difisil espesyalman dan sa dernyen 6 mwan zis baze lo kantite nouvo ka ki ti pe rantre tou le *weekend*.

Nou ti pe sey travay avek bann *case* ki deza la pou nou rod solisyon pou nou kapab donn dimoun en solisyon nou ti pe ganny ankor ki ti pe antre enn.

Selman mon krwar dan sa dernyen mwan, mwan edmi keksoz in stabiliz en pti pe plis kot nou vwar poudir kantite lapli tou in redwir nou pa pe resevwar sa volim ka tou le *weekend*.

Akoz malerezman mon pa konnen ki mannyer i marse, selman malerezman i paret lapli i vin zis dan *weekend*.

Selman nou annan en gran lalis *case*. Kontrer lo kote dezas aköz letan lapli nou annan en *inventory of* plis ki 600 *case* depi Desanm lannen pase, ki nou'n rikorde.

Byensir *very* bann diferan degre severite selman i annan 600 *case* e efektifman nou kapab dir i annan 600 dimoun pe esper *feedback* avek nou.

Byensir bann ki en pti pe pli kritik, nou pe angaz en pti pe plis avek sa bann dimoun aköz zot sityasyon i en pti pe pli kritik.

Selman kekfwa vre bann ka ki en pti pe mwen kritik nou kapab dir aköz sityasyon mankman resours kekfwa in en pti pe *challenge*.

Selman nou pe fer en legzersis avek Gouvernman Lokal pou zis fer sir poudir nou *capture* tou keksoz.

Nou annan en levanter lo tou bann *case* devan nou. Kontrer nou annan en *meeting* apre midi ozordi menm zis pou nou *touch base* avek zot pou gete ki bor nou ete avek serten *design*, eksetera.

Ki nou pou fer is kekfwa pandan semenn nou ava konmans angaz avek bann diferan dimoun, pou dir zot ki bor nou'n arive avek zot ka. Kalite lasistans kekfwa ki nou pou kapab donn zot. E kan zot kapab espekte nou kapab vin ed zot.

Byensir parey mon dir i kapab annan serten dimoun kekfwa pou en pti pe dezapwente poudir zot kapab kekfwa pa pe ganny menm kalite latansyon avek lezot.

Selman parey mon'n dir lo nou kote nou bezwen konsyan avek resours ki'n annan nou bezwen get severite bann diferan ka. E si nou pe vwar poudir en ka pe pran presedans *over* en lot ka, i pirman lo en baz teknik ki nou bann teknisyen pe dir nou poudir sa i pli kritik ki lot.

Selman nou ava konmans angaz, avek bann dimoun semenn prosenn ler nou. Nou

vwar nou en pti pe pli annord avek lenformasyon ki nou annan. E pandan sa detrwa semenn ki devan nou, nou pe espekte ki nou kapab donn tou dimoun en larepons ki bor nou ete avek zot *case*. Mersi.

MR SPEAKER

Mersi. Wi, Minis, ou ava azoute?

MINISTER **BILLY RANGASAMY**

Mersi Mr Speaker. Mersi *CEO* pou donn ou bann lesplikasyon. Mon ti ava kontan zis petet avek ou permisyon Mr Speaker, pou partaz en pti pe ki nou pe osi lo sa size kominikasyon.

Ler bann eksper i idantifye sa bann diferan sit dapre zot nivo kritikalite. E enn bann sit ki ti ganny idantifye seryezman kritik se i preski mon'n mont anler laba i preski koumsa i preski apik net.

E nou'n al lo sit ek bann eksper. E resaman mon krwar de semenn pase nou ti rankontre bann zabitan Saint Louis ki zis anba kot sa bann ros in grennen eksetera pou nou eksplik zot ki pe arive pou zot kit zot azour avek sa sityasyon e ki travay ki pe al ganny fer tre byento.

Alor osi i ti en fason pou nou soulaz zot osi zot annan en serten lenkyetid osi pou soulaz zot an menm tan vwar ki Gouvernman pe pran sa size tre seryezman e wi. E sa kordinasyon i reste touzour enportan avek tou bann lazans konsernen. E donn lenformasyon piblik i tre enportan osi.

E sa menm lapros ki nou ti fer Saint Louis, nou anvi fer parey dan tou bann lezot landrwa ki'n ganny afekte parey avek sa bann dezas resaman later deboule eksetera. Mersi bokou Mr Speaker.

MR SPEAKER

Mersi Minis. Bon, nou ava pran poz la, mon ava swet bon depar zofisye ki pe kit nou Mr Steve Mussard, mersi bokou pou ou partisipasyon. Nou ava rebran 11 er. Mersi.

(BREAK)

MR SPEAKER

Bon nou dir bonzour e byenveni Mr Jude Florentine Sekreter Prensipal pour Later. Mr Barbe avek Mr Shah kontinyen avek nou. E avek sa nou a pran kestyon 154 Onorab Georges Romain.

HON GEORGES ROMAIN

Mersi Mr Speaker. Bonzour Minis ek ou delegasyon. Minis, atraver Mr Speaker, mon kestyon i al koumsa; -

An vi ki sa proze pou konstrir 24 lakaz in fini demare dan La Gogue, eski Minis i kapab donn nou detay lo progre sa proze e kan ki nou espekte vwar sa proze ganny delivre? Mersi Mr Speaker.

MR SPEAKER

Mersi Onorab. Minis?

MINISTER**BILLY****RANGASAMY**

Mersi Mr Speaker. Mersi Onorab pou ou kestyon. Mr Speaker, sa proze 24 *unit* La Gogue ki konpri 16 *unit* 3 lasanm e 8 *unit* 2 lasanm, ti komanse an Oktob lannen pase e i ti espekte konplete dan premye kar lannen 2025.

Orizinalman proze ti'n programmen pou konplete an Novanm 2024, me malerezman louvraz in ganny enpakte par move letan e gro lapli kontinyel ki nou ti fer fas avek depi ler proze ti komanse.

An plis, mankman bann materyo *quarry* prensipalman blok apre sa leksplozyon le 7 Desanm i osi enpakte lo sa proze. An se moman travay lo premye blok in fini ariv lo nivo

premye letaz e travay lo fondasyon sa 2 lezot blok pe al komanse dan sa bann semenn ki pe vini.

Malerezman nou pe fer fas ek sa bann menm kontrent lo laplipar lezot nou bann proze nasyonanman me nou pe travay pros avek bann kontrakter pou nou minimiz sa bann lenpak e akseler nou bann louvraz. Mersi Mr Speaker.

MR SPEAKER

Mersi Minis. Onorab Romain siplemanter.

HON GEORGES ROMAIN

Mersi Mr Speaker. Mersi Minis pou ou larepons. Minis, mon'n ekout ou larepons, mwan osi mon'n ganny sans swiv en pti pe sa devlopman, mon ti'n war ti pe byen komanse ti pe al *quite* vit e menm sa kontrakter ti dir nou ki pou fini an Zanvye, sa ki nou ti ganny dir an 2025 ki mwan menm mwan, mon ti war sa i en pe enposib.

Me selman lafason ki mannyer louvraz pe ale vre i pa pe bouz parey nou ti ava kontan, me selman mon ti a kontan Minis si ou ti pou kapab kantmenm ou pa bezwen reponn mwan la, me selman si ou ti kapab koz en pti pe plis ek sa kontrakter pou dir zot bouz en pti pe pli vit, aköz nou

dimoun pe esper zot lakaz e demann i bokou dan Anse Etoile.

Enn mon kestyon siplemanter ki mon ti a kontan demann Minis, eski apard sa proze 24 *unit* ki pe ganny fer la, eski i annan lezot proze ki pou al ler sa enn i fini oubyen kekfwa ki pou komanse tre byento an vi ki mon'n konnen ki i sipoze kapab annan en proze 6 *unit* ki pou komanse bor kot *emergency* La Retraite?

Kekfwa si Minis i kapab donn nou en pti pe plis lenformasyon ki la. Mersi Mr Speaker.

MR SPEAKER

Mersi.

MINISTER **BILLY RANGASAMY**

Mr Speaker mon remersye Onorab pou son kestyon siplemanter. Mon oule zis fer en pti leklersisman petet zis pou fer sa kler.

Orizinalman proze ti konplete an Novanm 2024 e apre bann reazisteman lo tou sa bann konplikasyon ki nou'n fer fas avek, *SIA* in travay kontrakter e zot in donn nou en dat konplasyon pou nou konplet proze dan premye kar 2025, savedir nou pe koz petet Fevriye ou Mars pli tar 2025.

I annan bann travay siplemanter pou nou fer lo sa teren bann miray ki nou bezwen leve. Mon'n al vizit sa *site* mon osi semenn pase i en landrwa ki ase delika kot i konsern bann sistenm drenaz pou *manage* sa delo eksetera sa bann delo lapli ki desann la.

Me tou zefor pe ganny fer pou nou *tighten up monitoring* lo sa proze pou fer sir ki nou *meet* sa *deadline* Mars lannen prosenn.

An sa ki konsern distrik-*sorry* Onorab.

MR SPEAKER

Wi Minis, kontinyen.

MINISTER **BILLY RANGASAMY**

Lezot proze osi touzour nou pe regard bann lezot posibilite bann proze *mid-range condo* menm ki dan rezyon pa neserman ki dan distrik Anse Etoile dan rezyon pou kouver distrik bann aplikan distrik Anse Etoile, pe ganny konsidere tre seryezman.

Nou annan plan osi parey ou'n fer resorti sa bann unit *emergency* i annan travay ki i pe komanse me selman pou le moman i pa dan plan sa lannen mon bezwen al direk lo la i pa dan plan sa lannen.

Me par kont lo Ile Aurore nou annan 4 *unit* siplemanter ki anba konstriksyon ki kapab ed nou deservi bann sityasyon dezans *emergency*.

E nou pe aktivman koman Gouvernman vwar posibilite enn fwa pour tou annan en plan lonterm *design, master plan* e devlopman rezidansyel eksetera, i konplimante par bann devlopman komersyal lo Ile Aurore.

So sa i ava osi ed nou an en program ase balanse, ki ava kapab ed plizyer distrik ki napa later enkli Anse Etoile. Mersi Mr Speaker.

MR SPEAKER

Mersi Minis. Siplemanter Onorab Labrosse.

HON RICHARD LABROSSE

Mersi Mr Speaker. Bonzour Mr Speaker, bonzour Minis ek ou delegasyon.

Minis, ler nou pe koz re devlop- lo sa proze lakaz La Gogue nou konn Minis mon krwar ou bezwen konnen dan tou distrik i annan bann dimoun ki ganny mete parey Plaisance nou an detrwa fanmir ki reste Anse Etoile ki'n ganny abite kot nou.

La mon kapab mazin lafanmir Felicie anler Belvedere ki zot osi zot pe reste dan en

lakaz dezyenm men parey nou dir.

Minis, ki bann travay ki ou Minister pe ganny fer ler i annan bann ka parey ki annan bann zabitan ki sipoze antre dan zot distrik orizinal? Ki travay ki zot fer ansanm avek Lotorite sa distrik kot sa bann zabitan pe an se moman pe reste? Mersi Mr Speaker.

MR SPEAKER

Mersi. Minis?

MINISTER

BILLY

RANGASAMY

Mr Speaker, mon pou demann ou permisyon pou demann *PS Barbe*, ki in annan bokou sa leksperyans istorikman pou petet partaz sa pwennvi epi si i neserer mon ava donn en pti pwen siplemanter.

MR SPEAKER

Tre byen. *PS, yes*.

PS DENIS BARBE

Mersi Mr Speaker. Mersi Onorab pou ou kekyon. Onorab, pou tou distrik nou annan en *housing officer* ki travay e sa bann distrik. Nou konnen parler avek mouvman nou bann zabitan ennler zot bouz dan en lot distrik e zot sipoze reste an kontak avek zot *housing officer* pou nou kapab

planifye pou zot bezwen dan zot distrik ki zot sorti ladan.

Ennler nou annan bann sityasyon kot ler nou bann dimoun in bouze, sirtou ler zot in ganny anrezistre pou vote dan en distrik kot zot in ale nou annan enn de bann pti konplikasyon.

Me selman nou bann *housing officer* i reste an kontak avek zot pou nou kapab gete egzaktaman dan ki distrik ki nou planifye pou zot.

An relasyon ek sa *case* spesifik ki ou'n masyonnen nou an kontak avek distrik Anse Etoile pou nou eksplor solisyon pou bann fanmir Felicie ki'n bouze.

Me selman i ankor bann diskisyon ki *Housing Officer* avek Departman Lakaz pou fer franmezir ki proze pe al lo son faz final.

Solman sa i travay osi ki nou fer i aplik osi pou bann zabitan La Digue ki bouz lo Mahe ouswa Praslin ki bouz lo Mahe, me selman ki zot pa ankor transfer zot distrik savedir nou pou bezwen planifye pou zot dan zot distrik ki zot anrezistre pou vot ladan. *Thank you.*

MR SPEAKER

Mersi. Siplemanter Onorab Cosgrow.

HON WALLACE COSGROW

Mersi Mr Speaker, bonzour Minis ek ou delegasyon. Minis, mon lenformasyon ki mon ti pou kontan rode lo sa proze se ki si ou kapab dir nou kan ki sa proze ti *tender* e lekel sa kontrakter ki lo sa proze aköz i en bon pe bann proze ki pe antreprann par ou Minister i paret mwan pe ganny en kantite retar. Mersi.

MR SPEAKER

Mersi. Minis.

MINISTER

BILLY

RANGASAMY

Mr Speaker, *CEO SIA* i a ede pou eklersi sa pwen pou Onorab.

MR SPEAKER

Mersi *CEO*.

CEO JITESH SHAH

Mersi Mr Speaker. Mersi Onorab. Onorab, mon pou napa bann dat *exact tender* tou keksoz la devan mwan.

Mon ava kapab fer ou ganny sa lenformasyon selman kontrakter ki lo la i *10 key solutions*, byensir prosedir *tender* i annan plizyer *step*, so mon pou napa tou annan dat devan mwan selman mon ava fer ou ganny sa lenformasyon.

MR SPEAKER

Mersi. Wi, ale akoz in kourt.

HON WALLACE COSGROW

Ok mersi. Zis pou mon dir avek *CEO* ki poudir mon'n al depi dernyen *report tender* ziske 2020 mon pa war en sou *tender* sa proze laba. Mersi bokou si zot kapab donn nou sa lenformasyon apre.

MR SPEAKER

Mersi. Bon, vi ki nou'n ase kourt lo la mon a *squeeze* enn ankor kestyon. Onorab Pillay ou siplemanter.

HON SEBASTIEN PILLAY

Mersi Mr Speaker. Mr Speaker, dan larepons ki Minis in donnen in koz lo bann retar e bann konplikasyon ki zot pe gannyen.

Mon prezimen eski sa konplikasyon i annan pou fer ek materyo konstriksiyon dan pei ki savedir i annan en problemn parey mon ti anmenn kestyon devan Lasanble?

Be ki zot pe fer, vi ki zot annan sitan proze Gouvernman ki pe pran retar aköz sa sityasyon ki zot pe fer pou adres sa bann problemn, pou fer ki bann kou sa bann proze pli i dele pli sa bann kou pa monte zisteman parey sa proze ki pe

tonm an relasyon ek kestyon ki'n ganny demande. Mersi Mr Speaker.

MR SPEAKER

Mersi. Minis?

MINISTER**BILLY****RANGASAMY**

Ok, Mr Speaker, *CEO* Jitesh ti pe travay etrwatman lo sa size mon a donn li laparol avek ou permisyon.

MR SPEAKER

CEO, wi.

CEO JITESH SHAH

Mersi Mr Speaker. Mersi Onorab. Onorab, byensir mon krwar parey in al enpakte en pti pe partou dan lendistri konstriksiyon, enkli bann proze prive in annan en lenpak lo bann proze nasyonal bann proze Gouvernman ki pe ganny fer.

E lakaz byensir bann kalite materyo ki ganny servi dan nou bann lakaz i sertenman en keksoz ki'n enpakte lo nou.

Selman lo nou par lo en nivo teknik, byensir nou form parti tou bann diskisyon ki pou ganny fer ant Minister Finans oubyen bann lezot Departman Gouvernman, pou get solisyon

nasyonal lo sityasyon bann *quarry*.

Selman sa ki en pti pe plis dan nou kontrol pou nou fer, i kontiny sa langazman avek sa bann kontrakter sey rode ki manner nou kapab rod fason pou donn zot serten louvraz pou zot kapab fer war i annan en mankman serten materyo spesifik lo sa proze.

Ki manner nou kapab koz avek bann UCPS anfe pou le moman, san enpakte lo sa *supply* ki zot pe donn larestan marse, sey fasilite serten konversasyon ant kontrakter avek UCPS pou gete ki manner zot kapab ganny akse avek sa bann materyo; konpran en pti pe plis bann kontrent ki UCPS i annan pou nou kapab gete ki manner nou kapab ganny akse avek sa bann proze.

Selman parey mon'n dir i touzour avek lentansyon, pou fer sir poudir nou pa pe annan en lenpak lo bann lezot proze lo *private market*.

Lo kote lenpak kou, definitivman sa i en keksoz ki pe ganny konsidere koman anba kontra en fors mazer so i pou annan definitivman en lenpak lo kote letan lo proze.

Selman nou pe tafya avek ban kontrakter pou fer sir poudir napa en *cost implication* ki vin avek en pti pe parey ler

nou ganny gro lapli, bann letan ki pa favorab nou donn en letan pou kontrakter *catch up* avek son louvraz san neserman *entertain* okenn *additional cost* ki vini lo sa proze.

Saying that Onorab, mon krwar parey mon'n dir sa bout konversasyon avek kontrakter i pli kritik dan tou. Nou bann kontrakter tou i konpran poudir i an en sityasyon ki pei an antye ti pe fer fas avek.

I en sityasyon ki pe stabiliz en kantite la, sa bann retar i bann retar ki nou vin vwar kekfwa nou kapab dir premye 4 mwan sa lannen. Selman sa akse avek materyo pli ale pe vin *less of an issue now*.

Lo nou bann proze mon kapab koz lo sa enn La Gogue, mon fek fer konversasyon avek kontrakter semenn pase e zot pe ganny akse ek bann materyo ki zot bezwen pou zot akselere.

E la prezan i reste pou nou asiz avek zot pou nou kapab gete ki manner kapab *make up for* okenn *loss time* ki nou'n gannyen lo sa proze. Mersi.

MR SPEAKER

Mersi. Mon krwar kestyon orizinal in byen ganny reponn, nou pe elarzi lo lezot soz, so permet mwan bouz lo lezot kestyon. Kestyon 155 ki lo non

Onorab Woodcock me se Onorab Doyace Porice ki pou poz son kestyon.

HON DOYACE PORICE

Mersi Mr Speaker. Mr Speaker, Minis avek ou delegasyon e tou bann Manm Onorab, bonzour. Kestyon 155 Onorab Wavel Woodcock Manm Elekte pou Grand Anse Praslin i lir koumsa; -

Eski Minis i kapab enform Lasanble kan ki proze 8 *unit* Mont Plaisir Praslin pou komanse e kan ki sa proze i sipoze konplete? Mersi.

MR SPEAKER

Mersi. Minis?

MINISTER **BILLY**
RANGASAMY

Mersi Mr Speaker e mersi Onorab pou ou kestyon. Mr Speaker, mon ti a kontan enform Onorab e tou zabitan Mont Plaisir Grand Anse Praslin ki kontra pou sa proze in fini sinyen e nou dan faz pou demar sa proze.

Kontrakter pe fer le neseler pou li mobilize le 01 Zilyet 2024 sa i dat komansman kontra dapre kontra. Nou'n ganny en pe *challenge* e ki sa proze e nou bezwen travay ek *PUC* pou nou kapab tir en laliny elektrik me lo sa sit, sa in fini

konplete e aprezan nou, pou nou kapab demar konstriksyon sa proze ki tre enportan.

Proze li menm in enn ki sipoze pran 8 mwan e savedir ki nou espekte konplet anviron Fevriye 2025 si tou i mars dapre nou kan e nou pa ganny enpakte avek move letan.

Mr Speaker, sa sit i enn ki vremen konplike e nou pe fer tou le neseler avek lagras Bondye, pou konplet sa proze dapre nou program, pou nou ed sa bann zabitan merite Mont Plaisir Grand Anse Praslin ki pe espere pou plizyer lannen.

Byensir nou pou kit Lotorite Distrik ki ou menm Onorab e bann dimoun konsernen azour lo proze pandan son dirasyon. Mersi Mr Speaker.

MR SPEAKER

Mersi Minis. Onorab, ou annan siplemanter lo par Onorab Woodcock.

HON DOYACE PORICE

Wi Mr Speaker. Vi ki Minis in fini reponn premye porsyon son siplemanter, son dezyenm se lekel sa kontrakter ki'n ganny *awarded tender* pou sa proze? Mersi.

MR SPEAKER

Mersi. Minis, repons?

MINISTER **BILLY**
RANGASAMY

Mersi Mr Speaker. Mersi Onorab. Kontrakter ki'n ganny *award* sak kontra se *Allied Builders* e apre ki nou'n fer tou bann analiz neserer teknikman zot annan sa lekspertiz e nou parey mon'n fer resorti sa sit i en pe konplike.

So alors nou'n fer sir ki nou annan en bon kontrakter ki teknikman kapab delivre sa proze dan sa dele letan ki nou'n donn li. Mersi Mr Speaker.

MR SPEAKER

Mersi. Onorab Pillay, ou annan kestyon.

HON SEBASTIEN PILLAY

Mersi Mr Speaker, mon ti a kontan ganny en reasiran avek Minis atraver ou.

Eski Minis i kapab dir nou i a fer dezyenm proze la ki ou pe nonm nou ki pou fini 2025, eski bann proze pe ganny dir pou fini 2025 akoz 2025 i lannen eleksyon, ki finalman zot Gouvernman pe al sey montre in fer e keksoz kan i pa ankor fer naryen? Mersi Mr Speaker.

MR SPEAKER

Mersi. Minis, ou repons?

MINISTER **BILLY**
RANGASAMY

Mon reponn direk Onorab. Mersi Mr Speaker, mersi Onorab.

Se nou'n toultan anons sa bann proze an dan nou program. I pa naryen pou fer ek eleksyon nou pe debrouye nou pe ed bann zabitan ki'n espere pou en pake letan.

E osi firamezir ki Finans i permet nou pe egzekit sa bann proze. Mersi Mr Speaker.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Bonzour Minis ek ou delegasyon. Mr Speaker, mon ti a kontan demann Minis si i annan sa lenformasyon ki la ki bann lezot proze lakaz ki pou fini sa enn pou konplete sa lannen boner lannen, prosen pou piblik laba deor konnen. Mersi.

MR SPEAKER

Mersi. Minis eski nou kapab fer sa en pe bref? Onorab ou'n ouver en long kestyon la li i pa strikteman lo sa ki soz, me selman nou *extend* li me selman mon a zis demann Minis pou al en pe vitman lo la.

MINISTER **BILLY**
RANGASAMY

Mersi Mr Speaker. I en bon kestyon nou ava profit sa lokasyon *CEO* Jitesh Shah a kote mon la i annan tou sa lenformasyon lo son *computer* i a partaz sa bann lenformasyon avek nou.

MR SPEAKER
CEO?

CEO JITESH SHAH

Mersi Mr Speaker. Mersi Onorab. Zis brefman pou mon pa lo lalis vitman.

Nou annan 6 *unit* pou sa lannen, nou annan 6 *unit* Forêt Noire/Port Glaud, 24 *unit* Perseverance, 16 *unit* Corgate Estate, 16 *unit* Waterloo St Louis, 16 *unit*, Anse Francois, Pointe Larue e 12 *unit* e Ex-Ferrari Glacis ki espekte konplete sa lannen.

Lannen prosenn nou annan 24 *unit* La Gogue, 16 *unit* *Ex Hunt*, 8 *unit* Mont Plaisir Grand Anse Praslin nou fek koz lo la, 24 *unit* Anse Boileau *Ex Zelia* e 24 *unit* faz 2 Cascade ki anba konstriksyon.

Sa i prensipalman bann poze lakaz ki dan *local funding* ki nou annan en pti pe plis kontrol lo la epi nou an ankor 172 *unit* anba *Saudi* e li pour le moman nou dan faz

lekspresyon lentere ki li lanmwaye i espekte konplete lannen prosenn e son lot bout son lannen answit. Mersi.

MR SPEAKER

Mersi. Onorab Andre wi, ou kestyon.

HON CLIFFORD ANDRE

Mersi Minis. Mon kestyon i baze lo repons ki *CEO* in donner en pti kou la.

Mon ti'n koz avek Minis avan mon tann sa zafer *Saudi Fund*, eski i annan garanti ki Anse Aux Pins pou ganny son 32 *unit* anba *Saudi Fund* lannen prosenn? Mersi.

MR SPEAKER

Mersi. Minis, *CEO* ki pou reponn? Wi?

MINISTER **BILLY**
RANGASAMY

Wi, mon a les *CEO* reponn.

CEO JITESH SHAH

Mersi Mr Speaker. Mersi Onorab. Onorab, sa proze 32 *unit* Anse Aux Pins i dan sa 172 *unit* anba *Saudi* ki pou le moman i lo *expression of interest*.

MR SPEAKER

Thank you. Bon, mon krwar nou'n ase byen adres size

Praslin. *Ok* nou ankor lo nou lo 156 prezan e nou ankor avek menm delegasyon menm zofisyè. 156 i dan non Onorab Andy Labonte ou kestyon.

HON ANDY LABONTE

Mersi Mr Speaker. Kestyon 156 i lir koumsa; -

Eski Minis i kapab dir sa Lasanble e pli enportan reasir ban profesyonnel avek zot fanmir ki reste dan *Condominium* Chateau Vallon Union Vale ki tre byento atraver son Minister zot pou kapab finalman konklir en Lakor pou rektifye bann fot konstriksyon sa bann batiman depi ki i egziste e depi ki zabitan in antre ladan? Mersi.

MR SPEAKER

Mersi. Minis?

MINISTER **BILLY RANGASAMY**

Mersi Mr Speaker. Mersi Onorab pou ou kestyon. Mr Speaker, parey Onorab i konnen sa *housing estate* in ganny konstrir dan bann lannen 2008 e pour plizyer lannen nou'n rankontre plizyer problemn.

Ozordi nou kapab konstata ki louvraz pli mazer ki reste pou fer Chateau Vallon louvraz pli mazer konmsi pli an

detay se konstriksyon sa miray lo balizaz obor sa *housing estate* pou donn li son sekirite nesese.

Malerezman nou'n ganny pa mal difikilte pou ganny tou bann dokiman nesese enkli *wayleave* enkli bann propriyeter prive. Osi bann zabitan pou nou swiv prosedir apropiye e soumet kot lotorite plan.

Erezman sa in fini regle, finalman e nou dan prosedir final pou bann dokimantasyon pou nou kapab *tender* sa proze tre byento.

Mon kontan pou enform Lasanble ki serten lezot louvraz in fini konplete parey bann problemn twatir koule, problemn karya e mazorite bann problemn beton dekoke.

I ankor reste end e louvraz pou fer parey bann lafnet kot bann *sills* pa pe mars byen ki fer ki delo i antre dan bann unit dan serten landrwa dan letan gro lapli.

Fodre pa ki nou bliye ki tou sa bann apartman *condominium* i prive e in fini ganny vann avek bann zabitan. I osi ankor annan enn unit ki annan problemn beton dekoke ki nou pe adrese dan sa bann mwan ki devan nou an 2024.

Mr Speaker, Onorab Labonte e *DA* pe touzour

kontinyelman pou se pou regle sa bann problem e nou'n menm fer ban rankont lo sit avek bann zabitan.

Mon'n donn lenstriksyon mon lekor, pou nou konplet tou louvraz avan lafen lannen 2024 enn fwa pour tou. Mersi Mr Speaker.

MR SPEAKER

Mersi. Onorab Labonte, siplemanter?

HON ANDY LABONTE

Mersi Minis pou ou larepons pou reasir bann zabitan kot *condominium*. Vi ki nou komen ki sa miray ti deza dan plan orizinal Minis me selman pa'n zanmen ganny fer avek ladministrasyon oparavan. So ou pe donn nou konfirmasyon ki avan lannen i terminen sa miray pou ganny konstrir?

Aprè mon dezyenm kestyon, i plizoumwèn konsernan miting ki bann zabitan ti pe demande an relasyon avek sa bann travay petet kan zot pe mazin pou kapab annan sa *meeting* avek bann zabitan? Mersi.

MR SPEAKER

Mersi. Minis?

MINISTER
RANGASAMY

BILLY

Mersi Mr Speaker. Mersi Onorab. Onorab, wi, i korek ki sa miray pou konplete avan lafen lannen 2024, en fwa pour tou parey mon'n dir i en keksoz ki ti la depi lo komansman nou anvi fini li.

Dezyenmman, mon'n an konversasyon avek SIA se annou ganny byen kler nou bann *scope of works*, bann travay ki pou finalize pou tou lede kote i byen kler kwa ki pe ganny fer e kwa ki pou ganny fer e kan.

So alors pou tou dimoun akoz nou bezwen ganny permisyon pou antre dan bann *unit* eksetera.

So nou anvi ganny sa *scope* epi nou ava kapab fer sa miting nou ava planifye sa miting tre byento, dan 2 mwan *CEO* nou kapab fer, *within the next month* dan mwan Zilyet si i posib nou a fer sa *meeting* avek bann zabitan. Mersi Mr Speaker.

MR SPEAKER

Mersi Minis. Nou a kapab avans lo kestyon 157, Onorab Doyace Porice.

HON DOYACE PORICE

Mersi Mr Speaker. Kestyon 157 i lir koumsa; -

An vi ki Baie Sainte Anne Praslin i annan bokou demann

pou lakaz, eski Minis i kapab donn Lasanble plan son Minister pou konstrir lozman, pou ki zabitan ki lo lalis i a kapab ganny *allocate* avek en lozman? Mersi.

MR SPEAKER

Mersi Onorab. Minis, repons?

MINISTER **BILLY RANGASAMY**

Mersi Mr Speaker e mersi Onorab pou ou kestyon. Mr Speaker ozordi nou annan an total 40 aplikan aktiv lo lalis lakaz afordab Baie Sainte Anne.

26 zabitan pe osi esper zot proze *mid-range condo* e 4 ki pe esper en *condominium*. An sa ki konsern bann proze ki nou'n planifye pou Baie Sainte Anne i annan 4 *unit* transit ki nou pe planifye pou konstrir pou 2025 e 16 *unit* Marie Jeanne Estate faz 3 parey in fer resorti pli boner anba *Saudi Fund* an 2025.

An plis ki sa Mr Speaker nou'n fini idantifye 2 sit kot nou anvizaze konstrir nou proze *mid-range condo* sa lannen menm.

Nou determinen pou delivre bann nouvo proze lakaz pou distrik Baie Sainte Anne o pli vit posib e sa i reste nou priyorite firamezir ki nou finans i permet parey nou'n fer resorti

Saudi tou keksoz pe mars dan bon direksyon.

So nou annan lespwar tou bann travay teknik in fini konplete e nou annan lespwar ki nou a kapab debrouye e egzekut sa bann proze o pli vit posib. Mersi Mr Speaker.

MR SPEAKER

Mersi Minis. Siplemanter Onorab?

HON DOYACE PORICE

Wi, Minis eski i annan en dyalog avek sa bann zabitan, pou lezot alternativ ki'n annan dan ou Minister, pou zot pa esper pou plis lannen ankor? Ki dernyen fwa Baie Sainte Anne in ganny en proze lakaz? Mersi.

MR SPEAKER

Mersi. Minis?

MINISTER **BILLY RANGASAMY**

Mersi Mr Speaker. Mr Speaker, letan mon ti pe fer sa analiz mwan osi boner mon ti vwar ki dernyen fwa Baie Sainte Anne ti ganny en proze ti 2017.

E alor se sa ki mon fer en pe dyalog avek mon lofis pou tou sa bann distrik ki pa ti'n ganny lakaz par egzantp Glacis ti enn, Mont Buxton i lot. Nou pe get tou sa bann landrwa pou

nou fer sir nou kapab met en proze lakaz ater o pli vit posibil.

E wi, i annan bann alternativ ki nou toultan vwar par egzanp nou bann kliyan ki ti lo *social housing* ki'n *migrate* zot laplikasyon pou *mid-range condo*, parske i bann proze ki nou kapab pe lanse o pli vit posibil pou donn zot, zot solisyon lakaz.

So sa i touzour bann konversasyon ki nou'n fer. E parey nou'n dir bann alternativ ki annan kot i an en pti bout later a kote paran, ki kapab ede soulaz sa sityasyon nou pe pran sa osi konsiderasyon Departman Later pe travay lo la. Mersi Mr Speaker.

MR SPEAKER

Mersi. Wi, Onorab, vi ki'n nou ankor annan letan lo sa kestyon mon pou les ou azoute.

HON DOYACE PORICE

Minis, mon pou dir ou mersi. Mersi pou sa bann larepons ki mon kestyon e osi kestyon Onorab Woodcock. Mersi.

MR SPEAKER

Bon, Onorab Gill ti annan en kestyon lo la, wi siplemanter.

HON CHURCHILL GILL

Wi baze lo ou larepons Minis. Eski sa alokasyon ki ou pe dir

2017 i sa proze 24/24 ki ti ganny *allocate* ki ou pe dir ki i annan lezot distrik ki'n bouz pou 2025 pou konplete? Mersi.

MR SPEAKER

Mersi.

MINISTER

BILLY

RANGASAMY

Mr Speaker, nou ti pe sey konpran kestyon Onorab Gill, petet si ou pa *mind* Onorab ed nou silvouple.

HON CHURCHILL GILL

Kestyon i tre senp eski sa alokasyon ki ou dir in fer an 2017 i sa proze 24/24 pou distrik Baie Sainte Anne ki ti fer alokasyon ki i annan lezot distrik ki ou dir 2025 ki pou konplete? Mersi.

MR SPEAKER

Wi mon krwar konfizyon se sa 2 bout ki ou'n zwenn ansanm, premye Minis mon krwar in demande si sa 2027 ti sa proze 24/24 ou kapab reponn lo la.

MINISTER

BILLY

RANGASAMY

Mersi Mr Speaker. Mersi Onorab. Onorab, wi, 2017 ti sa 24/24 *Ex-Marie Jeanne phase 2* e la nou pe al lo sa lot proze ki mon'n mansyonnen boner ki nou pe *tackle* anba sa *Saudi*

Fund i faz 3 Ex-Marie Jeanne.
Sa i lot letap proze.

E Mr Speaker, *PS Jude* ti pe alert mwan ki i ti annan en pti pwen ki i ti oule fer sorti avek ou permisyon.

MR SPEAKER

Tre byen.

PS JUDE FLORENTINE

Mersi Mr Speaker. Mersi Onorab pou sa kestyon. Mwan mon ti oule fer en pti remark as *regards* sa kantite dimoun ki'n fer aplikasyon aktiv dan Baie Sainte Anne en, nou war ki i annan zis 40. I annan plis dimoun ki'n *apply* pou lakaz dan Baie Sainte Anne *I'm sure*, me selman problem se ki zot pa pe fer kontribisyon *HSS*.

So nou pa pe get zot koman bann dimoun aktiv, se sa ki ou war sa pti sonm nou'n gannyen dan sa larepons, en. E nou pe profit lokazyon pou ankouraz bann dimoun fer zot kontribisyon aktiv, serye, pour ki zot kapab *achieve* zot target ki nou'n dir *as from going forward* as 10 poursan lavalè sa lakaz, pou zot kapab ganny prioritize a lavenir. Mersi Mr Speaker.

MR SPEAKER

Ou lo sa size Onorab? Wi, *ok*, ou a ganny letan.

HON SEBASTIEN PILLAY

Mersi Mr Speaker. Mr Speaker, *PS Florentine* in reponn en pti bout mon kestyon. Mon'n war li en pe bizar ki sa kantite aplikan i sa pti git aplikan.

Be an relasyon avek Baie Sainte Anne, eski Minister pe ofer zis- eski bann proze ki pe ganny ofer i zis bann proze ki *social housing* oubyen eski zot pou ofer lezot prodwi pou bann zabitan Praslin parey bann zabitan Mahe?

Well, Mont Buxton pa pe gannyen, me selman bann lezot zabitan Mahe, zot osi ki bann zabitan Praslin i a ganny ofer serten prodwi parey, parey *mid-range condos* bann keksoz koumsa, eski zot pe konsider ofer osi bann prodwi parey Baie Sainte Anne Praslin? Mersi Mr Speaker.

MR SPEAKER

Mersi. Minis.

MINISTER **BILLY**
RANGASAMY

Mr Speaker, mon krwar dan mon larepons mon ti'n fer sa pwen, mon dir nou annan 2-nou'n anvizaze lans, nou annan 2 sit ki nou'n idantifye pou nou lans nou bann proze *mid-range condo* e annefe mon'n menm pouse ki nou pou demar zot sa

lannen. So wi, i annan alternativ.

MR SPEAKER

Mersi Minis.

MINISTER **BILLY**
RANGASAMY

Mr Speaker, zis dan mon larepons osi mon ti fer resorti ki i annan 40 aplikan ariv lo lalis afordab e i annan 26 aplikan ki pe espere pou *mid-range condo*.

MR SPEAKER

Tre byen. Mon krwar in le moman pou en sanzman dan delegasyon pou sa 158 ek 159.

Nou annan Mr Denis Barbe, Mr Jitesh Shah e Mrs Angela Servina. Donk, nou dir orevwar Mr Jude Florentine *PS* pou Later mersi bokou pou ou partisipasyon. E madanm raporter i ava apel Mrs Angela Servina.

Mersi Mrs Servina pou zwenn nou pou kontinyasyon kestyon e ou la pou sa 2 ki devan nou. Premye i 158 Onorab Egbert Aglae.

HON EGBERT AGLAE

Mersi Mr Speaker. Mon a dir bonzour Minis ek *PS*, *CEO*, le 2 *CEO*. Kestyon i *comme swivan*; -

Eski Minis i kapab dir ek sa Lasanble si i an okenn negosyasyon ek propriyeter

later prive ki tonm dan rezerv Port Glaud? Mersi.

MR SPEAKER

Mersi. Minis.

MINISTER **BILLY**
RANGASAMY

Mersi Mr Speaker e mersi Onorab pou ou kestyon. Larepons direk Onorab se non, napa okenn negosyasyon ki mon Minister in antreprann avek propriyeter later prive ki tonm dan rezerv Port Glaud pandan ki'n mon'n pran lofis.

Me par kont, an vi ki nou'n met bokou lanfaz lo laspe konservasyon lanvironnman, mon Minister in fer plizyer konversasyon avek serten bann propriyeter ki'n pros nou e nou'n travay ek zot pou nou konpran zot sityasyon, pou nou analiz sa bann teren an partikilye me i plis en konversasyon.

A lentern touzour nou pe fer serten deliberasyon avek bann lazans konsernen, pou regarde si i annan bann opsyon lo sa size tre delika. Mersi Mr Speaker.

MR SPEAKER

Mersi. Onorab, ou siplemanter.

HON EGBERT AGLAE

Mersi Minis pou ou larepons. Minis, mon ti a kontan konnen petet ki direksyon ou Gouvernman i anvizaze pran fas a bann demann, an vi ki nou annan en kontrent later e sa bann dimoun ki annan en later ki tonm dan rezerv ki pa pe kapab fer devlope e ki zot annan zot bann fanmir ki ti a kontan ganny en bout sa bann later e ki zot kapab gannyen, me petet kapab devlope.

Petet ki pozisyon Gouvernman lo kote diskisyon pou kapab gete *how* fezab i été, pou zot kapab osi annan bann petet bann lesanz ki kapab ganny fer?

E dezyenmman Minis, mon ti a kontan petet demann ou si ou okouran poudir i annan serten endividi ki'n fer en demann pou lesanz later e ki'n ganny agree e ki'n ganny later in fer lesanz.

Eski nou pe tret tou dimoun parey la akoz i annan en *parcel* J4403 ki'n in fer lesanz ek en B36, mon pa anvi nonm non person la, me selman i en gran propriyete later so mon ti a kontan petet si nou pou tret serten dan sa fason, lezot osi i kapab ganny konsidere dan menm laliny e menm mezir? Mersi.

MR SPEAKER

Mersi Onorab. Minis, repons?

MINISTER **BILLY**
RANGASAMY

Mr Speaker, avek ou permisyon mon pou demann *PS* Later ed nou klarifye sa bann pwen ki Onorab in fer resorti an menm tan eklersi nou pozisyon lo sa size. Mersi bokou.

MR SPEAKER

Mersi. *PS*.

PS DENIS BARBE

Mersi Mr Speaker. Mersi Onorab pou ou kestyon. An term mon a pran ou dernyen *quarry* apre mon al lo sa *issue* diskisyon.

B36 i pa tonm dan rezerv Onorab, ler nou pou get balizaz rezerv nasyonal sa *parcel* i tonm an deor, sa i baze lo revizyon ki balizaz rezervasyon ti ganny fer en pe letan pase, so Gouvernman in antreprann sa lesanz baze lo en tranzaksyon ki ti kontinyen depi oparavan.

An term direksyon ki nou pe bouz ladan nou pe get en melanz kot baze lo nou pe get kantite later prive ki dan rezerv avek siperfisye later, nou pe konstate poudir si nou pe fer lesanz later pou later, i pou vin en konplikasyon deza kot nou an en pti pe resours en pti pe limite.

So nou pe get bann diferan kalite lapros ki nou kapab vin avek tel ki kalite devlopman ki lanvironnman i pou kapab permet bann dimoun fer lo zot later avek serten *guideline* an menm tan avek Lotorite Plan.

E si i annan serten benefis anvironnman ki kekwfa nou kapab *offset* kapab la son bann dimoun osi benefisyen. Sa i dezyenm.

E si i annan bann pti *area* bann pti siperfisi ki en pe ptipti ki annan konplikasyon, petet Gouvernman i ava antre dan lesanz. Me selman Onorab i annan travay ki nou pe fer - mon krwar mon deza dir sa dan Lasanble boner sa lannen, ansanm avek Minister Lanvironnman, akoz i en travay konzwent pou nou vin avek en *policy paper* pou nou kapab dir ek Gouvernman lala bann alternativ e donn nou zot gidans pou anmenn nou pou bouz devan.

So nou koz angaze pou nou kapab finaliz sa travay. E sa ki nou dir la i zis enn de bann pti nide *top plan* ki nou pe apros sa problem i kapab annan en pti pe plis detay ler nou fini finaliz sa travay. *Thank you.*

MR SPEAKER

Mersi. Mon a pran kekyon Onorab Henrie.

HON EGBERT AGLAE

(Off-Mic)

MR SPEAKER

Oule en pti klarifikasyon? Bon nou a pran otan ki nou annan letan, ale.

HON EGBERT AGLAE

Vitman, vitman. *PS* petet ka eski zot pe mazine pou vin avek sa *position paper* e eski la i bon nou prepare eski la i annan en travay ki pe fer pou anmas tou sa bann kare ki tonm dan rezerv ki'n osi annan demann?

Si distrik i pare pou ede nou osi nou'n pare pou ede avek serten lenformasyon eski sa travay preliminar pe ganny fer *ongoing* la ki ler *position paper* in pare nou konnen i annan en desizyon ki kapab ganny pran? Mersi.

MR SPEAKER

Mersi. Minis, oubyen *PS*.

PS DENIS BARBE

Nou'n deza fer en pti miting preliminar avek tou lede Minis Konsernen Later avek Lanvironnman e nou'n deza fer en *meeting* preliminar avek *PS* Lanvironnman zis pou nou tonm dakor lo *way forward*.

So i annan en pe travay ki li i pe fer pou get en pti pe bann *asset* biolojik lo kote lanvironnman lo kote kot nou, nou pe fer nou levanter tou ban later ki tonm dan rezerv prive Gouvernman ki groser, ki *size*. Dan en fason ki ler nou pe zwenn pou nou kapab fer sa bann diskisyon, nou pe pran konsiderasyon tou sa ban fe.

E nou santi poudir *towards the back end of* trwazyenm kar lannen, nou kapab annan en *position paper* pou nou kapab *go back* lo Gouvernman.

Byensir si pou annan en proses konsiltasyon avek Lotorite Distrik ki sa bann propriyete i tonm ladan osi, nou kapab met zot dan konversasyon an preparasyon sa *policy paper*. *Thank you*.

MR SPEAKER

Mersi. Onorab Henrie, ou kestyon.

HON GERVAIS HENRIE

Mersi Mr Speaker. Ankor enn fwa bonzour tou dimoun. Mr Speaker, dan son larepons *PS Barbe* in koz lo revizyon ki'n annan lo kestyon rezerv Port Glaud.

Sa ki mon anvi konnen se ki si i annan en konversasyon kontinyel en kominikasyon

regilye avek Lotorite Distrik lo litalizasyon later bann distrik, son plan ban landrwa ki annan rezerv, pou permet Lotorite distrik konnen kan ki bann balizaz i sanze, kan bann keksoz koumsa, eski i annan sa kominikasyon ouswa kontak kontinyel? Mersi.

MR SPEAKER

Mersi. Minis ou a diriz *panel*.

MINISTER

BILLY

RANGASAMY

Mr Speaker, *sorry* mon ava demann avek ou permisyon *CEO Planning* pou eklersi lo sa pwen lo size itilizasyon later e si i annan lezot nou ava azout avek.

MR SPEAKER

Tre byen. *CEO*.

CEO ANGELA SERVINA

Mersi Minister. Mersi Mr Speaker, Onorab pou ou kestyon.

Definitivman nou pe kontinyelman fer bann konversasyon kontinyel avek distrik, akoz an mezir ki nou pe fer revi bann plan litalizasyon later e plan devlopman i annan bann nouvo lenformasyon ouswa bann nouvo statistik ki vin a nou laporte e definitivman nou bezwen retourn ver distrik.

Pou ou bann group spesifik dan distrik kot nou bezwen refer bann konversasyon, nou ti fer en rankont Mont Buxton wi mon rapel ou ti la, Port Glaud nou pa ankor fer me selman nou dan travay anmas lenformasyon la a sa staz.

So i vin dan diferan staz e definitivman nou retourn ver distrik pou klarifikasyon pou serten pwen konsern a tou moman. So wi, i en keksoz ki kontinyel tou moman. Mersi.

MR SPEAKER

Mersi. Wi, Onorab Pillay.

HON SEBASTIEN PILLAY

Mersi Mr Speaker. Mr Speaker, sa size later dan rezerv in toultan en size kontan siv pou ban endividi prenon kont lartik 26 Konstitisyon ,me osi re derogasyon anba konstitisyon ki koz dan lentere protez labote natirel eksetera.

Resaman Minis ou ti fer, pa resaman me en pe letan ou ti fer en *statement* lo bann aplikan, ki ti'n demann konpansasyon vizavi later ki ti'n ganny *acquire* e i posib ki ti annan later osi ki'n ganny ete dan rezerv ki sa bann aplikan pa anvi.

Eski dan sa 51 aplikan ki ou ti mansyonnen, eski ladan i

annan okenn dimoun annan later dan rezerv ki ou, ou'n fer prononsman ki pou annan en konpansasyon *or return or exchange in way of* an relasyon ek zot later?

Akoz si i annan, *then* mon pou war li en pe drol ki dan sa 51 aplikan i annan enn ki dan rezerv ou pe fer sa laranzman, me pou lezot dimoun napa menm laranzman. Mersi Mr Speaker.

MR SPEAKER

Mersi. Minis?

MINISTER

BILLY

RANGASAMY

Mr Speaker, mon a demann *PS* Barbe pou ed mwan reponn sa kestyon direkteman Onorab, epi mwan si fodre mon azout en pe mon ava konsidere, avek ou permisyon.

MR SPEAKER

PS ou a pran laparol.

PS DENIS BARBE

Thank you Mr Speaker. Onorab, mersi pou ou kestyon. Sa 51 ka ki Minis ti mansyonnen dan son dernyen lenvansyon i annan pou fer avek sa *scheme* retourn later *undeveloped land* e par kont i annan en pe propriyete ki pou tonm dan sa rezerv ki nou pou retournen.

I napa en konpansasyon *per say* ek Gouvernman pou don li anba sa *scheme* Minis i donn byen detay lo sa *scheme* mannyer i pou egzekite, se pour sa ki nou pe pran li pa par pa nou pe dil avek sa konponan *scheme* ler i pe avanse nou pe bouz lo lot pou nou kapab fer sir ki tou bann louvraz i anlinyen avek kanmarad. *Thank you.*

MR SPEAKER

Onorab Pillay, en klarifikasyon lo ou kestyon si i annan silvouple.

HON SEBASTIEN PILLAY

Reasire Mr Speaker ki i lo sa kestyon. Mon ti a kontan demann Minis ki mannyer ou decide ant le 2, ki ou annan en konversasyon in ganny fer ki parmi sa 51 dimoun ou annan dimoun ki ou'n fini pe angaz zot dan konversasyon, pou retourn zot later.

Me sa kestyon in demann ou pou lezot dimoun ki kalite konversasyon ki ou pe fer?

So mon ti a kontan konnen ki mezir ou pe met an plas, pou fer ki ou pa kre en distorsyon dan lapros ki ou pe pran, prenon kont ki ou'n fini donn sa 51 parmi sa 51 sa bann dimoun ki zot later i dan rezerv serten langazman, be prezan ou

annan lezot dimoun ki Onorab parey pe demann kestyon ki pa'n gannyen en menm langazman? Mersi Mr Speaker.

MR SPEAKER

Mersi. Minis, nou a termin lo la. *PS* i pare.

PS DENIS BARBE

Mr Speaker, kestyon i ti pe demann nou si i annan okenn negosyasyon. Nou pa'n dir li nou e fer negosyasyon nou pe dyaloge. Tandis ki *scheme of return* i diferan.

So nou pa pou konfiz le 2 Onorab. Negosyasyon i en keksoz formel ki nou pe fer - oule en zafer pou an *return* pou en lot zafer *scheme* in byen detaye egzaktaman ki mannyer lapros *scheme* in vini. So dan pou reponn kestyon Onorab nou pa pe fer okenn ... formel.

Me selman nou'n fer diskisyon avek bann diferan *private owners* pou nou konpran en pti pe egzaktaman zot sityasyon. E sa osi in permet nou pou konnen ki lapros ki nou pou pran an term gidans avek en *policy paper* avek Gouvernman. *Thank you.*

MR SPEAKER

Mersi. Nou avans lo kestyon 159 ki dan non Onorab Philip Arissol.

HON PHILIP ARISSOL

Mersi Mr Speaker. Bonzour tou dimoun. Kestyon 159 i lir koumsa; -

Eski Minis i kapab eksplik Lasanble ki prosedir ki i annan an plas pou asire ki *Planning Authority* i espekte propriyete prive, avan ki lotorizasyon konstriksyon i ganny akorde, pou anpes blokaz atraver *right of way* pou protez akse semen pou lezot propriyeter prive e asir planifikasyon efikas itilizasyon later dan sa prosesis? Mersi.

MR SPEAKER

Mersi Onorab. Minis?

MINISTER BILLY RANGASAMY

Mersi Mr Speaker. Mersi Onorab pou ou kestyon. Mr Speaker sa size blokaz bann *right of way* e akse semen i enn ki tre pertinan e i pe preokip nou e zot osi koman bann Manm Lasanble en kantite.

Mr Speaker, sa laplikasyon sak laplikasyon ki ganny soumet kot Lotorite Plan i ganny analize e konsiderasyon pou okenn devlopman anliny avek bann *right of ways* ou rezerv semen ki egziste, i toultan - mon repete - toultan in ganny pran. Lotorite i

vreman serye pou asire ki napa okenn *right of ways* ou rezerv semen i ganny konpromize oubyen bloke, avek okenn devlopman ki ganny aprouve.

So okenn *right of ways* ou rezerv semen ki re anrezistre ki legal Lotorite Plan fer sir ki sa bann *right of ways* ou rezerv semen, i pa ganny konpromize.

Zis pou fer resorti Mr Speaker, i annan sirkonstans kot lotorite i annefe refiz devlopman, ouswa zot donn lenstriksyon bann devloper pou amann zot plan pou fer modifikasyon avek zot plan, pour ki nou asire ki bann *right of ways* ou rezerv semen, pa ganny konpromize.

Mr Speaker, i egalman enportan pou nou fer resorti ki dan bokou ka kot piblik ou kominote pe servi serten landrwa ou propriyete koman semen, i pa neseserman bann *demarcated right of ways*. So ou a rezerv semen legal.

Dan bann tel ka Lotorite napa okenn rezon legal pou refiz permisyon en term devlopman.

Mr Speaker, baze lo plizyer konplet lenvestigasyon i montre ki dan pres 98 ka, napa en *right of way* ou en akse semen legal ki anrezistre menm si serten dimoun i servi sa akse.

Pou konklir Mr Speaker, pou anmenn plis sansibilizasyon lo sa size enportan, mon Minister pe planifye en sesyon enformatif avek Gouvernman Lokal e bann lezot akter konsernen, pou zisteman amelyor konesans dan sa domenn e sa i pou ede dan lavenir pou sir. Mersi Mr Speaker.

MR SPEAKER

Mersi Minis. Onorab, ou siplemanter?

HON PHILIP ARISSOL

Mersi Mr Speaker. Mon kestyon in *partly* ganny reponn, solman mon pou demann li *still*.

Eski Minis i kapab dir Lasanble si i annan okenn plan pou amelyor konsyantizasyon e ledikasyon piblik, konsernan lenportans pou anrezistre *right of way* e si wi lekel sa bann linisyativ ki pe ganny konsidere? Mersi.

MR SPEAKER

Mersi. Minis.

MINISTER **BILLY RANGASAMY**

Mersi Mr Speaker. Mersi Onorab pou ou kestyon siplemanter.

Wi, parey mon'n fer resorti nou annan en plan serye akoz

nou konstate poudir sirtou dan bann distrik kot i annan bann *rotation of DAs* eksetera, pou nou met tou dimoun lo menm paz, pou zot konpran pou zot byen ekipe.

E linisyativ prensipal se nou fer en probableman en *one-day forum* kot nou ava kapab asiz ek tou bann *DAs* e eksplike, fer diferan prezantasyon, pran zot kestyon.

Lotorite Plan i ava la, menm petet Biro *Attorney Zeneral* i ava la par egzanp, Departman Later i ava la ; tou bann akter konsernen i ava la pou nou troun sa sans pou nou fer sa *forum* edikasyonnel. Mersi Mr Speaker.

MR SPEAKER

Mersi Minis. Onorab Esparon?

HON REGINA ESPARON

Mersi Mr Speaker. Mr Speaker, mon ti a kontan demann Minis ki rekour ki en kliyan i annan sirtou letan son akse in ganny konpromize atraver en lavant, konmsi sa bout later obor li ki i ti pe ganny akse avek, in ganny vann e i war son later i anklave - en pe parey dan ka Mr Brian Bonnelame lo Vilaz North East Point?

E li i napa okenn akse pou li akse son later parske son later in ganny totalman

anklave, ki rekour ki sa dimoun i annan? Mersi.

MR SPEAKER

Mon sipoze nou ankor -? Minis, repons?

MINISTER **BILLY RANGASAMY**

Mersi Mr Speaker. Mr Speaker, mon a les *CEO* Angela *CEO SIA-Planning Authority* ed nou eksplik nou en pti pe lo la. Mersi.

MR SPEAKER

Mersi. *CEO*?

CEO ANGELA SERVINA

Mersi Mr Speaker, Minister, Onorab. Normalman en dimoun ki anklave i vedir i napa en akse semen legal pou ariv kot li.

So Civil Code i fer provizyon ki en dimoun i al Ankour i met en *case* atraver Lakour pou li ganny en akse semen pou li, letan ki i santi ki i anklave. Sa i kler, mersi.

MR SPEAKER

Mersi. Onorab Loze, ou kestyon?

HON JOHAN LOZE

Mersi Mr Speaker. Mr Speaker, dan sa konteks asir planifikasyon efikas lilizasyon later la, mon oule konnen eski

dan tou ka *Planning Authority* i aplik prosedir etabli ki nou pe ganny eksplike la?

Par egzanp North East Point i annan en devlopman pe fer obor lans avek en dezord *container*, eski prosedir in ganny aplike dan sa ka e dan bann lezot ka parey nou pe ganny eksplike la? Mersi Mr Speaker.

MR SPEAKER

Mersi. Minis?

MINISTER **BILLY RANGASAMY**

Mr Speaker, mon ava demann *CEO Planning Authority* pou li reponn sa.

MR SPEAKER

Mersi. *CEO, please.*

CEO ANGELA SERVINA

Mersi Minister. Mr Speaker, Onorab mersi pou ou kestyon. Mon kapab konfirm avek ou ki Lotorite Plan i annan en prosedir ki'n ganny etabli e ki byen detaye, lo ki mannyer mou tret bann soumisyon pou okenn devlopman ki ganny soumet avek nou.

E sa i aplikan pou tou devlopman. E nenport ki devlopman i pas atraver menm prosedir. I annan serten ka ki nou pe fer serten leksepsyon,

par egzanp bann ka dezans ki'n arive Cascade i annan serten prosedir ki nou'n met an plas ki fer li al en pe pli vit.

Me pou tou laplikasyon ki ganny soumet tou laplikasyon nou konsilte bann Lazans konsernen - nou esper zot *feedback* pou nou kapab donn en desizyon preliminar lo la.

Se sa rezon ki ennler nou tarde pou donn en desizyon, akoz nou bezwen esper bann Lazans konsernen parey Minister Lanvironnman, Lasante, *PUC* eksetera, depandan ki kalite laplikasyon, pou nou kapab pran bann desizyon ki enformen lo bann laplikasyon.

Mon pa oule al an detay lo en devlopman ki'n ganny aprouve. Me mon kapab asir ou ki sa devlopman in pas atraver tou prosedir nesaser, avek tou bann parti konsernen *even* avan ki plan ti ganny soumet i annan en kantite konsiltasyon ki'n ganny pran.

E byensir zis pou kit la sa la ater ek Lasanble, en sit konstriksyon letan i pe ganny fer i pe ganny *built* i pa zoli li. I pa zoli ditou. *Once* ki konstriksyon i fini la ki ou war li dan son lanpler mannyer i vini.

So rest assured ki devlopman letan i fini i finalize,

i pou dapre plan ki'n aprouve. Mersi.

MR SPEAKER

Mersi. Onorab Pillay?

HON SEBASTIEN PILLAY

Mersi Mr Speaker. Mr Speaker, mon'n ekout byen bann larepons ki'n ganny donn mon ti a kontan en dimoun lo *panel* i klarifye pou mwan.

Onorab Esparon in *raise* sa pwen, Onorab Arissol in anmenn sa kestyon devan nou *regarding* rol *Planning Authority*, be dan sirkonstans kot *Planning Authority* li menm, i etabli ki en dimoun napa drwa blok akse semen pou en lot dimoun.

Planning Authority ki annan leksperyans avek konpetans teknik, in war li menm in fer son resers in etabli sa, me ou war *Appeals Authority* apre i *overturn* sa desizyon *Planning Authority* *without* donn li *grounds*, akoz in *overturn* sa desizyon e dir ek sa dimoun koumsa mon annan en ka Forêt Noire ki mon vwar resaman e dir ek sa dimoun si i pa kontan desizyon *Appeals Board* al rod *judicial review*.

I paret poudir i annan en lot Lotorite par lao *Appeals Board* *Planning Authority*, ki pe donn lord pou fer swa aprouve

en proze lo lans ouswa aprouv pou en dimoun blok akse semen en lot dimoun.

So eski Minis i kapab konfirm ek nou si i annan oubyen napa en lot Lotorite pli, o ki pe donn lord pou bann Lotorite konsernen fer sa akoz *planning* in fer son louvraz li i annan en dimoun ki'n *bypass Planning* dan sa ka Mr Speaker, be sanmenm sa ki nou oule etabli dan Lasanble Mr Speaker.

MR SPEAKER

Ok, Minis, ou repons ouswa ou ava diriz ou *panel* silvouple.

MINISTER **BILLY RANGASAMY**

Mr Speaker avek ou permisyon mon ava diriz *panel* pou *CEO Planning Authority* reponn sa kestyon.

MR SPEAKER

CEO, yes, please.

CEO ANGELA SERVINA

Mersi Mr Speaker. Minister Onorab *Leader* Lopoziyon.

Mon kapab konfirm avek ou mon krwar ki Lasanble Lalwa ki anba ki Lotorite Plan i ganny son manda e travay i ase resan e i ti pas dan sa menm Lasanble pou ganny laprouvasyon.

Lotorite i annan son *Board* ki pran desizyon lo bann laplikasyon ki soumet devan li e Lalwa i fer provizyon pou en dimoun ki pa satisfè avek desizyon, pou li fer en rapel. *Board Rapel Planning Authority* i ganny etabli anba Lalwa *Physical Planning Act, 2021*.

So nenport ki dimoun i annan dimoun ki ganny en *refusal* zot al *appeal*, i annan dimoun ki pa satisfè avek en kondisyon kekfwa ki nou'n mete lo son devlopman li osi i kapab fer son *appeal*. E i annan bann dimoun ki i ganny *Enforcement Notice* en *stop notice* i kapab osi fer rapel.

So pou fer kler se ki definitivman *Board Rapel* i par lao *Board Planning Authority*, akoz zot ki annan sa desizyon final lo desizyon ki Lotorite i pran.

I pa neserman dan tou leka ki Lotorite li i satisfè avek desizyon ki *Board Rapel* in pran, akoz letan nou, nou'n fer nou *assessment* ek nou desizyon, nou'n fer li baze lo serten fe ki ti egziste a sa moman.

So *whatever* desizyon ki zot ganny pran, i ganny pran par *Board Rapel* pli tar. Nou, nou napa swa nou bezwen respekte, akoz sa i prosedir ki'n

ganny etabli dapre Lalwa. Mersi.

MR SPEAKER

Mersi. Minis, i oule azoute?

MINISTER BILLY RANGASAMY

Mersi Mr Speaker. Mr Speaker, mon anvi avek tou senserite konfirm avek Onorab ki mwan koman Minis Later ek Lakaz anba nouvo Lalwa mon napa okenn Lotorite lo *Appeals Board*.

Napa okenn konversasyon ki deroule ant *Appeals Board* ek mwan personnelman e alors mon war li bizar ki zot pe, ki petet sa komanter pe ganny fer, parske dan nouvo lapros nou ti dir tou politik dan sa bann dan sa size.

E osi *Appeals Board* i en nouvo *Board* - petet Mr Speaker avek ou permisyon i en nouvo *Board* i osi in ganny etabli i annan apepre 2 an la Onorab. I annan serten konversasyon nou bezwen vwar mon koman Minis responsab pou nou asiz ansanm pou nou regard en pe si i annan serten size ki nou war nou devret ganny adrese dan lapros ki zot pran.

Sa pou si i annan. Dan tou keksoz nou bezwen gete i annan bann letan nou fer en *assessment* bann progre ki zot

in fer, ki bann defi ki zot annan - nou pou fer sa konversasyon ek zot.

Selman mwan personnelman, mon pa enterfer ditou dan okenn desizyon *Appeals Board* e menm *Planning Authority* zot asiz a kote mwan zot osi zot ava a konfirm sa i leka.

SIA menm letan zot soumet zot bann plan, souvandfwa i annan bann *initial* pa neserman *refusal* bann komanter ki *Planning* i fer.

So napa okenn lapreferans pou person. An prensip Minis pa *involve* dan okenn desizyon ki *Appeals Board* i pran, sa mon kapab konfirm ek sa Lasanble. Mersi Mr Speaker.

MR SPEAKER

Mersi.

HON SEBASTIEN PILLAY

(Off-Mic)

MR SPEAKER

Onorab Pillay, nou pa pou antre dan en largiman ant Minis avek ou. Mon a pran dernyen pwen, Onorab Uranie. Onorab si ou annan en kestyon?

HON ROCKY URANIE

Mersi Mr Speaker. Bonzour Minis avek ou delegasyon. Byenveni *CEO Planning*.

HON SEBASTIEN PILLAY

(comments off-mic)

MR SPEAKER

Onorab Pillay, ou a les mon ekout Onorab Uranie silvouple. Yes?

HON ROCKY URANIE

Wi, *CEO* par egzanp ler en dimoun- *Planning* pa aprouv son proze - par egzanp en pti dimoun pe sey fer en lakaz kot son paran e *Planning* pa'n aprouv son laplikasyon, eski zot dir li ki rezon ki zot pa'n aprouve oubyen i bezwen al direk kot *Appeals Board* avek menm zafer?

Eski zot eksplik li kwa ki bezwen amande oubyen serten keksoz pou li kapab ganny sa laprouvasyon? Mersi.

MR SPEAKER

Mersi. *Ok*, nou'n ariv en pe lwen ek kestyon orizinal. Minis, en repons en pe vit silvouple.

MINISTER BILLY RANGASAMY

Mr Speaker, mon ava demann *CEO Planing Authority* pou reponn sa kestyon silvouple.

MR SPEAKER

CEO, mersi, wi.

CEO ANGELA SERVINA

Mersi Onorab pou ou kestyon. Ou kestyon i enteresan, akoz i donn nou en sans pou eksplike ki mannyer prosedir i marse.

Refiz en laplikasyon i en dernyen opsyon ki *Board* pou pran letan i pe konsider en laplikasyon. Nou sey nou mye pou eksplor tou bann opsyon ki annan. Akoz sirtou si en dimoun in *submit* en laplikasyon pou en lakaz, nou konnen i en lozman i nesese en dimoun i bezwen si ou war in *submit* en lozman.

So nou fer nou mye pou nou get dan tou fason ki mannyer nou kapab asiste, ede - ed li fer lamannman lo plan ennler kekfwa bann *agent* pa'n fer bann bon louvraz nou al lo *site* e i pa zis nou ki ale plizyer Lazans i ale osi.

I annan de fwa bokou laplikasyon ki nou pe vwar, i ganny refize lo bann baz ki zot pa pe *meet* kriter nesese, pou zot bann sistenm desarz. Akoz letan nou komans antre dan bann laspe *health and safety* sanniter, lekip sanniter dan Departman Lasante zot annan gran *say* ladan.

So zot ki donn gidans lo kwa ki nou kapab fer oubyen

non. En laplikasyon ki'n ganny refize lo en baz koumsa oubyen lo en baz lanvironnman i vedir ki nou pa'n war en lot opsyon ki mannyer nou pou ed li.

E sa i anmenn mon lo en pwen enportan ki mon pou kit avek zot bann Manm Lasanble nou pei i ankor annan bokou pou fer an term pou nou kapab anmenn sistenm desarz ki santral dan tou nou distrik Mahe, Praslin, La Digue tou nou zil.

Mon krwar lo La Digue in komanse i en bon keksoz pou arive. *Once* ki sa i arive i pou ed nou pou ed bann dimoun en kantite, akoz sa dimoun pa pou nepli bezwen kit menm kantite zistans par egzanp si i ti pe met en sistenm *soakaway* avek en *septic tank* tradisyonnèl parey nou konnen, si i pe konekte avek sistenm desarz.

So en laplikasyon ki ganny refize, definitivman nou pou *state* tou bann rezon akoz *refusal*. I annan bann lenstans kot sa devloper i retourn kot nou i pa neserman ki i al *appeal* pa tou devloper ki fer rapel en, zot retourn kot nou kekfwa zot fer bann lezot demars, kekfwa petet zot rod en permisyon avek *neighbour* pou li ganny sa lasistans neser oubyen *whatever* ki ti manke, zot troun kot nou e zot demann

nou si zot pou fer lamannman si i ava *ok*.

Dan sa bann lenstans koumsa, i annan bann ka ki nou pran wi, nou regete nou revwar si zot kapab *meet* bann kriter neser. So mersi.

MR SPEAKER

Mersi *CEO*. Bon, nou ava avans lo dernyen kestyon. Mon krwar nou annan ankor en sanzman delegasyon.

Dan prosen kestyon nou an Mr Denis Barbe, Mr Shah, nou re apel Mr Florentine ankor mon ti krwar mon'n dir li orevwar me Mr Florentine e Mrs Servina nou pou envit ou pou pran *side table* pou permet Mr Florentine lo *panel*. E nou osi apel Mr Steve Mussard.

Byen, avek sa nou a kapab avans lo kestyon 160 Onorab Anne Bistoquet.

HON ANNE BISTOQUET

Bonn apre midi Mr Speaker. Mersi, bonn apre midi *panel* e tou dimoun a lekout. Kestyon 160 i lir koumsa; -

Eski Minis i kapab donn detay nou Lasanble lo bann lakonplisman remarkab son Minister pandan sa dernyen 3 an e bann defi mazer ki zot ankor pe fer fas avek? Mersi.

MR SPEAKER

Mersi. Minis, ou repons.

MINISTER **BILLY**
RANGASAMY

Mersi pou ou kestyon Onorab. Mersi Mr Speaker, pou donn mwan sa sans pou reponn sa kestyon.

Vreman sa kestyon i donn mwan en bon sans pou tous lo rol nou Minister, Minister Later ek lakaz kantmenm bann Minister pli konplike ki annan dan pei. E bann Lazans ki tonm anba mon *portfolio* eksplik nou annan defi e partaz demars pou amelyor nou servis.

Minister Later ek Lakaz i en Minister ki tous bokou fanmir enterakte avek bokou kliyan e Lazans, i enportan alors ki fonksyonman Minister *SIA*, *PMC* e Lotorite Plan i enn ki efikas e byen kordinen.

Atraver mon karyer profesyonnel e plizyer leksperyans aletranze laplipar dan domenn prive e osi lokal, mon'n kontakte ki'n nou bann defi sosyal lekspektasyon pep ki tre o e parfwa mankman responsabilite nou pep, i bann faktor prensipal ki anpes nou sirmont tou nou bann defi e gaspiy bokou nou letan.

Lo bann ka kan ti kapab ganny regle trankilman, anliny avek nou plan stratezik nou'n group tou nou bann defi Mr

Speaker permet mwan pou elabor lo sa bann defi osi byen ki akonplisman *comme* swivan;

Nou'n kategoriz nou bann defi par 5 kategori, mon ava zis dir zot premye lekel sa 5; i annan sa konponan soutenabilite an prensip delika nou kalite teren, mankman teren, bann program ki soutenab ki nou bezwen met an plas.

Nou'n osi tous en pti pe-lot pwen se lo sa kot tou keksoz i ankor *manual* kot nou pe get bann konsepsyon *digitalisation*, osi vreman enportan nou *customer service* ki nou donnen e resours imen annakor nou fer en lot defi *HR investment*.

E finalman lo sa bann pwen prensipal, sa bann obzektif prensipal lot lafebles ki nou pe idantifye konman defi e tro bokou birokrasi, tro bokou *red tape*, tro bokou lanpayaz, keksoz i pran tro lontan ki mannyer nou kapab *streamline* sa bann keksoz?

Alors Mr Speaker, koman ou'n tous sa zeneral mon ava al en pti pe avek ou permisyon Mr Speaker, parske sa i enportan pou mon pran sa alokasyon pou mon *share* avek Lasanble e osi nou pep an zeneral sa bann pwen ki nou'n idantifye.

Soutenabilite; defi ki asosye avek sanzman klima i enn ki pli konsern e i konsern nou tou. Mon Minister i napa swa in bezwen deplizanpli pe revwar bann diferan *design* pou konstriksyon, sirtou avek Lazans *SIA* pou bann proze ki nou'n enplimante.

Bokou travay ti osi ganny fer par Lotorite Plan ansanm avek lekip *World Bank*, pou prodwi bann regilasyon ki reponn a sa lapel avek kondisyon dizour e *topography* pou asir bann devlopman ki pli soutenab.

Nou bann plan lilizasyon later ki nou'n koz lo la pli boner, i ankor en konsern pou Lotorite Plan an vi ki en partisipasyon manm piblik dan sa legzersis pa'n vremen ankourazan.

Nou determinen par kont pou nou kontinyen agresivman e devlop nou bann plan lilizasyon later pou nou bann distrik o pli vit posibil.

Mr Speaker, mon Minister atraver Lazans Lenfrastriktir pe osi eksplor bann materyo konstriksyon alternativ zisteman pou anmenn sa eleman soutenabilite dan nou bann proze enkli lafason ki in *design*.

Sa i osi pran kont nou limitasyon teren ki mon'n fer resorti e rezervasyon nou

popilasyon pou adapte e avek bann nouvo prodwi alternativ.

Par egzanp letan ou koz *prefab* tou dimoun i sot anler i annan bann persepsyon ki sa pa en bon prodwi. Nou pe analiz sa bann prodwi osi ki a ed nou pli efikas dan nou lavites ki nou a kapab delivre nou bann proze e pran sa bann size parey e edik nou pep lo sa bann prodwir alternativ.

Bokou travay in fini ganny fer, pou asire ki nou annan diferan prodwi ki reponn a bezwen nou pep e nou'n pare pou bouz lo egzeksyon tre byento.

Mr Speaker, i annan pa mal travay ki'n osi ganny fer lo bann meyer fason protez nou bann lezot nou lakot e nou bann lenfrastriktir kont lerozyon.

Zisteman sa i fer mon mazin sa proze proteksyon lakot ki'n ganny fer Beau Vallon 2022/2023, ki'n ede protez nou lans e lezot enfrastriktir avek granmare.

Pareyman, i osi annan bann lezot proze ki'n ganny enplimante en pe partou atraver pei bann zil prensipal Praslin e menm La Digue e i annan bokou travay ki nou pe atake ankor pou nou dil avek sa problemn sanzman klima ki

reel dan nou pei e ki enpakte bokou mon Minister.

Mr Speaker, nou bann regilasyon e Polisi i met bokou lanfaz osi lo bann provizyon pou nou group popilasyon ki annan dezabilite e bann akse.

Sa i en defi si nou pas Victoria i annan bokou konplikasyon alors mon Minister ansanm avek lezot departman tel ki Departman Transpor nou pe vwar sa bann fasilite, pou nou adrese o pli vit posib.

Anliny avek sa larout ki mon Minister in pran pou anmenn sa eleman soutenabilite dan tou nou bann landrwa e proze, mon Minister in osi angaze pou asire ki nou annan bann mendev ki kapab *design* e planifye tou nou bann proze.

Nou pe rod fason pou *train* nou bann *marine coastal engineers* en keksoz ki'n ganny neglize tro lontan, parske nou antoure ek lanmer me selman nou vwar nou bann enzenyer pa'n ganny *train* dan sa laliny.

So nou pe met zefor atraver *SIA* pou nou *train* nou bann *marine coastal engineers* e bann *hydrologist* oubyen parey nou dir sa bann *flood mitigation* spesyalis pou nou kapab dil ek sa bann problem *flooding*,

problem inondasyon ki nou fer fas avek.

E mwan koman en enzenyer mon pe pous for lo la e mon pe partaz mon leksperyans - mon bann *network* pou nou kapab anmenn sa bann ekspertiz e devlop nou bann zenn profesyonnel Seselwa.

Lo kategori *digitalisation*, sa dezyenm pwen - defi ki nou pe fer fas avek Minister i enn ki pe gard en kantite en kantite lenformasyon - en kantite *file* ki swa ankor lo papye ouswa dan bann *database*, ki ase aze e sa bann sistenm malerezman pa konekte ek kanmarad.

Sa i fer ki bokou letan ek resours i ganny servi avan ki en desizyon i ganny pran e sa i annan en lenpak lo lefikasite e bann servis ki nou donn nou bann kliyan. Pou rezourd sa sityasyon, nou'n deza anbank lo plan pou nou *digitalize* nou bann lenformasyon.

E resaman nou *PS* pou Later ki'n zwenn nou- Lakaz ki'n zwen nou Mr Florentine a kote mwan, ki annan en bagaz dan sa laliny, ki'n zwenn nou avek bi pou nou *drive* sa agresivman.

E nou pe osi swiv bon legzanp ki Lotorite Plan in annan ki zot tou zot sistenm i *online* e Departman *Housing* osi

i annan en ase en bon plan, me selman lenportans se pou konekte sa bann platform nimerik ansanm.

PMC mon kontan pou dir pe osi finaliz devlopman zot sistenm nimerik enn fwa pour tou pou zot *database* zot bann kliyan dan sa 5 mil apartman ki zot annan atraver pey 5 mil lakaz ekek.

Nou vizyon se met an plas en sistenm nimerik ki entegre ; seksyon *Planning* i kapab pe koz ek seksyon *GIS* i kapab pe koz ek seksyon Later pou nou kapab annan en sistenm ki entegre ki a ed nou vin pli efikas.

Nou'n osi mon bezwen refer resorti sa, petet zot in vwar bann lanons lo televizyon, lo radyo ki nou'n annan en nouvo limero ki apropiye pou Minister ki Minister pe servi e sa in ed nou parske nou'n sanz nou sistenm nou'n investir dan en nouvo sistenm *PABX* modern an 2023.

E nou santi avek bann reaksyon ki nou pe gannnen, ki sa pe vreman ed nou. Parske ti annan bokou konplent akoz letan ou telefonn sa Minister telefonn i sonnen, i sonnen, i sonnen mon pa pe dir ou in arete, me selman i pe anmenn nou dan bon semen, kot nou kapab annan fasilite pou nou

resevwar plizyer *call* an menm tan. Sa i ed nou pli byen deservi nou bann kliyan.

Nou pe osi kontinyen investir dan devlopman nou sistenm *GIS*, ki mon fyer *about* sa sistenm ki byen avanse e ki permet nou fer bokou desizyon dan en fason pli entegre konsistan e avek efikasite.

Mon krwar zot tou zot annan *GIS* lo zot telefonn, me nou pe vwar ki sa platform i en pti pe ase aze so nou pe moderniz li. E tre byento mon anvi mon byen kontan mon eksite pou partaz sa avek zot tre byento nou pou lans nou sistenm *GIS enterprise e watch this space*.

Mon vizyon e vizyon ki mon lekip i partaz avek mwan se ki dan lavenir tou nou bann kliyan, mon repete tou nou bann kliyan i pou kapab ganny tou nou bann servis *online*, tel ki zot aplikasyon later, aplikasyon lakaz eksetera e osi enterakte avek nou e fer swivi lo stati zot bann aplikasyon parey zot pe fer avek Lotorite Plan.

Lo *customer service* Mr Speaker, nivo demann pou later ek lakaz i tre o, ler nou get istorik bann ka sa mon bezwen fer resorti ler mon get istorik bann ka tel ki *encroachment*, mankman *wayleave*, move planifikasyon e malerezman

parfwa in ganny enfliyanse par bann promes politik. E la kantite ka legal ki nou'n erite i met en presyon enorm lo nou bann resours.

Nou osi war nou Minister pe fer fas avek lekspektasyon piblik tre o, ki souvandfwa angaz Minister dan bann problem prive ; par egzanz vwazen anver vwazen sa i reste bann defi mazer ki nou fer fas avek Onorab.

Minister i bezwen pli byen ekipe pou *manage* nou bann kliyan dan en fason byen kordinen avek bann lentervansyon stratezik e se pour sa rezon ki atraver revizyon striktir ki nou'n met an plas e ki mon'n ensiste, nou'n osi kre en pos kle pou nou Zofisye *Senior* Relasyon Piblik en *unit* dedye lo *customer service* e en Direkter Zeneral pou Zafer Piblik.

Lobzektif nou plan, se pou redwir presyon kliyantel lo nou bann teknisyen e les zot fer zot travay. E mon bezwen fer resorti le zot fer zot travay teknikman san lentervansyon politik.

Par egzanz anba nouvo Lalwa *Physical Planning* ki *CEO Planning Authority* ti pe *share* avek nou boner, Lotorite Plan ek son Komite *Appeal* i travay strikteman anba zot *Board* san

lentervansyon Minis. Pareyman alokasyon lakaz i ganny fer atraver en Komite alokasyon e baze lo merit e laz aplikasyon eksetera.

Policy Alokasyon Later in ganny revize pou anmenn plis transparans e *fairness*.

Unit Customer Service i bezwen pas lenformasyon lo *status* bann kliyan e kre en lyen pli pres avek tou nou bann kliyantel. Sa nou war i ankor annan en mankman e mon pou partaz sa avek Lasanble ki i enportan ki sa i ganny regle.

Sa si a osi permet nou vwar ki travay ki nou bezwen fer pou edik nou kliyan lo bann laspe Polisi e fer bann kanpany relasyon piblik.

Nou'n deza komans nou program tou le semenn osi, pou nou vizit tou bann distrik e pou ed nou bann zabitan, bann kliyan ki war li difisil pou desann Viktorya. Nou pe met lanfaz lo kourtwazi, kourtwazi mon repete, respe, *follow up*, donn lenformasyon e ofer en servis onivo avek ekselans avek en souriy lo ou figir.

Nou pe sey pous sa bann bon, bon eleman, pou nou kapab sanz zimaz nou Minister. Nou'n konstate ki sa linisyativ pe mars byen dan bann distrik.

Lo resours Imen Mr Speaker Minister Later ek

Lakaz, *SIA*, *PMC* ek Lotorite Plan i anploy plis ki 400 *staff*. Menm sa nou kontinyelman eksperyans defi ki kalite *staff*, kalite *staff* e mankman lo marse pou resours teknik tel ki arsitek, enzenyer, arpanter, *land valuers*, *urban planners*, zofisye legal, eksetera.

Tousala i bann zofisye ki deservi e ed nou pou donn nou en servis kot mon Minister. Sa i annan en lenpak direk lo efikasite e kalite travay ki nou delivre. Lannen 2022/2023 Minister in fer en restriktirasyon administratif pou ki nou meyer deservi nou manda.

PMC in osi travay lo bann striktir fas avek bann defi sosyal e bann *issue maintenance*.

Lenplimantasyon lo sa striktir pe deza ganny met an fors. Apre 2 an dan legzistans *SIA*, *SIA* osi pe fer reevalyasyon pou adres serten defi, serten mankman e donn en meyer servis son kliyan.

Avek lentrodiksyon program *RBM* par Gouvernman, nou Komite *RBM - results-based managements* in analiz performans tou nou bann *staff* pou lannen 2023. Nou war en nesesite pou reviz bann performans bann *performance contracts* e aliny

zot avek plan stratezik nou Minister, osi bann *national development strategy* ki'n lanse sa lannen.

Prosen letap Komite *RBM*, se pou met an plas en sistenm *monitoring* tre byento e evalyasyon.

I bon note Mr Speaker, ki *PMC* in fer pa mal progre dan sa domenn e mon kontan pou enform sa Lasanble ki zot sistenm *monitoring* i deza an plas.

Bann revi preliminar pe montre nou bann logmantasyon dan prodiktivite me i ankor annan bokou, bokou, bokou travay devan nou. Nou bezwen osi kre en meyer lanvironnman travay pou tou nou *staff* pou osi ankouraz zot pou zot *feel* en lapartenans en lanvi la pou zot travay.

Nou osi met bokou lanfaz lo *capacity building* anvi mankman *skill* spesyalize. I nou dezir pou anvoy maksimonm *staff training* aletranze pou konplimant nou stratezi lokalizasyon bann pos. Bokou zefor pe osi ganny fer pou idantifye *training* lokal, pou nou bann pou ogmant konpetans pou nou bann *staff* a tou nivo.

Nou pa pe kit personn deryer, nou bann zofisye *customer service* nou bann

drayver nou bann *administration officers* nou bann *telephone operators* lo *front line* eksetera pe sivre bokou program *training* apropiye, pou nou vwar la diferans gradyelman dan nou *delivery*.

E finalman Mr Speaker, enn bann landrwa kot nou'n war en gran amelyorasyon ki mon met bokou lanfaz parey Prezidan in toultan prese, se tir bann *silos*. An konsekans nou'n war pis kordinasyon entern ant bann departman e lazans dan mon portfolyo.

E psi ban kordinasyon avek bann lezot *stakeholders*, par egzantp ozordi nou a pe war ki Lazans lesanz lenformasyon e kordinasyon ant *PMC* avek *SIA* i bokou pli meyer. *PMC* pe ganny plis lasistans teknik kot i nesese e pe donn *feedback* lo bann proze lakaz.

Nou pe bouz dan en direksyon tre pozitiv, pou rezourd bann problem *sewage* lo bann *Housing Estate* Mr Speaker e *PMC* par egzantp pe travay pros avek *PUC*.

Nou'n osi annan en plan avanse pou *PUC* asiste Gouvernman avek *management* sa bann enfrastriktir. E osi kot i posib enplimant bann solisyon rezyonnal an partenarya avek *PUC*.

Mr Speaker, permet mon remersye *PUC* pou zot sipor e kolaborasyon ki tre ankourazan e tre profesyonnel.

Mr Speaker, lensidan le 7 Desanm in teste nou rezilyans pou fer fas avek en sityasyon vremen difisil e mon konnen ki tou Manm Lasanble i a dakor ki i fer premye fwa nou ganny tape koman en pei lo sa nivo e dimansyon. Me nou lekip in kapab rasanble ansanm e kordin tou le nesese par sa bann legzanp swivan; -

SIA avek *Planning* in travay ansanm pou fer bann vizit preliminar e evalye bann domaz imedyatman.

Departman *Housing* ek *PMC* in bezwen vitman rod solisyon pou bann dimoun ki'n ganny- ki ti bezwen ganny deplase baze lo evalyasyon.

PMC in osi bezwen kordin avek *Housing* ek *SIA* pou dil ek reparasyon bann *estate* ki'n tonm anba zot. An plis nou'n bezwen en bon kordinasyon avek Minister Gouvernman Lokal, *IEA* e Minister Finans pou nou kapab bouz o pli vit posib pou met sityasyon anba kontrol.

E Departman Later atraver seksyon *GIS*, ti pran linisyativ devlop en *App* Nimerik vitman pou rikord tou sa bann lenformasyon domaz lo

pros 1,400 ka, 1,400 ka dan en dele letan detruwa zour dan en fason ki efikas.

I osi annan plizyer lezot legzanp tel ki bann kordinasyon ki *SIA* ek *Planning* in bezwen fer avek bann Antite tel ki *DRMDP* e osi Gouvernman Lokal, *SLTA*, *LWMA* e Departman Sanzman Klima, pou adres sa bann problem *flooding* e lenpak lerozyon lakot ki nou pe fer fas avek pli souvan.

En kantite proze pe ganny enplimante lo sa laliny, me petet i pa pe ganny- nou pa pe partaz sa devan avek sa baz agresivite ki i nesesser, me i annan en kantite travay *behind the scenes* pou nou prepar nou pou nou amelyor nou rezilyans.

Mr Speaker, nou krwar dan en lapros *teamwork*, fran e profesyonnel, sa i donn mwan bokou lespwar.

Me byensir Mr Speaker, i ankor annan en kantite pou nou fer lo kote kominikasyon. Sa gran amelyorasyon ki mon'n koz lo la i reste en gran akonplisman dan en tre kourt letan 3 an e i donn mwan en kantite lankourazman.

Pou konklir Mr Speaker, mon pou admet ki touzour i annan lespas pou amelyore, sirtou dan nou *customer service* pou retir fristrasyon vin pli transparan e inovativ. Nou

bezwen pe touzour rod en solisyon pou tou nou bann kliyan.

Mr Speaker, i bezwen ki nou antre dan soulye tou nou bann frer ek ser Seselwa. Bokou keksoz pe ganny fer, me lenformasyon pa dan en fason senp e mwen teknik i bezwen ariv kot nou bann kliyan e lamas dan en fason efikas.

Mwan koman Minis responsab po sa portfolyo, mon fyer ki nou annan en lekip teknisyen e bokou *staff* ki *think outside the box* e pe travay nwit e zour pou rod en solisyon.

Mon krwar senserman dan donn lespas mon bann teknisyen pou travay e *empower* zot pou delivre pou tou zanfand Sesel.

Malgre tou nou bann defi e serten persepsyon laba deor, nou pa pou kit personn deryer. E avek tou imilite mon konvenki Mr Speaker, ki nou pe vremen met bokou lord dan bokou dezord ki nou'n rankontre depi ki mon'n pran plas sa Lofis Minister Later ek Lakaz.

Frer ek Ser Seselwa nou pou war rezilta pozitiv firamezir sa mon promet zot tou. Mr Speaker nou lo bon semen e nou dan bon lanmen. Mersi Mr Speaker.

(APPLAUSE)**(BREAK)****MR SPEAKER**

Mersi Minis. Onorab Bistoquet ou annan siplemanter?

HON ANNE BISTOQUET

Mersi Mr Speaker e mersi Minis pou ou repons byen detaye. E mon ti a profite felisit tou bann *staff* ou Minister ki pe travay vreman dir e 2 ki mon travay vreman pre avek se Ms Serret avek Mrs Samy e vitman mon ganny larepons avek zot e Mrs Samy menm ennler 8 er diswar.

Ms Serret 24 erdtan maksimonm i pe reponn mwan opred ki avan 2011 mon ti anvoy let mon ti ganny repons 2015, 2017 mon ti ganny repons 2019.

MR SPEAKER

Ale Onorab, si ou annan kestyon siplemanter.

HON ANNE BISTOQUET

Mersi Mr Speaker.

MR SPEAKER

Ou napa *ok*. Byen mersi pou ou komanter nou'n *out of time*, nou termin sa sesyon kestyon la. Mersi Minis e ou delegasyon pou zot partisipasyon.

Lasanble a pran poz e nou a rebran 2 er. Mersi.

MR SPEAKER

Bonn apre midi tou dimoun dan lasal e a lekout. Nou a rebran travay lo *Bill*. E madanm *Hansard* raporter ou ava apel Minis avek delegasyon silvouple. Bonn apre midi Minis pou Lanplwa e Zafer Sosyal Mrs Patricia Francourt, Mr Bernard Valentin Sekreter Prensipal pou dan Minister Lasante Mrs Linda Willaim-Melanie Sekreter Prensipal dan *Social Affairs Department*, Miss Tracey Tirant *Deputy CEO Agency for Social Protection*.

E osi a kote nou annan Nisreen Abdul Majid *CEO Seychelles Pension Fund* e Mrs Julia Jean *Legal Draftsperson AG's Office*. Byenveni zot out pou partisipasyon lo *Bill*. Nou pe pran *Functional Capacity Assessment Board Bill, 2024 Bill No. 5*. Avek sa mon ava apel Mosyon pou *Second Reading* sa *Bill*.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi Minis avek ou delegasyon. Bonn apre midi tou bann koleg Onorab, e dimoun ki pe swiv nou. Mr Speaker, annakor avek *Order 69(2)* nou *Standing*

Orders mon move ki the Functional Capacity Assessment Board Bill, 2024 i ganny lir en Dezyenm fwa. Mersi.

MR SPEAKER

Mersi. Nou a ganny segonnman Onorab Esparon.

HON REGINA ESPARON

Mersi Mr Speaker. Bonn apre midi Minis ek ou delegasyon. Mr Speaker, mon pe segonn Mosyon pou ki *the Functional Capacity Assessment Board Bill, 2024* i ganny lir en Dezyenm fwa. Mersi.

MR SPEAKER

Mersi. Avek sa, nou pare pou pran prezantasyon sa *Bill* par Minis. Minis, ou annan laparol.

MINISTER PATRICIA FRANCOURT

Mersi Mr Speaker. Mr Speaker, Manm Lasanble Nasyonal, e tou dimoun a lekout bonn apre midi. Mr Speaker, avan ki mon fer lentrodiksyon lo sa *Bill* devan nou, permet mwan lo lapar Komite *Inter-Ministerial* pou Program Reform Proteksyon Sosyal e mon Minister, pou prezant nou kondoleans avek *staff* kot Lofis *Attorney General*.

E fanmir Mr Laurence Gamoughisha ki ti kit nou Lendi le 17 Zen. Mr Gamoughisha in zwe en gran rol pou gid sa tim ki'n travay lo sa 2 propoze Lalwa mazer anba sa plan reform, dan bann Program Proteksyon Sosyal.

Premye ti Lalwa pou kree *Seychelles Home Care Agency* an 2022 e la 2024, sa enn pou annan en sel Board evalyasyon kapasite fonksyonman. Lobzektif sa Prozedlwa, se pou etabli en *Board* ki son fonksyon prensipal se pou evalye kapasite fonksyonman en endividi ki'n oubyen ki anvizaze fer en laplikasyon avek Lazans Proteksyon Sosyal oubyen Fon Pansyon Sesel pou resevwar en benefis anba Lalwa lo baz envalidite oubyen andikap ki i santi i annan oubyen ki son fanmir i santi i annan.

Sa *Board* dan son sazes e baze lo metod ki li i pou adopte, pou determin si sa endividi i kapab fonksyon selon kriter etabli e selon son sityasyon fizik oubyen mantal.

E si sa endividi i devret resevwar benefis ki preski anba Lalwa Sekirite Sosyal, oubyen Lalwa Fon Pansyon. Apre son evalyasyon, sa *Board* atraver son Sekretarya a transmet son desizyon avek Lazans

Proteksyon Sosyal oubyen Fon Pansyon Sesel selon sak ka.

Sa proze Lalwa pe osi propoz lamannman dan Lalwa Sekirite Sosyal *Cap* 2025 e Lalwa Fon Pansyon Sesel *Cap* 2020 pou fer ki ler sa nouvo Lalwa i pase, sa 2 Lalwa mansyonnen i ava anliny avek li.

Sa morso Lalwa ki pe ganny prezante i form parti reform ki Gouvernman pe antreprann dan son program proteksyon Sosyal. Kestyon valab se akoz sa nouvo Lalwa i neseler. Repons i kler.

Dan sityasyon aktyel i annan 2 *Board* Medikal diferan ki fer plizoumwen menm kalite evalyasyon. Enn sa bann *Board* i fonksyonnen anba Lalwa Sekirite Sosyal e lot fonksyonnen anba Lalwa Fon Pansyon Sesel. A diferan moman i posib ki sa 2 *Board* pe get sityasyon menm dimoun. Souvan i mank koerans dan lafason ki zot fer zot evalyasyon, e zot bann determinasyon oubyen bann desizyon.

E sa mank koerans i kapab anmenn konfizyon e lezot lenplikasyon advers lo bann benefisyer potansyel. Lentansyon sa proze Lalwa, alors se pou anmenn liniformite dan sa bann evalyasyon medikal e sosyal, adres sa

mank koerans e rann nou bann sitwayen vilnerab ensi ki zot fanmir en meyer servis. Dan sa konteks sa proze Lalwa pe entrodwir sa bann eleman swivan;

1. En *Board* avek 8 manm profesyonnel sorti dan domenn Lasante, Sosyal ek Lanplwa apwente par Minis pou Lasante.
2. En Sekretarya avek en *Manager*, e lezot travayer an plen tan ki neseler pou administre travay kotidyen sa *Board*.
3. En Komite Dapel ki pou resevwar bann rapel ki bann aplikan ki pa satisfè avek desizyon *Board*.
4. Lamannman ki pou neseler dan Lalwa Sekirite Sosyal e Lalwa Fon Pansyon ler sa nouvo proze Lalwa i pase.

Proze Lalwa i al san detay lo ki manner sa *Board*, sa sekretarya ek sa Komite Dapel oubyen *Appeals Committee* pou fonksyonnen. Bann diferan fonksyon, pouvwar ek responsabilite sakenn i byen detaye. Bann diferan prosedir ki fodre dan enplimantasyon sa Lalwa i byen detaye. Bann size

peyman i ganny adrese *comme il faut*.

Se Minis pou Lasante ki pou determin desizyon final lo bann size Polisi ek direktiv ki devret swiv. I pou osi responsab pou apwent oubyen *revoke* apwentman bann manm *Board*, bann Komite Dapel ek Sekretarya si i annan okenn rezon valab pou *revoke* okenn apwentman. Proze Lalwa i osi fer provizyon pou lofans ki kapab ganny komet anba sa Lalwa.

E bann penalti potansyel ki pou swiv si en dimoun i ganny trouve koupab. Avek sa bann mo lentrodiksyon, lo lapar Minister Lasante mon annan plezir pou prezant proze Lalwa lo letablisman Board pou evalyasyon kapasite fonksyonman avek Lasanble Nasyonal pou son konsiderasyon. Mersi Mr Speaker.

MR SPEAKER

Mersi Minis. Bon avek prezantasyon, nou'n pare pou antre dan deba lo *Bill*. Onorab Hoareau.

HON JOHN HOAREAU

Mersi Mr Speaker. Bonn apre midi Minis ek ou delegasyon. Bonn apre midi tou Manm ki a

lekout. E bonn apre midi osi tou dimoun deor ki pe ekout nou.

Mr Speaker, ler mon pe get sa *Bill* devan mwan, mon vwar ki en *Bill* ki pe anmenn 2 keksoz an prensipal. E sa 2 keksoz an prensipal ki mon pe al dir, i form parti en legzersis kontinyel ki Gouvernman formen par *LDS* pe fer dan tou seksyon son administrasyon.

Premyerman i pe ogmant lefikasite, dan sa servis li menm. So, i pe ogmant lefikasite servis piblik. I en servis ki ganny konsidere koman en servis piblik. E osi i a pe target lasistans pou donn bann dimoun ki pli vilnerab e mwen fortinen dan nou sosyete. Mr Speaker, parey Minis in ganny dir oparavan ti annan 2 *Board* ki ti pe fer presi dir menm louvraz.

E ler en dimoun ki ti bezwen en swa en larzan kot pansyon pou envalidite pou bann benefis ki pansyon i donneren oubyen bann benefis ki anba *Approved Programs of ASP*, i ti bezwen al dan 2 diferan Board e *apply* pou swa pansyon, swa pou en program anba *ASP*.

Me ozordi sa letan ki pran pou vwar dan 2 *Board* i pou al zis dan en *Board* e sa letan pou bokou redwir pou li ganny sa evalyasyon ki i bezwen. E sa i

anmenn plis efikasite dan sa travay li menm.

Dezyenmman Mr Speaker, sa nouvo Board i parey nou'n vwar ki anba *part 2 (3)(3)* i en *Board* ki annan en *large pool of skills*. *Skills* sa bann dimoun i divers, e i pou kapab prodwir en *assessment* ki a mon avi i vremen obzektif e i vremen profesyonnel.

Akoz ler nou pe get sa bann dimoun ki tonm dan sa *Board* oubyen ki pou ganny etabli par sa *Board* i bann *Health Professional, Medical Practitioner, Orthopedic or surgery or trauma, Social Worker*, i pou annan reprezantasyon sorti kot Minister Lanplwa, reprezantasyon en *Medical Practitioner* dan *Occupational Health. Medical Practitioner* dan *Pediatric*, en *Health Professional Specialized in mental health* e osi son *Manager* pou sa lorganizasyon.

Mr Speaker, sa i fer ki avek en *skill* sitan divers koumsa ou pou ganny ou en lopinyon ki vremen balanse ki vremen profesyonnel ki *meet* bann *best international practices* e bann *tools of assessment* ki pou ganny servi i lo baz enternasyonal.

Mr Speaker, dezyenmman ler nou pe get sa Lalwa ki devan

nou, mon vwar ki i pa pou kit personn deryer. Akoz ni ou kouler lapo, ni ou kouler sa ki ou siporte, ni ou ras pa pou ganny konsidere koman en kriter pou ou ganny okenn benefis.

I en non *apolitical*, vedir i napa okenn naryen pou fer avek politik. E i pou en *Board* ki pirman profesyonnel parey mon'n dir oparavan. Bann prosedir pou syantifik e bann lopinyon bann teknisyen pou bann lopinyon syantifik.

Mr Speaker, sa *Bill* ki devan nou, pou osi anmenn sa ki nou apel en lazistis sosyal. E dan sa sans mon pe dir ki sa i pou etabli diferan grad severite sa dezabilite oubyen sa dezabilite ki vin devan sa *Board*.

Alor, ler nou pe get li koumsa i pou vedir ki ler par egzans si ou'n kas oubyen ou'n koup en kote lebra i pa parey ki ler ou *bedridden* e petet ou *wheelchair-bound*. Alor, petet dan sa sans i pou donn en evalyasyon ki fer sir ki i ava apropiye avek sa kalite reminerasyon ki pou ganny donner, pou sa oubyen sa larzan sa benefis plito, pa en reminerasyon - me sa benefis ki pou ganny donner pou sa kalite envalidite.

Mr Speaker, i pou osi elimin labi. Ki fason i pou elimin labi? Akoz dan sa Lalwa, i annan provizyon pou penaliz dimoun si i pe donn fo lenformasyon avek *Board*. Alor, parey i ti ete dan lefase kot ennler zis avan eleksyon ou war gran laliny ki sorti devan *Ocean Gate House* ki ariv kot Moniman Bisantener pou ganny larzan envalidite, pou ganny larzan dezabilite.

Me la an se moman nou pou vwar ki sa *Board* i pou baz tou son evalyasyon lo en baz syantifik. E i pou elimin sa bann posibilite pou annan okenn labi. E provizyon parey mon'n dir in fer pou ki si en dimoun i vini pe fer krwar poudir i annan tel kalite problem, kan i napa. E sa i pou kapab ganny penalize par sa Lalwa. Mr Speaker, sa Lalwa osi pou promot enklisivite, akoz ozordi anba sa Lalwa ou pou vwar ki sa bann dimoun pou ganny sa benefis ki i bezwen. I pou form parti sa *social security* pou li sa dimoun ki i pou fer ki i pa vin en *outcast* dan sosyete.

I pa ganny kite deryer. I annan plen pei dan lemonn ki ozordi dan Lafrik par egzanp kot ozordi bann dimoun ki endikape oubyen, *sorry* ki dezabilite e bann dimoun ki envalid zot ganny mete dan en

kote e zot pa ganny okenn soutyen avek Gouvernman. E la zot vin bann *social outcast*, zot ganny soule kasyet dan lakaz oubyen akoz zot pa pe kapab anmenn okenn benefis dan sa fanmir.

Therefore, zot ganny tou bann *move* tretman posibil. Me la nou vwar poudir Gouvernman in fer sir ki sa pou promot sa enklisivite. Sa dimoun pou kapab annan sa dinyite imen, i pou kapab li osi pe anmenn en serten kontribisyon menm si i pa kapab travay pou son *household* e i pou kapab ede pou li viv byen.

Mr Speaker, ler nou get Gouvernman dizour nou kapab vwar poudir dan sa 2 dernyen lannen - mon pou pran statistik sa 2 dernyen lannen, benefis Envalidite avek Benefis Dezabilite dan Bidze in omwen envalidite ;

115 milyon 2023. An 2024

109 milyon e dezabilite

150 milyon 2023 e

161 milyon 2024. Sa i

montre nou laprev komitman Gouvernman ver sa bann dimoun ki vilnerab. Mr Speaker, pou sa 2 dernyen lannen Bidze anba *Benefit and Approved Programs of ASP* i on ariv R1.2 bilyon.

Ankor i montre nou globalite sa Bidze. I montre nou

ki Gouvernman i reste angaze pou fer sir ki sa bann ki pli vilnerab i kapab ganny en benefis, i kapab viv li dan dinyite, e i kapab vov li byen.

Mr Speaker, lartik 37 nou Konstitisyon i donn drwa pou en *decent and dignified existence*. I dir ou koumsa poudir “*no one should be left unprovided for reasons of incapacity.*”

So, i pe koz lo en sistenm governans ki annan en Sekirite Sosyal ki pou benefis son pep. E se sa ki sa Gouvernman pe delivre lo la.

Mr Speaker, ler nou get osi pandan sa Bidze 2024 komansman lannen le 01 Zanvye 2024 nou vwar poudir anba ASP, in annan omwen 8 diferan benefis ki’n ganny reevalye e ki Gouvernman in met plis larzan ladan pou donn plis benefis bann dimoun pou fer fas avek lenflasyon dan pei.

Mr Speaker, sa i montre ankor ki Gouvernman i angaze pou fer sa bann dimoun kapab ganny en *decent life*. Mr Speaker, i annan menm nouvo Benefis *Multiple Birth, Birth Benefits* ki donner pou bann manman ki ganny *twins* an montan pou 5 an omwen apre ki sa zanfan in ne. Nou’n vwar *foster parents* osi larzan ki’n

ganny ogmante pou ariv ziska R25 mil.

Expectant mothers in annan 233 poursan logmantasyon dan sa benefis sorti 1500 pou ariv R5000. Mr Speaker, se sa ki mon apel en Gouvernman ki annan son pep a ker e ki vreman pe get bann dimoun ki vilnerab.

Ozordi par egzanp Mr Speaker, ki sa Lalwa i vedir pou en paran deor la? Sa Lalwa i vedir ki si ou en paran par egzanp ki annan en zanfan ki dezabilite, ou kapab premyerman ganny en *carer* pou ou ganny lapey en *carer* pou ou vey ou zanfan.

E ou kapab ganny sa larzan dezabilite pou ou zanfan li menm. E ou kapab menm, si ou pe lwe en lakaz *apply* anba *part rental* pou ou kapab gannyen lot Benefis *Part Rental*.

So, anglob ler ou get sa *whole package* pou en paran ki annan en zanfan ki dezabilite. E ki pe lwe en lakaz ou war poudir i pou menm kapab annan li apepre plis ki R15 mil an term benefis ki sa Gouvernman pe donn zot.

Mr Speaker, pou konklir mon poudir sa i en bon Lalwa, i pe al dan bon direksyon. E mon oule felisit ASP avek Minis pou Sosyal pou Zafer Sosyal e son bann dimoun ki’n travay lo sa

Lalwa, ki pe anmenn en gran soutyen pou nou bann dimoun la deor. Avek sa Mr Speaker, mon pou remersi ou.

MR SPEAKER

Mersi Onorab. Laparol pou Onorab Sandy Arissol.

HON SANDY ARISSOL

Mersi Mr Speaker. Bonn apre midi Mr Speaker. Bonn apre midi Minis ek ou lekip. Bonn apre midi tou bann dimoun ki pe ekoute.

Mr Speaker, nou tou koman paran ler nou pe ekspekte en zanfan nou tou nou swete ki nou zanfan i ne byen, an bonn sante san okenn rezon medikal. Me pa tou bonnfwa ki arive sa. Nou annan paran ki sanse, me nou osi annan paran ki ganny en zanfan ki ne avek en abilite spesyal.

Dezyenmman dan lavi parfwa ler ou, ou ne byen i ariv bann lokazyon, par egzantp ou kapab ganny en aksidan, kot ou war ou soudennman ou vin en dimoun ki bezwen viv avek en dezabilite pou leres ou lavi.

Me se pou sa rezon ki ozordi, letan nou pe *focus* lo sa proze Lalwa ki Minis in anmennen, i annan 2 mo ladan ki mon pe tann, mon pe tann mansyonnen se dezabilite avek envalidite.

E ozordi letan nou pe koze, Lekol Eksepsyonnèl in selebre 30 an ozordi. En landrwa spesyal kot nou bann zanfan ki'n ne avek en abilite spesyal, zot annan en landrwa pou zot kapab epanouir, aprann e konn lezot keksoz. E ozordi lasosyete, Gouvernman, tou bann Minis, bann *PS*, tou bann travayer, zot pe ankouraz bann paran ki annan okenn zanfan pou silvouple pa kit zot deryer. Me anmenn zot devan pou zot osi kapab epanouir, devlope, e form par lasosyete ki nou tou nou anvi Mr Speaker.

So, mon'n komans koumsa, parske mon anvi ozordi felisit tou bann dimoun ki fer travay spesyal avek nou bann zanfan sirtou, depi ptipti ziska zot vin sa staz adilt. Parske mon konnen i pa en louvraz fasil, parski ozordi ler ou travay dan lekol avek bann zanfan ki byen, i difisil.

E mon konnen poudir bann ansennyann, bann ankadre, bann dimoun ki responsab pou sa group dimoun, ki annan en dezabilite ki nou travay avek zot, zot pe fer en louvraz eksepsyonnèl, en louvraz ki byen.

Alor, mon ti a kontan felisit zot e kouraz dan sa travay ki zot pe fer zis parey pou bann paran ki viv avek en zanfan ki

annan en dezabilite kot lakaz e sa paran i santi ki i pa kapab al okenn par parey lezot paran i *enjoy*. I pa kapab al *graduation* en lot son zanfan aletranze parey en lot paran i fer. I pa kapab li osi al defoule en zour *weekend* parey lezot bann paran i fer, parske i santi i annan sa zanfan ki bezwen ganny *care* 24 lo 24 parey nou dir 7 lo 7.

E pou sa osi mon ti a kontan Mr Speaker, dir sa bann paran kouraz dan sa travay, kouraz dan sa lanmour ki zot annan pou sa group dimoun spesyalman zot zanfan.

Mr Speaker, mon ti a kontan mwan dan sa proze Lalwa demann detrwa klarifikasyon avek Minis par egzant letan i al fer son *summing up* pou li eksplik nou, parske mon ti a kontan ki dimoun ki pe ekout nou deor zot ganny kler an relasyon avek ki si sa ki nou pe pase.

E souvandfwa letan bann proze Lalwa i vin devan Lasanble Nasyon, mwan mon keston ki mon demande; se kwa e kote zabitan Bel Ombre i sitye li ladan e zot benefisyen ladan?

Premyerman, eski mon ti a kontan demann avek Minis enkli *panel* ki la, eski i annan en travay ki'n ganny fer letan

nou pe met sa proze Lalwa an plas, pou nou asire ki tou bann dimoun ki pe ganny en lasistans envalidite, oubyen dezabilite parey nou apel li, eski tou sa bann dimoun ki la deza dan nou lalis zot devret bann dimoun ki devret ganny asiste? Premyerman.

Dezyenmman, eski nou pe asire ki tou dimoun dan nou pti pei Sesel - tou dimoun ki bezwen gannyen en lasistans dezabilite oubyen envalidite pe gannyen? Akoz mon demann sa Mr Speaker?

Parske parey mon'n aprann dan lepase, *carer* par egzant nou ti aprann avek bann revy ki'n annan, bann travay ki'n ganny fer nou tou nou'n tann bann konplent poudir li i pa ti bezwen *carer*, in ganny *carer*. Letan son *carer* pe netway kot li, pe kwi son manze, li i *Amusement Center*. Nou'n gannyen sa. Se pou sa rezon mon pe demann sa keston.

Dezyenm legzanp, kart *STC* par egzant nou ti ganny dir pou dir i annan dimoun ki ti bezwen kart *STC*. Parey nou ti aprann ki son kart *STC* pe vann oubyen lo son kart pe akimil larzan, sa i montre ki i pa ti neserman bezwen.

Welfare, nou'n aprann kot *welfare* ti annan plizyer dimoun

ki ti pe ganny peye en *welfare* ki son non pa ti lo lalis, nou pa ti konnen lekel li.

So, se pou sa rezon mon'n demann Minis sa premye kestyon, eski i annan sa travay ki pe ganny fer, pou asire ki tou dimoun ki pe ganny lasistans i devret gannyen? E si tou bann dimoun ki devret gannyen zot pe gannyen ?

Dezyenm kestyon ki mon ti a kontan demann avek Minis, oubyen met avek tou dimoun ki pe ekoute, ou konnen souvandfwa letan nou pase dan distrik, letan ou koz avek bann dimoun, sirtou bann dimoun ki bezwen sa lasistans, zot dir ek ou souvandfwa i tarde, i annan 2 *Board* i bezwen al isi, i bezwen pas laba.

Eski sa proze Lalwa ki nou pe vote ozordi Minis, i ava fer ki nou'n tire tou sa bann lezot *Board*. Be nou annan en sel *Board* ozordi atraver sa Lalwa ki ava asire poudir Mr X, ler i vin la *Board* i ava dir *ok*, wi oubyen non depandan lo son abilite parey Lalwa pe dir kot napa vatevyen.

Parski dimoun souvandfwa i dir ek ou, zot bezwen al plizyer fwa. e zot bezwen retournen toultan, tou le 6 mwan i bezwen retournen, in perdi en kote son lebra, son lebra pa pou repouse. Dokter in

donn li en papye medikal ki'n dir ek li wi i envalid i pa pou kapab travay ankor. Me selman *still* i bezwen retourn ankor pou li al fer *assessment*.

E souvandfwa, sa bann dimoun zot pa kapab deplase swa pou zot dezabilite, swa pou zot envalidite. Zot war li difisil, e se pou sa rezon parfwa kekfwa sa peyman i vin tar.

Mon ti a kontan si Minis ou kapab donn nou sa garanti, poudir sa enn ki nou pe fer la ki nou ava donn sipor, i ava permet ki tou sa bann zafer i ava arete kot dimoun i ava annan en sel landrwa pou li ale. E sa *Board* ki ava determin tou keksoz pou serten endividi an relasyon avek son abilite, oubyen son dezabilite, oubyen son envalidite.

Trwazyenm e mon dernyen pwen lo proze Lalwa, mon ti a kontan dir avek Minis, letan nou pe annan sa proze Lalwa la i annan keksoz osi ki bann dimoun souvandfwa zot dir avek nou letan nou vizit zot. Se i annan sa bout konfidansyalite.

Ou konnen i annan sa bout kriye ki zot kriye lo radyo pou ou raporte tel limero lasanm pou vin sa. I dir ek ou letan li i ti al ranpli son bann dokiman pou li ganny sa lasistans, i ti fer li, li tousel avek

swa en fiy oubyen en madanm dan en lofis oubyen en zofisye.

Me 6 er diswar letan pe lir lanons ek mesaz i tande pe kri son non pou raporte tel limero lasanm. Sa i fer ki lapopilasyon oubyen lakominote i konnen i pe rod en servis. Nou ti ava swete ki sa bout ti reste. Parski letan i ranpli son form i osi met son limero kontak. I pa kapab akoz si nou pa ganny 2 dimoun atraver telefonn, ki tou dimoun i bezwen ganny pini parey ki zot non i ganny kriye for, pou zot raporte ki tou dimoun i konn zot zaksyon.

Si nou ti a kapab servi zot limero kontak pou nou *call* li pou nou dir ek li be desann demen apredmen tel tranzaksyon pe pase, alor mon ti a kontan ou lasistans.

So, mon ti a aret la Mr Speaker parske sa i mon 3 pwen ki mon ti a kontan ganny klarifikasyon lo la. Parske mwan mon anvi ki sa proze Lalwa ki nou pe vote ozordi i ava fer parey mon'n dir ki ava annan en sel *Board* ki ava get tou dimoun. E pou nou asire ki tou dimoun ki bezwen lasistans pe ganny lasistans.

E nou swete ki lasistans i pa bezwen retourn ankor tou le 6 mwan, pa bezwen retourn ankor tou le 7 mwan. Letan in ganny tou son klarifikasyon

dokter in sertifye i ganny son lasistans parey nou dir ziska son dernyen zour ziska *Le Seigneur* i ava pare pou pran li.

Me nou fer sir ki personn atraver sa proze Lalwa pa ganny kit deryer, pou nou asire ki tou dimoun dan nou pei ki annan son dezabilite oubyen son envalidite i ganny menm sans. E i ganny son lasistans neseler parey Lalwa i permit li. Mr Speaker, mon ava remersye ou.

MR SPEAKER

Mersi Onorab. Laparol i pou Onorab Naddy Zialor.

HON NADDY ZIALOR

Mersi Mr Speaker. Bonn apre midi Mr Speaker, tou dimoun a lekout. Bonn apre midi Minis e tou dimoun ki lo *panel*. Mon pou komans mon lentervansyon par en slogan ki dir "*Nothing About Us Without Us*." Avan ki mon partaz mon lopinyon vizavi sa prozedlwa ki devan nou, mon ti a kontan dir avek Minis e tou lekip ki'n prepar sa *Bill* ki la, mersi.

E mwan mon war sa koman en kontinite. Ler mon dir kontinite mon kapab dir nou ti komans avek ratifikasyon Konvansyon Bann Dimoun Ki Pe Viv Avek Dezabilite ki nou'n koz lo drwa kot nou'n koz lo

enklizyon kot nou'n koz lo legalite kontinyite.

Nou'n koz lo ki mannyer en dimoun ki pe viv ek en dezabilite i ganny enkli, i ganny sans partisipe, me pa ganny kit a lekar. E i annan travay ki'n ganny fer e mon asire an konklizyon sa Lalwa ozordi, i enn parmi sa bann travay pou fer sir ki i annan egalite e ekite dan nou sosyete ozordi.

Mr Speaker, lemonn i evolye e pandan bann lannen ki'n pase nou'n vwar ki lemonn ti pe adapte en sistenm ki nou dir *medical model*, savedir ou annan en dezabilite pou sertifye ou ganny en lasistans.

E laplipar ditan sa bann dimoun ti pe ganny met dan lakour, parey Onorab ki'n koz avan mwan i dir i ganny en *carer* e la tou dimoun i reste avek sa kalite model.

Me pli ou annan bann nouvo zenerasyon, ou annan bann zenn zenerasyon ki'n vini, nou'n vwar ki non sa i pa sa ki nou koman en dimoun ki pe viv avek dezabilite nou anvi.

Parey mon'n dir nou anvi ganny enkli dan sosyete, partisipe, annan en lanplwa, form parti dan desizyon. E devan nou, mon vwar ler mon dir kontinite mon vwar ki Sesel pe met li a nivo enternasyonal.

Pou ki enn parey mon dir nou sorti dan sa model medikal antyerman e nou bouz lo sa model sosyal melanze avek medikal. E la mon vwar ki lo zot *Board* i non selman annan bann *expert* medikal. Me osi annan reprezantan Lanplwa, reprezantan Sosyal e lezot *stakeholders*, ki fer ki ler en dimoun ki pe viv avek en dezabilite i ganny evalye, i ava annan en sistenm, in ganny evalye an antye dan tou son diferan sekter e non pa zis medikal.

Alors, mon santi ki i a fer en loportinite pou nou koman en pei, pandan ki nou pe evalye son kapabilite. Me nou ava pe osi met lanfaz lo abilite sa endividi. Ki fason nou pou anplifye li pou nou ed li, pou ki

(1) si in *acquire* en dezabilite i

ava ganny sa striktir nesesser, ki pou ed li annan reabilitasyon e kontinyen avek son lavi kotidyen.

(2) Wi, parey mon'n tann en

Onorab ki'n koze i annan bokou fwa letan ou zwenn avek en paran, en zenn ouswa en dimoun par egzantp dizon i ti pe viv en lavi regilye. Mon pa kontan servi sa mo "normal", regilye e toudenkou i vwar li

dan en sityasyon kot i *acquire* en dezabilite.

E la i dir ou gete, enn ki 90 poursan mobil avek en ki *bedridden*, zot vwar zot pe ganny plizoumwenn menm benefis. E mon mazine avek sa Lalwa, i ava en fason pou nou vremen annan sa lazistis annan sa striktir an plas pou nou vremen fer konpran, fer ki vremen nou, nou mon pou servi sa mo nou pran en desizyon baze lo merit.

Alors, mwan osi mon pou annan enn de kestyon ki mon ti a kontan zot touse dan zot larepons.

La mon mazin 2 group dimoun, mon pe zis mazine si zot pou ganny kouver zot osi anba sa *Functional Capability Board*. Sa i bann dimoun ki sourd e bann dimoun ki otizm. Eski zot osi zot pou tonm dan sa kategori?

Aprè dan lenstans kot a ler aktyel ou annan en group dimoun ki pe deza dan sistenm, mon mazine, eski i annan en preparasyon ki pou ganny fer pou ki sa tranzisyon *from the previous Board* e sa enn nouvo i ganny fer dan en fason *smooth* ?

E mon ava osi demann avek departman neser pou annan plis ledikasyon vizavi sa nouvo fonksyon ek sa nouvo

Board, pou ki vremen nou prepar nou group dimoun, fer zot konpran poudir nou bi, bi ozordi se non pa pou *focus* lo ou dezabilite. Me pou ed ou koman sa endividi pou vremen ganny replase dan sosyete e viv en lavi ki endepandan. Mersi Mr Speaker.

MR SPEAKER

Mersi Onorab. Onorab Pillay, ou annan laparol.

HON SEBASTIEN PILLAY

Mersi Mr Speaker. Bonn apre midi *panel* e tou dimoun ki pe swiv. Mr Speaker, mon'n ganny sans pas dan sa provizyon Prozedlwa. E mon bezwen dir ki mon annan serten konsern an sa ki konsern rol Gouvernman, etabli en *Board* ki pou determin serten paramet ki en kontribiter, kontriyab avek Fon Pansyon pou ganny son pansyon.

Mon kapab konpran rol Gouvernman pou etabli paramet an sa ki konsern en dimoun ki pou ganny serten benefis statitwar, oubyen serten lezot sipor sosyal avek en Lazans Gouvernman *mandate* pou donn sa sipor.

Dan sa ka nou pe koz lo *ASP*, si sa dimoun pe ganny en *supplementation of income*, akoz serten en kapasite oubyen

serten eleman son kapasite mon kapab konpran. Akoz sa i larzan Gouvernman.

E larzan Fon Pansyon i larzan sa kontribyan. Ki rezon ki Gouvernman ou annan pou ou vin determin sa? Mon ti ava ekspekte poudir sa se en determinasyon ki Fon Pansyon ki bezwen fer.

Ler mon regard sa prozedlwa ki devan nou, premye kestyon ki vin dan mon lespri se larogans. Mon servi sa term larogans pou eksprim ki mannyer en Gouvernman ki krwar i annan en *super majority*, i krwar i kapab vin fer en propozisyon lamannman en Prozedlwa - amann 3 Prozedlwa, servi en *schedule*, san ekspekte okenn tretman nesaser ki devret ganny donnen avek en Lalwa orizinal.

Mon ti ava apresye ki Lalwa Fon Pansyon i ganny trete dan son totalite, pou eksplik nou ki mannyer modalite en fonksyonman, en tel provizyon i bezwen ganny fer. Mon dir sa Mr Speaker, akoz menm parti ki ti dan mazorite an 2018 dan Lasanble Nasyonal, ti pas en lot lamannman sa letan. E sa lamannman ti pas le 19 Desanm, ti ganny *assented to* le 19 Desanm 2018. Ki ti esansyelman prekonizm en

Medical Board anba Lalwa Fon Pansyon.

Fast forward pa ni menm 6 an pli tar Gouvernman *LDS* i vin avek en lot propozisyon lamannman pou en *Functional Capacity Assessment Board*.

Mr Speaker, sa i prerogative Gouvernman parey Onorab Hoareau in dir i al dan lespri travay ki son Gouvernman pe fer. Bomaten nou'n war en ilustrasyon travay ki son Gouvernman pe fer en transpor ki annan 31 an in ateri lo...

(Interruption)

MR SPEAKER

Onorab, silvouple, silvouple.

(Interruption)

MR SPEAKER

Order, please! Onorab, nou'n ariv lo sa Lalwa. Sa Lalwa i enn ki tret en size vreman enportan. Mon krwar ou pa devret ouver laport pou politik. E ou pa devret ouver laport pou lezot keksoz an deor sa Lalwa. Silvouple annou sey donn legzanp, e annou met nou largiman lo sa Lalwa. Mersi.

HON SEBASTIEN PILLAY

Mersi Mr Speaker. Mr Speaker, i enportan pou ou avek tou

respe komans vin en pe pli toleran, si nou avan sa en largiman ki afekte ou parti.

(Interruptions)

HON SEBASTIEN PILLAY

Akoz lesansyel largiman i lo responsabilite....

(Interruptions)

MR SPEAKER

Onorab, nou deliberasyon i devret lo size ki devan nou. Mon krwar mon tre toleran, e menm mon'n ganny dir mon tro toleran. Silvouple, mon a demann ou mon a fer ankor en lapel silvouple pou reste lo size sa Lalwa?

HON SEBASTIEN PILLAY

Mersi Mr Speaker. Mon konpran ou lapel. Ou lapel i pa en lapel, me ou pe *remind* mwan poudir si mon kontinyen fer politik ou pou koup mwan, ou pou anpes mwan koze. So, lo sa Lalwa i annan en keksoz tre senp ki nou bezwen konsidere.

Premyerman, napa naryen ki kapab ki kestyonn rol en *Functional Capacity Assessment Board* avek son bann eksper.

Personn pa kapab kestyonn son legzistans, aköz in ganny etabli pa zis dan nou

ziridiksyon dan lezot landrwa ki'n etabli li. Me lafason ki nou, nou pe fer li ki mwan mon konsernen. Nou napa okenn pei dan lemond an sa ki konsern en pansyon ki en dimoun i peye, ki en *device* statitwar i ganny kree, pou desid lo kontribisyon ki ou'n fer koman en kontribiyab. Napa, an sa ki konsern pansyon.

Now, en dimoun i ava argimant ek mwan, i ava dir mwan be *ok* nou sistenm pansyon pa parey pou lezot dan lemond. I vre wi, nou sistenm pansyon pa parey pou lezot dan lemond aköz ki mannyer i ti komanse. E apre tou se Gouvernman ki'n *endow* Fon Pansyon avek plizyer resours ki'n investir, re investir ki'n kapab grandi koman en Fon Pansyon.

Me lefe i reste ki son baz prensipal i benefisyè a travers bann kontribiyab. An sa ki konsern *ASP*, i en diferan zafer.

Now, Gouvernman a travers bann sipor sosyal ki'n mete ki mon Gouvernman ler i ti o pouwar ti etabli ki ou bezwen annan en sipor sosyal pou bann dimoun ki vilnerab. Oubyen ki tonm dan en kous sosyete ki pa pou kapab fer *make ends meet*, ti etabli bann benefis statitwar, swa envalidite, swa bann *supplementation of income*.

Swa i annan bann mezir ki ganny etabli ler par egzant en dimoun nepli kapab fonksyonnen dan son lanplwa pandan sa letan ki i pe fonksyonnen, la sa dimoun i gannyan larzan, i ganny en benefis.

Sa ki nou, nou konnen ozordi se ki sa bann benefis i pa koresponn avek *cost of living* ki bann dimoun pe fer fas avek. Napa naryen dan sa Lalwa ki koz lo okenn logmantasyon, ki swa dan Sekirite Sosyal, ki swa dan bann benefis ki ava *meet* sityasyon aktyel an sa ki konsern kou lavi. Par egzant Mr Speaker, san ki mon ep fer politik.

Ou parti ti propoze ki pou annan en logmantasyon dan Sekirite Sosyal pou vin R10 mil ki zanmen in arive. Sa ankore enn fwa i en lot promes ki ou parti pa'n garde avek Lepep Seselwa.

Dezyenman Mr Speaker. Dezyenman Mr Speaker, i annan en lot eleman fondamantal dan sa diskisyon ki nou pe fer. E sa se en eleman kot i konsern ki mannyer ou zize finalman ki en dimoun fonksyonnelman napa kapasite pou li fonksyonnen.

E byensir bann eksper medikal in etabli serten paramet, ki zot assess lo la.

Perdi lebra i annan serten kantite limero, i annan lot kantite limero eksetera. Ziska ler ou ariv lo en *figure total*, e sa *figure total* i determin ki kantite larzan ou pou gannyan par rapor a sa problem ki ou annan.

Me i annan en *gap*, i annan en *capping*. Eski sa dimoun pou ganny R10 mil? Non. Akoz si sa dimoun i ganny R10 mil, i pou al an plis ki bann benefis statitwar ki'n ganny etabli. Ki fer ki i pou prekoniz en logmantasyon nesese dan bann benefis statitwar ki pou akonpany enplimantasyon en Lalwa kapasite fonksyonnel.

Par egzant Mr Speaker, admeton dan en fason lozik en dimoun i en *linesman* kot PUC, e i ganny li en *basic salary* of R7 mil par mwan ek son *allowance* ki fer i ganny li R8 mil.

Zour sa boug pou tonbe pou ganny sa dimal, a premye repriz, eski nou pou kapab donn sa boug R10 mil? E eski nou pou kapab kalkil o fil lannen konbyen larzan sa dimoun ti pou gannyan, alor *match* sa ki nou ti pou pey li tou le mwan pou son kapasite fonksyonnel? Definitivman non.

Me an sa ki konsern son Fon Pansyon ki in peye, *that is another thing*. Sa li ki'n peye, pa

Gouvernman ki'n peye pou li, li ki'n peye. Selman sa larzan ti reste pou li.

So, pou ki rezon ki ou ki pou al fer desizyon lo ki manner Fon Pansyon pou *deal* ek sa? Mon ti ava ekspekte ki Fon Pansyon ti ava annan son prop *mechanism* pou *deal* avek. Me sak Gouvernman i vin avek son Polisi Nasyonal, pou li etablir son fason fonksyonnen. Sa i lafason ki sa Gouvernman in fer, *so be it*.

So, sa it goes to the core of the matter ozordi ki nou pe diskite apre midi dan Lasanble. Menm si pa tou dimoun ki pou dakor avek mon lopinyon, sa i mon lopinyon. Mon santi ki sa 2 size ti devret ganny divize.

Mon dezyenm pwen ki mon'n fer lo komansman Mr Speaker, i konsern zisteman sa ki mon'n apel larogans. Mon pa'n vedir ki Minis i arogan, son *panel* i arogan. Me mon pe dir pou dir *process* ki nou pe swiv i en *process* ki arogan.

Akoz Mr Speaker? Nou ki annan pouvwar Lezislatif dan sa pei, me nou les nou ganny trennen par nou nennen, par Gouvernman ki deside fer lamannman nenport fason ki i anvi.

I en *wild west* kot sa Gouvernman i konsernen, an sa ki konsern anmenn

lamannman dan sa Lasanble. E malerezman, Lopozisyon nou pa dan mazorite pou *keep it in check* mazorite la zis i vin la pou *rubber stamp* sa ki Gouvernman i anmennen.

Mr Speaker, mwan mon pe regard sa bann lamannman dan Lalwa e mon pe *search* mon'n al war ki lamannman i ganny fer dan en *schedule*, kot ou al amann en lot Lalwa atraver *schedule*. Napa naryen mal, napa naryen mal. Be *procedurally* napa naryen mal wi. Me *principle wise*, sa zanmen ti pou arive zisteman Mr Speaker atraver ou. La mon pe ganny enteronpe par *Leader Zafer* Gouvernman ki pe mantoun akoz mon pe koze. Be zot pa toleran zot zis pa anvi lezot dimoun koze. Zot anvi zis zot koze, zis zot ki kapab dir keksoz.

MR SPEAKER

Kontinyen Onorab.

HON SEBASTIEN PILLAY

Mersi Mr Speaker. I enportan pou nou note ki ler nou vin devan Lasanble avek en propozisyon lamannman, mon'n ekout Minis byen. Minis, napa naryen neserman mal dan sa ki Minis in dir. Akoz lozikman i pou marse sa

laranzman, i pou parske napa naryen mal avek.

Me etnikman, etnikman eski sa laranzman i byen? Eski Fon Pansyon napa en lendepandans pou li kapab debout e *stand son ground*? Eski Fon Pansyon i vin en parti entegral striktir Gouvernman ki ozordi Gouvernman ki deside ki Fon Pansyon i fer?

Eski nepli annan en lotonomi oubyen en *division of en delegation of Authority* pou Fon Pansyon kapab pran bann desizyon lo li menm, ki Gouvernman li ki pou vin ek en lamannman dan Lalwa li ki pou fer.

Not an plis ki nou ti fek fer lamannman an 2018. *It is a fundamental question* ki nou bezwen demande Mr Speaker. En trwazyenm pwen fondamantal otour sa size ki nou pe diskite Mr Speaker, i konsern sityasyon aktyel ozordi ki pe arive. Mon ti a kontan, mon oule krwar ki ler nou pou'n entrodwir en tel *Board* nou pa pou ganny ankor bann determinasyon ki dir ek en dimoun, *ok* ou bezwen kapab retourn travay selman al rod *light duty*.

Minis i konnen ki mon pe koz lo la, e mon prezimen PS Sosyal osi i konnen ki mon pe koz lo la. Akoz resaman mon'n

vwar detrwa *case* kot en dimoun i dir ou in ganny en let probableman sa let i korek *I don't know*.

Me i dir ek sa dimoun ki annan 50 an al rod en louvraz ki pou donn li *light duty*. Mon ti a kontan konnen dan nou leksperyans personnel nou tou. Lekel sa bann louvraz ki pou fer en dimoun 50 a 54 an, 55 an menm *light duty*?

Eski i pou al fer louvraz *receptionist*? Me si i pe *compete* avek bann etidyan ki sorti *STA*. E eski i pou al fer louvraz mon pa konnen mwan. Ki *light duty* ki pou annan *filing*? Me i pe *compete* avek bann zanfan sorti *Secretarial School*. So, kote i pou ganny *light duty*?

Si menm sa ou pe ganny mal, *how are you doing to propose* ki ou annan en Board avek tou son konpetans medikal ki vini, ki fer *assessment*, ki apre *down the line* ou sistenm pa kapab *incorporate* li.

Akoz *for lack of a better explanation* pou sa sityasyon ki nou ladan, Minis Rangasamy in dir nou bomaten, Gouvernman i ganny anmare par en kantite birokrasi. I pa mon parol, i parol Minis Rangasamy bomaten.

Aprè ki i ti fer sa *statement*, e ou pa ti permet

nou pou demann lezot kestyon lo la. So, si ou annan ou tou sa birokasi, ki mannyer sa dimoun ki'n pas atraver sa sityasyon, sa tretman.

Ler i fonksyonnelman i ganny trouve kapab retourn travay. Ki sa louvraz i pou gannye pou li kapab re entegre son lekor ladan. *This is what we need to answer as well.* So, i annan bann *mismatch* ki egziste ozordi avek lafason ki lenplimantasyon pe ganny fer. Petet zot pe dir ek mwan poudir demen lenplimantasyon pou ganny fer in *such a way* pou kre kondisyon pou sa dimoun ki annan sa problem, i re ganny son louvraz.

Me lesansyel i reste ki nou annan sa problem ozordi ki bezwen ganny adrese. E ki mon pa krwar poudir sa Lalwa pou adres sa problem ki mannyer i la. Mon pa pe blanm bann dimoun ki'n *draft* sa Lalwa. E zot in ganny lenstriksyon, zot in *draft* zot Lalwa i byen.

Me selman lenstriksyon i sorti en landrwa. E son *Cabinet* note i ganny aprouve par en *Cabinet* par en Gouvernman LDS e se zot ki'n deside fer li dan sa fason.

Prezan mon vin lo mon katriyenm pwen ki konsern Lasanble Nasyonal, e i al ver merit sa Lalwa. I al ver

lenplimantasyon sa nou *Standing Order*. Mon vwar nou'n resevwar en propozisyon pou lamannman lo sa Lalwa, ki menm entrodwir *almost* en nouvo seksyon 40 dan Lalwa Fon Pansyon ki'n ganny anvoye kot nou Lendi ki mon'n vwar sa *email* in ariv kot nou, *ok* ?

Now, Standing Order i dir ou, ou annan 72 erdtan pou propoz en lamannman. Dan sa konteks ki la i paret sa 72 erdtan pe kont Sanmdi ek Dimans tou. Enteresan sa. E ler nou koz lo larogans se sa ki nou oule fer kler lo nou kote latab. Par kont nou Sanmdi ek Dimans pa konte koman en zour pou nou lo nou kote latab. Zot pou zot i konte zot, mon *Standing Order* i donn mwan 6 erdtan pou anmenn en *PNQ*.

Si mon pa anvoy lavey pa pou pase, sa i *ok* sa. So, zot, zot annan drwa enplimant *Standing Order* ki mannyer i ete e vin avek en *full* lamannman ki nou, nou pa ankor ganny ni menm letan prezan pou nou al fer konsiltasyon, pou nou al regard avek nou bann *sources*, pou nou demann bann dimoun pou nou kapab konpran egzaktaman ki pe ganny propoze. *We can't do it.*

With all due respect Mr Speaker, *it is your duty to ensure that we have sufficient*

notice. But you have not done that. So, ki mannyer nou, nou ekspekte fer en desizyon lo en Lalwa - en desizyon enformen lo en Lalwa, kan nou vwar en propozisyon lamannman vin dan sa fason. These are things that are fundamentally wrong avek nou Lezislasyon ozordi.

Note an plis ou ti kapab annan en Lalwa ki an sa ki konsern ASP ti pou anmenn en lavantaz. Me ki ganny mal dan en konpleksite Lezislatif, me osi avek en *lack of interest*, pou fer sir ki tou dimoun i konpran prosedir *just for the sake of accomplishing* en azanda.

Nou bezwen dir sa bann keksoz - napa naryen mal avek - nou la anndan pou nou koz lo sa bann keksoz e pou fer piblik konpran.

Now, i pou annan bann detay teknik ki Minis pou bezwen al ladan pli tar probableman dan *Committee Stage*, nou bann lamannman ki pe ganny propoze lo rol ki sa *Board* pou zwe. E mwan mon napa okenn dout Mr Speaker, ler ou konsider le 2 ekstern en dimoun ki'n ne avek en dezabilite, en dimoun ki atraver en keksoz ki arive dan son lavi i devlop en enkapasite.

Son kapasite pou li fonksyonnen i limite, tousala pou ganny etabli atraver bann

kestyon ki ava ganny demande avek Minis oubyen Minis i ava sorti dan Lasanble apre ler i kit nou. E i ava fer sir poudir lesansyel sa lide asses bann kapasite i a ganny eksplike byen avek tou dimoun ki parti prenon avek sa Lalwa.

I enportan Mr Speaker, mon konpran lanze i annan en dimoun ki annan en kanser, ki annan en problem i pa kapab retourn travay sa osi i afekte son kapasite. Zis parey en dimoun ki'n ne avek en problem tande.

En dimoun ki otreman kapab dan en lot fason, i posib annan en lot problem. Me osi en kestyon ki nou bezwen demande se ki ler ou'n etabli kapasite fonksyonnel en dimoun, eski *on top* sa ki i pe ganny peye si i pe travay dan en landrwa, eski i pou annan drwa *claim* pou li ganny asiste davantaz?

Akoz napa naryen ki anpese sa. Menm si in etabli ki sa dimoun pe travay dan en lanplwa. So, Mr Speaker, i annan tou en paramet en ta keksoz ki pou nesese, pou annan en leksplikasyon en ledikasyon ki ganny fer avek piblik.

Me lesansyel i se sa Lalwa ti devret konsernen avek sa ki annan pou fer avek kot

Gouvernman i pran larzan *taxpayers*, pou li ed bann dimoun ki annan en sityasyon. Pou li *meet* oubyen *bridge the gaps* Mr Speaker.

Pou obliz Fon Pansyon pou reste anba sa Lalwa mon annan serten konsern anba sa Mr Speaker. Mon santi poudir *we are going in the wrong direction, down the wrong road* an sa ki konsern sa.

So, Mr Speaker, an konklizyon mon'n eseye pou etabli prensip lo ki mon pe baz mon bann largiman. Pa neserer ki okenn dimoun i tonm dakor ek mwan lo mon prensip ki mon baz mon largiman.

Me mon'n baz mon largiman lo bann esansyel ki mon krwar i neserer an sa ki konsern sa Lalwa. I annan serten keksoz ki mon reste e toultan en gran defander; ki toultan en dimoun ki napa en kapasite pou li fer keksoz i devret ganny asiste dan en serten fason, akoz i pa permet li pou zuir en lavi konvenab e an dinyite parey nou Konstitisyon i demande. Me pa zis sa, parey nou sosyete i egzize.

Dezyenmman mon pou reste en defander, okenn dimoun ki bezwen ganny en *supplementation of son income*, se akoz par son kapasite i nepli kapab *fulfil* son lobligasyon

anver son fanmir ki annan pou li sonnyen. Napa naryen mal avek sa, i neserer sa. Me veikil ki nou servi pou servi li la nou kapab annan diferans. Nou prensip i pou reste parey.

Ki apre tou, nou tou nou Seselwa e nou tou anvi sa ki pli bon pou frer ek ser.

So, Mr Speaker, mon pa oule ou ankoler ler bomaten nou'n fer referans avek sa *pickup* oubyen sa bis ki ti lo por. Me i ti neserer pou eksplike ki manner ou Gouvernman *should be doing...*

(Interruption)

MR SPEAKER

Aret fer referans avek Speaker silvouple.

HON SEBASTIEN PILLAY

Well, mersi Mr Speaker. Mon aret fer referans avek ou. Parey mon'n dir an konklizyon Mr Speaker, ou Gouvernman, I *mean* Gouvernman LDS i devret kapab fer pli byen. Me si i pa kapab fer pli byen Mr Speaker, lesansyel i reste senp. Lesansyel i reste senp e i reste kler pou li. Mersi Mr Speaker.

MR SPEAKER

Mersi. Onorab Loze ou annan laparol.

HON JOHAN LOZE

Mersi Mr Speaker. Mr Speaker, avek ou permisyon mon oule mon osi komans avek sa fraz “*Nothing About Us Without Us*” ki en slogan *disability activism* ki dan son sans modern in oriziner Sid Afrik par bann *disability activist*. Me selman i en fraz bokou pli vye ki sa, i en slogan sorti Lerop depi bann lannen 1500.

Rezon mon komans avek sa Mr Speaker, se aköz si nou pou get *front page* Nasyon le 7 Oktob 2021 *Seychelles Nation* la nou pe koze. E nou vwar poudir *headline* i read *National Assembly approves to dissolve Council for Elderly and Disabled Persons*. Yet, nou pe promot en slogan “*Nothing About Us Without Us*” . Apre ki nou’n *repeal* Lalwa ki ti permet sa ki nou pe koz lo la annan en se atraver son *Council*.

E prezan Mr Speaker, sa ki pli enteresan ladan al get lo verbatim Lasanble lekel ki ti prezan, *present and voting*. Mon konpran aköz ozordi dimoun pe koz “*Nothing About Us Without Us*”. Parske ler konsey ki ti permet *us to be present in the room to have a sit at the table* pou diskrit sa bann keksoz ti ganny fiziye dan son latet, asasinan nou pa ti la nou. Nou

ti al kasyet sa zour, ti napa *about us*, nou pa ti la.

So, nou bezwen en pe onnet dan sa Lasanble letan nou koze. Mr Speaker, further mon lot pwen. I bezwen annan rekonesans e remersiman pou nou bann profesyonnel ki’n anmenn sa lager, sa travay lo sa bann *Board* ziska prezan.

Nou bann profesyonnel ki’n met ansanm sa bann lezislasyon ki devan nou. E nou bann profesyonnel teknisyen ki pou al lo sa *Board* ki pe ganny kree par sa morso lezislasyon ki devan nou ozordi.

Nou bezwen remersye e salye zot pou zot zefor. E sa travay difisil ki annan pou zot fer. Nou pe koz lo en size ki sansib, e ki pa fasil aproz aköz i annan en morso dan prezantasyon Onorab Sandy Arissol ki’n tous mwan. Resaman mon’n an kontak dan nou bann travay politik ki nou fer lo teren mon annan kontak avek en paran ki i *virtually* en prizonyen son zanfan.

I pa kapab bouze, i pa kapab naryen. Sa madanm i en karnasyon sa *it takes a village*, aköz li lo li menm pa kapab *survive*. I bezwen led, i bezwen lasistans, i bezwen dimoun. Al laboutik keksoz ki nou, nou pran *for granted* nou pran li normal *everyday things* li i pa

kapab li. So, mon'n konpran sa bout kot Onorab Arissol in lev sa pwen konsernan bann paran.

E se la sa bann bout sansib, sa bann bout travay kot nou pou bezwen salye sa bann teknisyen e profesyonnel ki pou al lo sa *Board*. Akoz sa i pa bann louvraz ki ou zis fer 8 er, 4 er apre ou al se ou, ou *leave it in the office*. Nou bezwen annan respe pou nou *social workers*, nou bezwen annan respe pou nou bann *medical professionals*.

Nou bezwen rekonnet e salye zefor ki zot fer dan nou pei. Pa nou tou ki ganny sans et ekspoze. Pa nou tou ki al vizit kot difikilte i ete. Pa nou tou ki menm okouran *or even care*. Me i pa fasil, i pa fasil e bann dimoun ki'n pran sa koman en vokasyon, ki'n swazir sa koman zot profesyon.

Mon swete ki nou rekonnet zot, nou salye zot e nou *reward* zot letan in ariv ler pou nou *reward* zot. Lo tou nivo sa bann dimoun ki fer sa bann travay difisil e sansib.

E sa i mon *stand lo health care workers* pandan lontan mon pe sey anmenn sa *torch*. E mon *extend* li ozordi pou nou bann *social workers* e pou nou bann profesyonnel osi ki pou al lo sa Komite. Akoz i pa en

keksoz fasil. Mon trwazyenm pwen ki mon anvi touse Mr Speaker, resaman nou koz bokou lo *inclusivity*.

E Minis, mon oule balans en keksoz la en boul dan ou *court*. *How do we attain? How do we achieve inclusivity Minister?*

Sa i zis pou en refleksyon, mon pa pe demann ou pou en larepons. Ouswa mon pa pe met li ou, ou *shoulders* koman en boul politik konmsi la. Me selman en refleksyon ki nou tou nou bezwen fer. Nou pe dir *inclusivity*, nou pe *push for more inclusivity*. *But realistically how do we translate sa into the real world?* Eski nou pou bezwen serten *positive discrimination?* Eski nou pou bezwen konsider lezislasyon ou lamannman lezislasyon lanplwa?

Eski nou pou bezwen bann *scheme* ki a swa *reward* ou ankouraz bann *employers* pou *apply positive discrimination* ki nou ava vwar sa *inclusivity* ganny translated into the real worlds. Sa *inclusivity* ki nou tou nou pe koz lo la.

As it stands nou pe koze. Be mon pa konnen Minister ki manner nou pou pous sa azanda devan pou nou solidifye li. I byen nou pe koze, be *what is the next step? What do we do*

next? Ki fason ki nou kre sa lenklizyon dan realite?

Ki mannyer nou ankouraz en lakonpanyen pou li *bring onboard* en *sourd muet* dan son lakonpanyen? Akoz son 2 lanmen i bon, son lizye i bon, posibleman i *deaf* e i pa koze. Me i annan son nivo fonksyonnalite.

So, kan mannyer nou pou *translate* sa pou li vin en *real employment possibility*? Akoz nou Sesel nou napa ni lor, ni dyanman nou. Sa ki nou annan se dimoun, so mon konpran lozik enklisivite. Akoz nou pe koz nou *No.1 resource* ki nou annan, nou dimoun.

Wheather i annan limitasyon dan son fonksyonman, ou non, i *still* nou resours pli presye. Alors sa i mon trwazyenm pwen ki mon ti'n oule leve.

Mon katriyenm pwen ki mon anvi touse se ki nou konpran Lalwa. Mwan mon konpran Lalwa kot ou etabli ou en baz fonksyonnalite, mon krwar i *from* son negativ ki zero an montan. E bann lesansyel i ganny fer dan en fason syantifik par sa Komite ki pou ganny etabli.

E dimoun i ganny *assess* dan en fason endepandan, parey mon'n tann Onorab Hoareau dir boner. Ni ou kouler

lapo, ni ou ras, ni ou naryen pa ganny pran an konsiderasyon. Ki lo son sirfas mon war i en keksoz fantastik. Mon swete i marse, e mon ankouraze ki i ava marse.

Mr Speaker, la ki mon'n fini tous sa bann bout, mon vin lo mon dernyen pwen mon krwar mon anvi leve i Gouvernman li menm. Sa Gouvernman dizour, ki mon'n tann dir a plizyer repriz bomaten.

Mwan personnelman mon annan en mefyans fas avek sa Gouvernman. I annan en pe letan mon pe dir. Mon ezitan pou met okenn zouti dan lanmen sa Gouvernman, ki mwan mon a konnen ki i pe al fer avek. Ou donn li en zouti ozordi pou travay avek, demen bomaten ou tann pe kri lasasen.

I vin devan Lasanble i dir ou fer en lamannman, kre en *unit* pou *manage* bann byen sezi. *The next thing* ou tande, zot in pas en kontra avek en lakonpanyen Angle ki pe donn bal dan propriyete Mr ek Mrs Valabhji. Pourtan mwan koman en lezislater dan Lasanble Nasyonal, mon'n fer en lamannman...

(Interruption)

MR SPEAKER

Onorab! Onorab! Ou pe fer bann alegasyon ki mon pa kapab ziz son fonman. Mon ava envit ou pou envite fer bann tel alegasyon, zis pou nou kapab ganny sa kler. Mersi.

HON JOHAN LOZE

Mersi Mr Speaker. Souvan mon ganny sa larepons ki mon bann keksoz ki mon dir pa kapab ziz fonman, napa ase lenformasyon, ki fer ki ziske ozordi mon napa en *ruling* lo mon *point of order* ki mon ti demande lo *plagiarism* dan Lasanble Nasyonal. Menm apre ki fonman in ganny etabli...

(Interruption)

MR SPEAKER

Ok Onorab. Ou kapab kontinyen avek ou deba lo sa *Bill* silvouple.

HON JOHAN LOZE

Mon konnen Mr Speaker, mon santi zot douler, i fermal. Wi Mr Speaker, mon bann mefyans kot i vini avek poz en zouti lezislatif dan lanmen sa Gouvernman.

E la Mr Speaker, mon pou etabli mon largiman aköz pli boner mon'n tann en fraz ki'n dir parey ti ete dan lefase gran laliny avan eleksyon depi tel

landrwa ziska tel landrwa. Mon sipoze nou lib pou al dan bann laliny parey ti ete dan lefase, aköz in deza bann laport ki'n ganny ouver.

Be si nou eksplor en pti pe parey ti ete dan lefase, bann premye keksoz ki Gouvernman *LDS* in fer se ogmant pri bis. Lekel ki mars dan bis? E la kot mon mefyans i vini mwan. Lekel ki mars dan bis milyonner? Malere.

Malere ki mars dan bis. Si nou al parey i ti ete dan lefase, mon anvi vizit sa zour ki isi dan Lasanble Nasyonal kot nou ti ganny enformen *much to my chagrin* konmkwa ti annan zis 115 dimoun ki ti reste lo benefis *ASP*, 115 pa 4 mil parey mon ti ganny korize anvoy deor. Me 115.

115 dimoun dan sa Sesel antye. E la ozordi ankor mon pe ganny demande pou mwan met en zouti dan lanmen sa Gouvernman ki'n martiriz tou sa dimoun ki ti pe ganny lasistans *ASP*, fer desann ziska 115.

Ki enn son bann premye aksyon, sete pou ogmant pri bis pandan bann letan ki zot, zot ti pe monte desann dan *first class*. Mon pe ganny demande pou donn zot en lot zouti lezislatif la ki mon pa konnen ki zot pe al fer avek.

E ou konnen ki nou ganny dir Mr Speaker? Benefis dan Bidze i en laprev. Benefis *Approved Programs* in ogmante i 1.2 bilyon mon krwar nou'n ganny dir. Me Mr Speaker, 1.2 bilyon zot mete dan Bidze zot.

Ler zot met dan Bidze zot kriy for 1.2 bilyon. Konbyen zot rann? Konbyen zot fer retourn dan Bidze lafen lannen ki zot pa'n servi, akoz zot in tret sa pep ki apel Seselwa dan en fason visye e mesken?

Akoz zot bat tanbour zot ti met 1.2 bilyon. Konbyen zot ti rann? Konbyen dimoun ki zot in servis avek 1.2 bilyon? E bann lot parol ki mon tann dir Mr Speaker, ogmant lefikasite servis piblik. *How is that working out for you?* Zot ogmant lefikasite dan servis piblik par martiriz tou sa dimoun ki ti pe ganny lasistans ek *ASP*?

Mr Speaker, kot mon dir ou mon mefyan? Mon ti asiz isi anndan mwan, ler ti pas Lalwa *Home Care Agency*. Onorab Samynadin ti dir koumsa, ou pa zis en anplwaye sa *agency*.

Me ou pa en anplwaye sa *agency* ditou *at all*, pa ti dan Lalwa *at all*. Me kwa ki'n *improve* pou bann *carer*? Kwa ki'n sanze pou bann *carer*? Nou ti dir isi la anndan ki *carer* pou ganny *loan*, pou kalifye *loan* zot pe al ganny anploye.

Eski *carer* in gannyen anploye? Eski zot kalifye *loan*? *Carer* pou al ganny *training*. Zot in gannyen *training*?

Sa Mr Speaker, mwan i sours mon bann mefyan, e sa mon pe koz lo sa *segment* parey ti ete dan lepase ki Onorab John Hoareau ti ouver. E Onorab Hoareau, in koz bokou lo *part rental*, in menm dir ki ou *total package* i kapab R15 mil.

Sa menm *part rental* Mr Speaker, ki dimoun ti pe kriye dan miting piblik ti pe demann Prezidan kan mannyer ou fer pou gannyen.

Mon pa konnen si ou rapel Mr Speaker, Prezidan ti dir koumsa demen bomaten desann avek ou resi ki ou'n pey lakaz. Desann avek la, la desann avek ou resi ki ou'n pey lakaz ou a ganny *part rental*. Ti dir dan *meeting* piblik...

(Interruption)

MR SPEAKER

Onorab, ou pa pe koz lo *Bill*. Alor mon pou demann ou, mon pou demann ou konklir silvouple. Konklir.

HON JOHAN LOZE

Mr Speaker, mon kapab konklir, mon mikro i kapab ganny koupe. Selman en keksoz ki Johan Loze i fer, i koz laverite

dan sa Lasanble. I koz laverite dan sa Lasanble, sa tou Seselwa i konnen. Bomaten menm ler ti ep koz lo bis kales kase, enn in sey met parol dan mon labous ki mon pa'n dir e deswit mon'n korize.

Johan Loze, i koz laverite. E sa *statement* ki mon'n dir Prezidan in dir la, ki mon tann zot laba pe rouspete pe dir lalang taler zot pou war *video* pe sirkile, taler zot pou war.

E mwan mon pe senpleman lev sa size aköz in ganny leve ki zot Gouvernman i sitan *benevolent*. Zot sitan donn led e lasistans, i kapab ariv R15 mil zot donn isi, zot donn laba. Mr Speaker, ou Gouvernman i en Gouvernman ki ay sa pep.

Zot in martiriz Seselwa zot pa kontan Seselwa. Sa mon pou dir zot pran dan zot figir. Si zot ti kontan Seselwa, sa ki zot in fer pandan sa 3 dernyen lannen, zanmen zot ti pou'n fer ek sa pep. Zot ay sa pep...

(Interruption)

MR SPEAKER

Bon, terminen. Mersi.

(APPLAUSE)

MR SPEAKER

Mersi Onorab. Mon a met en limit 15 minit pou bann

entervenans pou le moman. Onorab Aglae ou annan laparol.

HON EGBERT AGLAE

Mersi Mr Speaker. Mon poudir bonn apre midi Minis, Dokter Valentin, Mrs William e zofisye legal mon prezimen non. Manmzel Tirant sorti Bel Ombre kot Onorab Arissol. Mersi.

Mr Speaker, i annan en *Bill* la devan nou ki pretandan mon kapab dir ki pe swadizan pou etabli serten fason fer ki pou anpes diplikasyon. E osi pou nou get 2 group dimoun mon kapab dir ki dayer ki en pei i ganny osi gete par lafason ki i tret son bann dimoun aze.

Parey nou dir en bann pilye, en bann pilye dan bann lendeks enternasyonal parey nou tret bann dimoun dezabilite ouswa nou bann dimoun envalidite. Mon krwar sa i enportan.

E mon osi rekonnèt ki poudir Gouvernman lepase in fer en kantite pou kapab donn sipor sa bann dimoun dezabilite, ouswa ki ganny envalidite pou bann diferan rezon ki zot pa vin en fardo lo fanmir ouswa en *burden* lo lasosyete.

E se sa ki zot ti ganny asiste. E si nou pe selebre osi 30 an ki nou annan nou en Lekol Eksepsyonnèl ozordi ki

dayer se bann travay dir ki'n ganny fer dan menm laliny, sa nou rekonnet sa.

Me Mr Speaker, mon santi mwan parfwa serten komanter ki i annan en Onorab in fer lo kote latab, kot in dir dan letan eleksyon ti annan laliny ki ti ganny mete kot servis sosyal. E sa ti fer referans avek dimoun dezabilite ou envalidite, ki dayer pou mwan sa i pa korek, akoz i annan en formil ki ganny fer pou kalifye en dimoun pou ganny lasistans dezabilite ouswa envalidite.

Alors zot byen in ganny, zot benefis mon kapab pa zot byen, zot benefis dabor in aprouve pou zot resevwar. Si zot laba pe al sers zot larzan, se akoz i annan en *approval* ki'n ganny donnen par en *Board Medikal* parey ti ete avan.

Letan mon pe regarde Mr Speaker, mon krwar parey bann lenstans, bann lenstitisyon ki ganny zere i annan bann *Board* ki ganny etabli, *ok*.

Bann *Board* byensir i annan zot bann direksyon ki zot bezwen swiv letan zot ganny etabli. I annan prosedir ki si ou pa satisfè avek en desizyon *Board*, ou ava fer ou *appeal*. I osi koz lo fonksyonman bann Manm *Board*, baze lo

apwentman ki dan sa konteks Minis ki bezwen fer.

Sa mon napa problem ek sa mwan Mr Speaker. Mon konsern mwan i vin avek i annan keksoz nou pa pe war ki pa kapab ganny mete osi dan sa *Bill*, akoz i bezwen vin atraver swa Polisi, swa bann *side regulation* parey nou dir.

I annan keksoz ki bezwen ed nou koman bann Manm Parlman pou mwan kapab fer en desizyon si nou pou vot an faver sa *Bill*, si nou pa pou siporte, ouswa si mon pou *abstain*.

Mwan mon dir sa akoz mon pe war serten eleman, malgre serten Manm lo lot kote latab in koze i dir i bon direksyon, i bon kot nou pe ale, me nou bezwen kosyon akoz letan pou annan bann desizyon ki pou ganny pran, ki pa al an faver sa bann endividi ki bezwen sa lasistans i pou retourn *back* kot nou menm nou.

Lo nivo distrik koman bann Manm Parlman ouswa kot Ladministrasyon distrik. Mon dir akoz i annan sa ki nou apel sa *Functional Assessment Tools*. Nou, nou pa konnen ki annan ladan nou. Nou pa konnen ki bann kriter ki bann barenn ki pou ganny servi.

Mon ti a swete parey avek *Home Care Agency Act* in lir son *Act*, in spesifye serten kategori lafason ki ou kalifye pou ganny led lasistans *home care*.

Par egzanp in mansyonnen, i annan serten poursantaz 20 poursan ou *income* ki pou ganny kalkile e la ou ava gete ki pou fer. Me dan konteks la, letan sa *Board* pou zwenn li menm li i pou fer sa *Functionality Assessment* mon ti a kontan konnen lekel bann kriter parey *ASP* avan i donn en lasistans li i annan sa bann lendeks ki nou apel bann *weights* ki zot met devan, ki zot kalkil tousala lo la.

Mon ti a swete dan sa konteks pou nou pli enformen war sa nou. Eski premyerman parey letan en dimoun in kalifye, in *meet* sa kriter tou benefis pou mars parey.

Parey envalidite ozordi, dizon ou pe donn en legzanp si en dimoun ti pe ganny R7000 mil tou dimoun i kalifye envalidite pou ganny R7000 mil. Ouswa eski letan zot in fer zot bann *assessment*, zot war poudir son *functionality* i pou baze lo serten poursantaz pou kalifye 50 poursan, 60 poursan, 80 poursan, ziska 100 poursan. Lala bann benefis monneter ki atase avek pou sa bann dimoun. Eski sa pou koumsa?

I enportan pou nou konnen, akoz pou annan bann disansyon dan en fason, pou nou kapab ouswa enn pou vini dir be akoz li i pe ganny tan, lot pe ganny tan, lot pe ganny tan. Sa i enn.

Dezyenmman, eski bann kriter parey anba *Home Care* i servi ozordi baze lo abilite familyal i pou ganny pran kont osi. Nou anvi konnen sa nou. Eski si ou fanmir petet i en pti pe eze i pou bezwen pe *chip in* en poursantaz dan sa bann benefis ki ou pou gannyen ?

Konpare avek Fon Pansyon i en pti pe fonksyonnen ozordi. So, sa i enportan pou mon konnen, akoz mon pou war serten presedans, mon pa anvi war bann presedans ki pou vini pou dir be la i pe ganny defavorize la i pa pe ganny gete ouswa sa enn pe pase.

Nou anvi anmenn *fairness* dan sa lapros. Me selman nou bezwen konpran ki mannyer bann modalite, zouti, pou ganny servi pou kategorize. E pou determin sa desizyon final an term sa dimoun ki annan dezabilite e osi sa envalidite.

Mon konpran poudir i annan sirkonstans ki sityasyon lasante en dimoun i kapab amelyore, e menm deteryore tou i annan sa. Savedir pou annan

bann *re assessment* ki ava bezwen ganny fer, bann *periodic review* ki ava bezwen vini avek letan, mon konpran sa.

Me selman osi ki kalite peryod ouswa mon kapab met li koman sa *timeframe* ki en dimoun pou kalifye apre ki i pou *subject* pou en *review*. I annan ki kondisyon i pou bezwen pe ne avek, i pou mor avek i pa pou sanze, tousala.

Ouswa i annan ki kapab annan bann devlopman inovativ dan lasante ki kapab vini, ki a permet li re etabli li avek son kondisyon ki i ladan. Tousala nou bezwen pran kont.

E mon ti a swete ki dan *assessment tool* koumsa sa bann keksoz i bezwen kler pou nou. *Right now*, nou pe vot lo en *Bill*, me selman nou pa konn bann modalite ki atase avek. E se sa ki mon santi poudir i enportan.

Lo kote Fon Pansyon parey Onorab Sebastien Pillay in koz lo la, mwan osi mon santi poudir i pa rol Gouvernman pou li met dan en fason dikte mon kapab dir, kot i konsern Fon Pansyon.

Akoz Fon Pansyon i larzan ki sa bann kontribiter endividi ki'n travay in kontribye. Sekirite Sosyal, sa ki nou apel pou Gouvernman sa i sorti dan en laliny Bidze ki *taxpayers*

money sa mon napa problem ek sa mwan.

But when it come to Pension Fund, mon santi poudir zot bezwen konsider en fason fer. Ki sa endividi i pa war li letan in ariv dan en sityasyon i bezwen *subject* al an zenou. Mon bezwen met li koumsa mon al an zenou devan en *Board*, i kapab petet i gannyen, ouswa i pa gannyen. Ouswa i ganny en sonm ki pa pe permet li pou li kapab *survive* lo la, malgre in travay *for so many years* ki'n kontribye.

So, mon santi poudir sa bout ki la i annan nesosite pou revwar e fer serten pa konnen ki mannyer nou pou regard li. Si zot leksplikasyon i kler petet i ava annan en fason fer. Me selman annou regard li en pti pe de lavan.

Akoz si nou pe fer Lalwa annou fer li byen. Ki i pa bezwen demen vin en langwas ouswa en lanbarasman pou en dimoun ki pe vin rod son benefis.

So, Mr Speaker mwan mon annan bann rezervasyon dan sa bann laliny. Akoz i annan en kantite dimoun pe ganny en lasistans ozordi envalidite ouswa *disabled* ki merite. E osi parey *Home Care* letan ti pas son Lalwa 2022 mon krwar. Nou ti pas sa Lalwa

Home Care Agency an pretandan dan lapros ki ti ganny pran sete ki, zot pou al revwar bann ki merite ouswa bann ki pa merite, *ok*?

Mon napa problem ek sa si bann *assessment* bann determinasyon i kler, i ava. Selman annou pa servi sa Lalwa la ozordi ki nou pe al pase osi pou kapab pini, nou pa oule al pini personn avek en Lalwa.

Lalwa i la pou gid pou fer keksoz vin pli byen me selman pa pou pini. Me selman si i annan bann lenstans ki zot war poudir i annan serten ki petet desizyon ki ti ganny pran i pa ti neserman 100 pousan korek, ou a bezwen annan en negosyasyon ki a ganny fer.

Me selman annou pa al pini personn. Sa i mon pwen, sa i mon kontribisyon. Mersi Mr Speaker.

(APPLAUSE)

MR SPEAKER

Mersi Onorab. Mon annan 4 Manm lo mon lalis ki'n demann laparol. Onorab Henrie, Onorab Cosgrow, Onorab Naidu e Onorab Georges. Mon ti a kontan ganny non bann Manm ki ti pou entervenir. Bon, si napa nou a ferm lalis avek sa.

Nou a pran poz e nou a rebran 4 er. Mersi.

(BREAK)

MR SPEAKER

Nou a rebran lo deba. Laparol pou Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun e mon ava dir Minis ek son *panel welcome* dan Lasanble Nasyonal.

Mr Speaker, *strengthening quality of the Social Protection System Program for results projections*, i en program ki Sesel in antre an negosyasyon avek *World Bank* avek lobzektif fer 2 keksoz. Lo en kote annan pli bon kordinasyon tou bann lazans ki dil avek kestyon proteksyon sosyal. E lo lot kote asire ki bann dimoun ki dan bezwen i ganny en pe plis led.

Now, pou nou tou isi anndan ki swa Lopozisyon ki yer ti dan Gouvernman avek nou ki dan aprezan nou dan Gouvernman, si nou annan en nosyon ki mannyer Gouvernman i fonksyonnen, nou pou bezwen mazine ki okenn program ki en pei i antre ladan avek *World Bank*, ou pa komans negosye ozordi pou demen rezilta, i pa mars koumsa, i pran en kantite letan.

E alor sa ki mon pe dir se ki sa program ki a gran parti i vin sa *Bill*, i en zafer ki lontan i pe flote dan sistenm Gouvernman.

An Novanm 2021, *Cabinet* ti diskite sa *Bill*. E ti annan en *press release* ki ti sorti apropo *Bill* ki devan nou ozordi. An Novanm 2022, nou a rapel dan letan Bidze, letan Minister Zafer Sosyal ti vini e *ASP* ti la, size sa Lalwa ek sa program travay avek *World Bank* Mrs Morin ti koz lo la. E mon fek tyek verbatim, Dirizan Lopozisyon ti demann li en kestyon spesifik lo la.

Novanm 2023, *Cabinet* i rekonsider ankor sa *Bill*, Vis-Prezidan i koz lo la dan en *press conference*. Setadir piblik Seselwa e bann Manm Lasanble, si nou enterese avek nou travay pou swiv aktyalite. E travay *Cabinet* i en size ki nou bezwen swiv, akoz *then* nou konnen lekel bann Lalwa ki pe vini *further down the road*.

So, nou ti bezwen konnen e ozordi i pa merit en sirpriz pou tou dimoun, e komans lev bann kestyon ki pa nesese lo sa size. Sa ki nou bezwen tonm dakor ant Lopozisyon ki en parti sosyalis/kominis avek nou en parti liberal, se ki nou oule pou Sesel? Ki nou le?

Sa ki nou pe fer la dan sa Lalwa, i etabli en prensip en fason fer pou *assess* degre envalidite avek dezabilite bann endividi dan nou sosyete.

So, eski nou oule ki nou adopte sa sistenm ouswa non? *That's what* nou merit dezagree lo la. Wi ouswa non? Si wi, eski fason ki i pe ganny prezante i byen ouswa non? E akoz i enportan pou nou koman en pti pei pran aksyon lo size reveni pei ki nou depanse dan proteksyon sosyal.

Sesel i depans 7 pousan son *GDP* dan proteksyon sosyal, 7 pousan. E sa i pli o ki tou pei Sid Sahara ki tou pti leta zil dan lemond e menm bann *upper middle-income countries*. Kestyon nou merit demann nou lekor koman bann *leaders* dan kominote, eski nou sistenm proteksyon sosyal i soutenab?

E i enn bann rezon akoz ki laz retret in bezwen sanze sorti 63 an pou vin 65 an. Nou'n war statistik resan ki'n pibliye dan medya nou pe depans zis avek *retirement benefit*, R69 milyon par mwan ki pe tonm ou apepre 800 milyon par an.

E si pa ti'n sanze, sa sonm ti pou'n ariv R1.2 bilyon ki fer li ekivalan avek Bidze Ledikasyon avek Lasante. Eski i soutenab? E tou larzan ki nou ramase dan *income tax* kantmenm mon

bann zanmi koze larzan *tax*, larzan *tax*. Tou larzan *income tax* i al *pey retirement benefit*.

So, dan son totalite nou pe bezwen gete poudir ok, reveni ki nou annan koman en *pti pei how best* nou proporsyon li, pou asire ki bann ki dan bezwen i ganny en pe plis.

E sa reform avek *World Bank* Mr Speaker, in vin dan diferan faz. Akoz in annan reform dan *Home Care* par egzantp. Akoz i enn bann target ki ti annan anba sa program. Akoz *retirement age* ki dayer ansyen Prezidan Faure ti fer lanons lo la an Zilyet 2017 pou vin an aplikasyon le 01 Zanvye 2023. Setadir, *the former administration knew about this reform a long time ago*.

E ozordi Lopozisyon pa kapab vin fer nou krwar poudir zot pa konnen ki pe pase. Sel keksoz ki zot bezwen dir nou si zot dakor ki nou adopte sa sistenm, pou mye evalye bann dimoun avek dezabilite e envalidite. Si non, zot propoz zot alternativ. Si wi, nou tonm dakor ki mannyer nou mye kapab amelyor li, sa ki nou bezwen tonm dakor.

Lezot pilye in vin zisteman *assess envalidite* avek dezabilite bann dimoun. E en lot pilye ki pou vini pou annan

en rezis ouswa sa ki nou apel en *social register*.

Alor Mr Speaker, sa *Bill* i vin dan en bon moman. Minis dan son prezantasyon inisyalyal in dir nou i form parti reform proteksyon sosyal. E mwan mon osi ava dir ki i form parti sa program transformasyon ki nouvo ladministrasyon pe met an plas.

I pe met Sesel lo en standar enternasyonal, e met li anliny avek bann pratik atraver lemonn. E mon ava dir mersi dabor bann *expert* bann *panel* ki la lo *side table* tou, pou akonpany nou. Akoz zot ki bann *expert*, nou pe ekout zot.

E mersi pou sa travay ki nou pe fer pou pep Seselwa, pou Sesel e pli enportan lavenir nou pei. Parski nenport ki ladministrasyon ki vini i bezwen regarde ki mannyer i zer aki pei.

Ou pa kapab zis zer li dan en fason, kot letan ou ale vini o pouvwar ouver tiyo apre ou kit kof vid. Non, non, non, nou pa kapab fer sa akoz nou bezwen trakas lavenir e mazin lazene Seselwa.

Mr Speaker, dan son entervansyon Onorab Pillay in koz lo, in kestyonn plito. Akoz i bezwen annan *2 Board*? E in sey anmenn largiman ki Fon Pansyon i pou bann Manm alor

Gouvernman napa drwa enterfer.

Mwan mon ti a plito war li dan en lespri de *Board*, e pou benefis bann dimoun ki pe ekoute. Akoz lontan Lazans Proteksyon Sosyal ti annan en *Board* Medikal ki ti dil ek son bann kliyan. Fon Pansyon ti annan enn, e la i pe fer vin en sel *Board*. Alors, i ava annan plis lefikasite.

I pou anmenn en pe plis lazistis pou bann kliyan, akoz bann *case* aprezan i merit bouz pli vit. E zot merit ganny en larepons dan en letan ki rezonnab. E i donn pli bon kordinasyon ant sa 2 lazans, e alor pou mwan sa i bann keksoz ki byen.

Mr Speaker, sa ki mwan mon ti ava swete vwar se ki menm ler sa bann *Board* Medikal nou konpran tre byen ki poudir ler zot pou fer zot revi lo bann kliyan, i pou baze lo rapor medikal ki pou vin devan zot.

E zot pou get bann keksoz bann laspe fizik, mantal, psikolojik, e baze lo zot *expert opinion*, osi lo levidans. Menm ler zot pou fer sa pou determin gravite dezabilite ouswa envalidite sa bann pasyan, si zot kapab fonksyonn dan en fason ouswa pa kapab. Mon ti ava swete ki zot osi regard bann

sityasyon ki benefis ki bann dimoun pou gannyen ouswa swen en bezwen sa endividi.

Ki mannyer led ki zot pou rekomande pou sa bann dimoun i pou ed zot akonpli en bi ouswa lanbisyon dan zot lavi. Akoz kekfwa enn ler dimoun i aveg li. Me selman *still* i anvi fer en travay par egzanp en *operator*. So, ki mannyer nou kapab akonpany li ?

Ki mannyer bann provizyon i pou ede e siport sa endividi? Ki lenpak sa lasistans pou anmenn dan son byennet ? So, an dot mo ki mon pe dir, eski nou regard ki mannyer nou pou ed sa endividi epanouir?

Akoz nou *LDS* nou *believe* dan 2 keksoz lepanouisman endividi. E dezyenm pli enportan, responsabilite en endividi. Nou anvi ki dimoun i pran zot responsabilite. Kot en dimoun i a dir, be *ok* mon'n koup mon lanmen me selman mon lanmen drwat i ankor fonksyonnen e mon kapab fer en keksoz. E si i anvi pran son responsabilite koman en endividi, nou bezwen donn li sa lankourazman.

Donk, Mr Speaker, mon vwar sa Lalwa koman en plito en prosis administratif ki nou pe entrodwir, pou ede idantifye bezwen en endividi

baze lo bann levidans medikal lo son dezabilite ouswa son envalidite. E pou fer sir ki i reste koman en Manm ki fonksyonnen dan nou sosyete. Pou bann ki vreman pa kapab, nou konpran sa e nou senpatiz avek zot.

Me pou bann ki kapab, e ki anvi, mon apresye ki zot pou annan sa loportinite pou zot kontinyen epanouir.

Alor, mon pa annan gran difikilte avek *the principle of* sa Lalwa e ki i pe sey entrodwir. E koman en Manm Lasanble, mon rekonforte mon ava dir avek bann dimoun Mont Buxton ki si letan mon pas dan distrik pa si, ler mon pas dan distrik i en size ki nou kapab koz lo la. Mon ava kapab eksplik zot ki mannyer sa i pou marse.

E mon reasir zot poudir napa okenn Seselwa, ser ek frer Seselwa ki demen pou dan bezwen ki pou ganny kit deryer. I pou kapab ganny-assess selon son kapasite par sa *Board*. E i annan bann mekanizm ki si zot pa ganny en rezilta ki zot dan zot faver *appeal process* i la. E ki sa Lalwa i annan bann provizyon pou kouver zot.

Donk, mon krwar i en Lalwa ki nou kapab aksepte. E mon ti ava zis demann Lopoziyon pou dir nou si zot pa

dakor avek sa fason fer, zot donn nou zot alternativ. Mersi Mr Speaker.

(APPLAUSE)

MR SPEAKER

Mersi Onorab. Onorab Cosgrow ou annan laparol?

HON WALLACE COSGROW

Mersi Mr Speaker. Mr Speaker, Bonn apre midi Minis. Bonn apre midi *PS* avek Manmzel Tirant. Mr Speaker, mon pou seye mon pa pou tro long akoz mon lavwa *of course*.

Me selman mon krwar i enportan ki mon dir 2 pti parol. E mon pou seye apre midi met detrwa pwen devan, ki mon santi i enportan. E ki piblik Seselwa i merit ganny en konpran lo la.

Mr Speaker, Sesel ti vin lo standar enternasyonal. Annefe Sesel ti *set* standar enternasyonal 1979. Mon anvi ki Onorab Henrie atraver ou i konn byen sa.

Akoz se sa Polisi ki'n ede fer bann dimoun parey mwan, li avek bokou lezot dimoun dan Sesel ariv sa ki nou ete ozordi. An Mars sa lannen, nou ti selebre 45 an depi ler *SPPF* ti entrodwir Sistenn Sekirite Sosyal Sesel.

(APPLAUSE)**HON WALLACE COSGROW**

Sa ki'n ed nou bokou nou bann dimoun ki nou paran ti napa, nou ti bann fanmir vilnerab pou nou ariv kot nou ete ozordi. I annan ki ti annan ti *ok*, napa problem. So, an Mars sa lannen 45 an. E mwan ozordi letan mon pe koz lo la, mon osi reflesir back lo 60 an legzistans nou parti.

Sa prensip Polisi Sekirite Sosyal ti komans byen boner an 1964. E i etabli dan liv, dan enn bann liv ki Prezidan Rene in ekri. In etabli prensip Sekirite Sosyal. I en prensip ki baze lo en Polisi, Polisi enportan. En Polisi ki konsern solidarite anver enn a lot.

Mr Speaker, i ganny dir an plis ki sa i en lapros baze lo drwa bann ki pa kapab *afford* pou zot. Or bann ki pa kapab *afford* ouswa bann ki a en serten pwen dan zot lavi zot santi zot pa kapab *afford* pou deboury pou zot lekor.

Se sa prensip, e se sa prensip Mr Speaker, ki separ nou lo sa kote latab avek zot laba lot kote latab. Se sa prensip en parti sosyalis konpare avek en parti liberal, kapitalis, bef dan disab sakenn vey son lize.

(APPLAUSE)**HON WALLACE COSGROW**

Mr Speaker, sa sistenm i en sistenm ki'n ganny etabli. E anefe, ozordi nou'n koz lo *sub-Saharan Africa* ozordi sa sistenm Sekirite Sosyal ki i annan, ki nou annan Sesel kre par nou, par *SPPF* i lanvi tou pei *sub-Saharan Africa plus* pei par lao *sub-Saharan Africa*.

I en lanvi tou sa bann pei i an dezir, akoz se sa ki'n permet Sesel ariv kot i ete ozordi. E se sa ki zot anvi pou kapab tir zot pep souvandfwa dan lamizer Mr Speaker, e dan vilnerabilite.

Mr Speaker, i en lenvestisman dan dimoun. En prensip ki nou'n toultan krwar ladan. Lenvestisman dan dimoun, met dimoun o sant devlopman. E Mr Speaker, annan en *social safety net* pou dimoun ki vilnerab. Ki i annan mal ladan? Petet dan laplikasyon la pratik nou difere.

Mr Speaker, mon pou vin lo mon premye pwen an sa ki konsern Fon Pansyon.

Mon krwar *Leader* Lopozisyon in tous lo la. Fon Pansyon i en Fon kontribiter. Si Gouvernman atraver larzan *taxpayers*, *Consolidated Fund* i santi ki poudir i bezwen byen diriz sa larzan ki *taxpayers* i

donnen. E i santi ki li i bezwen met serten mezir, serten regilasyon anver ki manner sa larzan i ganny partaze avek bann dimoun ki mwen fortinen, vilnerab - *fair enough* zot ki o pouvwar, zot ki *rule border* zot santi zot anvi fer *sa fair enough*.

Be mon pa ganny en konpran, mon ti fer sorti sa pwen dan *Bills Committee*. Mon pa ganny en konpran ki manner ou ava enpoz sa lo en Fon Pansyon, ki en Fon Pansyon kontribiter dayer nou, nou kontribye nou tou la anndan. E ou pou dir ki manner sa Fon Pansyon i pou *assess incapacity* mon krwar i apele avek dezabilite anba zot Lalwa.

Sa i reste a nou pou decide. Eski Fon Pansyon in fer konsiltasyon avek son bann kontribiter? Eski son *Board* i konfortab ki sa desizyon ki zot in pran pou armoniz en *Board Medikal* avek sa ki Gouvernman ozordi pe decide fer ?

Mon konpran ler zot pe dir nou pe armoniz bann sistenm sosyal bla, bla, bla, lot, lot, lot. Me sa i reste a Gouvernman Fon pansyon pa Gouvernman li, malgre parey *LOTO* in eksplike son fason ki i ti ganny fonde, kree.

So, mwan mon krwar i annan en *issue* la, nou bezwen asize gete. Ler mwan mon'n kontribye *for over* konbyen? Depi 99 mon pe pey Fon Pansyon. Selman mon'n kontribye mon larzan, e mon annan lekspektasyon ver sa ki mon gannye ek Fon Pansyon si i ariv en keksoz avek mwan.

Si i ariv en dezabilite ouswa *incapacity*. Mon annan en lobligasyon baze lo sa ki mon ti komans kontribye. Sa ki mon ti komans kontribye, e sa ki ti dan ou Polisi.

E si ou sanz ou Polisi, ou bezwen vin ver mwan dir mwan be get sa. Prezan mwan mon a decide si *from now on* mon pou kontinyen kontribye pou mwan ganny lanmwatye 15 poursan, 10 poursan *whatever tool* ki zot decide servi. *Or* si mon *opt* pou mwan *save* mon larzan si zafer i sal, mwan mon a deboury mon zafer mwan menm. So sa premye pwen Mr Speaker, e mwan mon krwar fondamantalman i mal ki zot pe fer.

E zot si Gouvernman i santi i bezwen en nouvo *assessment tool*, pou ki manner i diriz larzan *taxpayers fair enough* zot ki pe *rule border*, fer sa ki zot oule fer. Me mon pa krwar Fon Pansyon i merit antre ladan. Sa i mon

pwennvi e mon krwar mon byen ladan.

Dezyenm pwen Mr Speaker, sa ki enportan mon krwar i devret annan en *holistic approach* ki mannyer nou deal ek sa bann zafer.

Ler mon dir *holistic approach*, i pa kapab zis enn ki ganny *driven* par ASP avek Departman Sosyal. Me i enn ki bezwen ganny anmennen par tou bann akter.

Mon a dir ou akoz, nou'n koz lo kordinasyon. Nou'n koz lo konsiltasyon, mon a dir ou akoz. Demen bomaten, sa Lalwa i vin an plas ou annan ou *assessment tool*. E sa *assessment tool* i fer ki dizon par egzanp mwan mon ti pe ganny en *full Invalidity benefit*.

E mwan mon war mon, mon war mwan ganny 50poursan. E ou pe dir mwan poudir *from now on* mon pa pou gannyen R5,750. Mon pou ganny mwan lanmwatye R5,750. Se koumsa ki mon pe konpran li. Zot a koriz mwan si mon mal.

Now kote mon *bridge* sa *income gap*? Ki mannyer mon *bridge* sa *income gap*? Mon pa pe travay. Ou pe anvoy mwan prezan lo marse lanplwa pou mwan al rod en travay, pou mwan kapab *bridge* sa *income gap*.

Eski Minis Departman Lanplwa in fer en konversasyon ek bann landrwa travay? Akoz la mon bezwen al *compete* avek *the abled bodied person*. E ou kapab konpran ozordi 2 *abled bodied person* pe *compete* ek kanmarad e i difisil.

E mwan prezan mwan mon annan en serten dezabilite or enkapasite. Mon bezwen al *compete* lo sa *same* marse lanplwa avek en dimoun ki *fully able*.

So eski in annan en konversasyon avek bann anplwayer, bann landrwa travay pour nou kapab *cater* pour bann dimoun ki ler sa *tool* i konmans vin an operasyon, sa landrwa travay i bezwen konpran ki poudir, be mon bezwen anploy sa dimoun, akoz son *income* pe desann la.

E pa kont si i pe al kot *Welfare* pou al rod en *income supplementation*, akoz i dir li koumsa si ou pe ganny enn ou pa kapab ganny lot. *This is the policy now*.

So eski in annan en lapros entegral dan lafason ki nou pe apros sa? Eski nou'n pas partou nou'n get tou sa bann pti trou kot nou bezwen bouse avan ki nou entrodwir sa?

Nou'n koz lo *Homecare*. Nou'n koz lo ASP. Me i annan bann anplwayer. I annan

Minister Lanplwa li menm. Eski zot annan kapasite? Mon pa pe dir zot pa pe fer. Mon pa pe dir zot lanvi pa la. *But* eski nou'n mazin byen avan nou konmans *apply* sa Lalwa e sa bann *tools* ki pou vin avek sa Lalwa?

Mr Speaker, ler mon vin lo mon trwazyenm pwen. La nou pe koz lo Lazans Proteksyon Sosyal. Mon pa pou tous Fon Pansyon. Mon pou tous Lazans Proteksyon Sosyal.

Ozordi, ozordi i annan konplent ki i annan rekomandasyon ki sorti kot *Medical Board*. Ki sorti kot *Occupational Health*, ki ler i ariv kot Lazans Proteksyon Sosyal, desizyon i ganny sanze. Ler mon dir sanze *meaning* nou pa *abide* avek desizyon sa bann dimoun.

(Interruption)

HON WALLACE COSGROW

Mon dir i annan lenformasyon. I annan legasyon. Mon pa konnen. Sa ki mon pe dir.

(Interruption)

HON WALLACE COSGROW

Si...

MR SPEAKER

Arete.

HON WALLACE COSGROW

Si mon mal, si mon mal - mon war Minis pe sekwe latet. Si mon mal, Minis i ava koriz mwan.

(Interruption)

MR SPEAKER

Order!

HON WALLACE COSGROW

Pa zot ki pou koriz mon. Minis ki la devan ki pou koriz mwan. *Ok*, napa problem. Ou a korize Onorab Naidu.

(Interruption)

HON WALLACE COSGROW

So, i annan...

MR SPEAKER

Order silvouple!

HON WALLACE COSGROW

Ler sa bann desizyon i vini, i annan sa ki nou apel en *Vetting Committee*. Dan *Vetting Committee* ozordi mon konpran i annan en *HR* ki pe asiz lo la. I annan en *IT Techincian* ki pe asiz lo la. E an prensip, sa bann desizyon i ganny fer, sa bann desizyon pa ganny fer dan *fairness*. Sa ki mon kapab dir.

Ozordi Mr Speaker, i annan dimoun ki esper 1 mwan, 1 mwan edmi, 2 mwan

pour zot kapab ganny en larepons si zot laplikasyon in ganny aprouve.

MR SPEAKER

Onorab Naidu...!

HON WALLACE COSGROW

So sa dimoun ki prezan ler son zafer ler i sorti lo *Functional Capacity Board Assessment*, ki pou arive Mr Speaker?

So ou kapab konpran ler mon dir ou. E Onorab Loze in koz lo la in dir ki pou dir nou annan mefyans dan lafason ki keksoz i ganny fer.

Mon pe konpran osi Mr Speaker, ki ozordi statistik ki ganny donn ek *World Bank*, i enn ki *inflated*. Par egzanp mwan Wallace Cosgrow mon ganny en lasistans 3 fwa dan en lannen, i ganny konsidere konman 3 kliyan.

E sa nou pou rode. Nou pou bezwen rode sa. Nou pou bezwen al rod sa statistik. E mon *challenge* zot. Donn nou sa bann statistik apre donn nou *payroll* nou ava gete. Nou ava konpare. Ou konpran mwan Mr Speaker?

So, ler nou pe koz annan en lapros konm tel, nou bezwen fer sir ki partou tou bann lazans i *in tune* avek sa lapros ki nou pe ale. Me malerezman Mr Speaker, mon pa santi ki ozordi

ki tou sa bann lazans responsab i *in tune* avek sa Lalwa, sa lapros ki nou pe pran.

E pour mwan mon krwar i pou kree problemm Mr Speaker. Finalman, pa pour mwan. Pa pour nou. Mon pa konnen, petet i kapab ariv en sityasyon kot mon vin *incapacitated* en zour e mon bezwen al ver sa Lalwa.

Me mon santi pour bann dimoun ozordi ki pe ganny sa benefis - benefis. I pa en lasistans. I en benefis statiter. E mon santi ki i riske pour serten dimoun - pa tou - petet pour serten dimoun i riske poz en problemm finansyel pour zot, pour zot fanmir. E kot zot war zot petet evantyelman plonz dan vilnerabilite e lapovrete.

So avek sa Mr Speaker, mon annan en kantite keksoz mon anvi dir ankor, be selman mon lavwa pa permet mwan. Me mon annan difikilte pour mwan vot pour sa Lalwa, akoz mon krwar i annan serten keksoz ki pa'n byen ganny konsevwar, pa zis dan Lalwa, be an zeneral dan lafason, dan lapratik ki sa Lalwa pou al ganny enplimante. Mersi Mr Speaker.

MR SPEAKER

Mersi Onorab. Onorab Naidu ou annan laparol. E fotespere personn pa deranz ou.

HON SATHYA NAIDU

Mersi Mr Speaker. Bonn apre midi tou koleg Onorab, Minis ek ou delegasyon. *Bill* devan nou i tous en cours nou popilasyon. En group dimoun kot zot fonksyonnalite i totalman diferan avek bann dimoun ki ordiner.

Dan ki sans? Abilite sa endividi, swa lo en laspe fizik, ouswa en laspe mantal i annan en mankman, ki fer ki zot abilite pou fonksyonn konman en dimoun normal i ganny afekte. E alors, i annan sa sipor ki ganny donner. Swa atraver *ASP* ouswa Fon Pansyon, baze lo kontribisyon ki sa endividi pou'n fer.

E dan sirkonstans aktyel, i annan 2 *Board* ki fer ki i kapab menm dimoun ki pe ganny evalye par 2 diferan *Board*. E dan serten lenstans, in annan bann desizyon ki'n ganny pran ki al kont tou lede *Board*. Ki fer sa legzersis i vin *counter productive*. E alors nou annan en sel *Board* ki pou fer en determinasyon lo sa endividi. Ki ava promouvwar efikasite.

Lo size efikasite depi ler Gouvernman *LDS* in vin o pouvwar, nou'n pous bann

sanzman dan bann lezislasyon neser pou kapab promouvwar efikasite. Nou, nou krwar dan met lord e fer keksoz pli byen. Sa i en keksoz byensir lo lot kote latab zot pou dezagree.

Parey Onorab Cosgrow in dir, depi sepa ki lepok ki zot in etabli bann striktir. Wi, zot in etabli bann striktir. Me selman lafason ki sa bann striktir ti pe ganny zere, ti konpletman mal.

Se pourtan pour sa rezon menm an 2008, *IMF* ler zot ti pe pas dan bann reform, zot ti'n dir ki zot bezwen pas dan bann seri reform ki konsern *ASP*. Ki konsern Fon Pansyon. Me zanmen zot in kapab annan sa kouraz pou pran bann desizyon ki serye, ki pou promouvwar *meritocracy*.

E dan sa lenstans, si en dimoun i ganny etabli par sa *Board* – parey Onorab Loze pli boner ti pe dir ki mannyer bann *social workers* i travay sitan dir. Ki mannyer bann diferan profesyonnel i devret ganny valorize.

Be zisteman, nou pe met bann teknisyen ki annan sa kapasite, ki annan sa potansyel pou fer bann analiz neser pou determinen pou dir ki sa dimoun i bezwen ganny asiste.

Dan plas, parey Onorab John *rightly said*, dan letan eleksyon nou ti war en *queue*.

Mon pa konnen si i kapab antre dan *Guinness World Book Record* pour *per capita*, an sa ki konsern led ki ganny donnen dan letan eleksyon.

Me koumsa ki i ti marse dan lepase. E nou, nou pa krwar ladan. Kekfwa serten pou kestyonnen. Politikman *timing* i bon, pa bon. Nou, nou pa krwar ladan. Nou, nou krwar dan fer keksoz byen ki anliny avek prensip an term bonn gouvernans.

E ler nou pe koz lo laspe mantal, kekfwa *PS Valentin* atraver Minis, i kapab donn en pe leksplikasyon lo, eski dan konteks Sesel nou annan striktir ki sifizan pou kapab fer en determinasyon lo lasante mantal en endividi, ki fer li lo kote fonksyonnalite i ganny afekte? Alors ki striktir ki zot annan an plas pour zot fer bann determinasyon?

Annefe, ler nou pe koz lo sa *Board* ler i pou'n ganny etabli. Akoz sa *Board* pou ganny etabli. E ler sa *Board* pou ganny etabli, mon swe se ki *Chairperson* ansanm avek bann lezot manm sa *Board* i vin devan avek *SBC*. I prezant lafason ki sa *Board* pou travay. Ki bann kriter ki i pou ganny itilize pou kapab fer bann diferan - etabli bann diferan kriter.

Akoz? Akoz nou annan en Lopozisyon ki pou fer tou sort kalite politik. Akoz napa gran keksoz pour zot dir. Degre ki nou pe fer sitan byen, laplipar ditan *PNQ* i fize. Napa valer.

(APPLAUSE)

HON SATHYA NAIDU

PNQ konmela napa valer. Ozordi dan Sesel i annan *issues* ki nou bezwen adrese. Selman Lopozisyon, *lost! Lost. Completely lost!* E alors ler nou annan en Lopozisyon koumsa, zot pou sey profite lo sa *Functionality Board*.

Akoz dan lepase zot ti donn bann dimoun ki konpletman *fit*, lasistans. Se sa kalite labi ki ti'n annan avek Gouvernman ki ti la avan nou letan. E nou, nou krwar dan fer keksoz byen. E zot, zot pa krwar ladan.

Onorab Aglae, in poz en kantite kestyon. Be dan sa bann kestyon menm dan son diskour in reponn en kantite keksoz kot in dir kriter.

Ok, kriter ki ganny servi, li menm li in etabli bann diferan kriter. Pour bann ki pe ekoute, swiv ou a realize si mon pe dir keksoz ki vre. Wi ou non ?

Me, an menm tan nou konnen poudir *S.I* pou ganny pase. I pou ganny *table*. E alors

tou bann kriter *before the operations of the Board, will be there.*

E si Onorab Aglae i annan serten rezervasyon, koz lo sa *S.I. Anmenn en Mosyon.* Dan plas fer en bann politik kot i dir i konpran kriter, i pa konpran kriter. Be ki ou konpran finalman? Ou konpran mwan Mr Speaker?

An relasyon avek lakantite *beneficiaries.* I ti a bon - mon konnen poudir ki Minis in vin devan e lo kote *ASP* zot in prezant bann sif. E zot lo zot kote zot dir; i annan zis 5 dimoun ki'n gannyen. Dapre zot zis 5 dimoun ki'n ganny ede.

So, dir nou si zis 5 dimoun in ganny ede atraver *ASP*, atraver *Fon Pansyon?* Akoz sa i kalite politik ki *US* i fer. An term sif zot kontan zwe e alors i ti a bon si nou ti kapab konnen poudir ki kantite dimoun ki pe vreman ganny sa benefis?

In annan kozri lo *Home Care. Home Care,* wi nou'n anmenn en Prozedlwa pour nou kapab fer sir ki bann mekanizm i ganny byen etabli. E fransman dir ou, i pou pran nou en pe letan pour nou anmenn *Home Care. Agency* lo sa standar.

Akoz ou'n erit en dezord baze lo lafason *SPPF* – mon pa ni pou dir zot en *Nouvo US,* in

kree. Akoz in annan bann dimoun ki *fit* ki pe ganny carer.

Be nou, nou dir, non. Be si ou *fit,* ou pran swen avek ou lekor. Si ou kapab leve, ale, travay! Si ou pa pou kapab leve, nou a donn ou lasistans ki apropiye ki neserer. *We believe in meritocracy.* Sa i nou filozofi.

Nou pa krwar dan politik bonmarse. Nou pa krwar dan servi larzan Leta, servi larzan *taxpayers'* pou ganny pwen politik. Sa i bann keksoz ki zot, zot krwar ladan. E zot pou fer serten dimoun ki ti'n abitye ganny benefis, tenir en plakar dan *rally* pou dir zot oule benefis.

Koumsa ki zot fonksyonnen konman en parti. E si mon pou al an deor konteks. Akoz zot, zot in al an deor konteks. Menm dan Cascade, ti annan en bann dimoun ki pe vin tenir plakar, zot pa ni ti ganny afekte par leksplozyon. Se sa kalite politik ki *US* i krwar ladan.

Mr Speaker, mon le felisit tou bann dimoun ki travay avek bann dimoun ki annan abilite spesyal. Dan tou bann diferan striktir lo nivo Gouvernman. E menm an deor.

Pour sa dimoun ki pe viv avek en abilite spesyal, e ki pe sirmont tou bann defi dan lavi pour li kapab *attend* son

lobzektiv konman en sitwayen responsab, dan plas relye lo lasistans. Mon tir mon sapo e mon salye ou.

E dan parti *LDS* nou krwar dan bann dimoun avek abilite spesyal. Onorab Naddy Zialor i en legzanp!

(APPLAUSE)

HON SATHYA NAIDU

Tou sa letan Onorab Zialor in lo lot kote, kekfwaw in annan serten prensip ki in krwar ladan. Me selman in realize poudir i annan labi! Zot in etabli en kantite keksoz.

FA4JR. Onorab Pillay, ou le al lo *FA4JR*? Zot ti'n donn en bann biznes ki pa merit pe ganny ede. Zot ti pe donn zot led. Selman lasistans i en keksoz ki ti byen.

Me selman lafason ki ti'n ganny enplimante Mr Speaker, le pwen ki mon pe fer se, i kapab i annan striktir ki ti annan en bon lentansyon, selman lenplimantasyon pa ti byen. E nou, nou pa pe fer parey.

E Onorab Zialor tou sa letan ki'n avek zot, eski i ti'n ganny valorize? *Not at all*. E mwan mon fyer pou dir mon annan en frer parey Onorab Zialor ki pe debout pour bann dimoun...!

(APPLAUSE)

HON SATHYA NAIDU

...pour bann dimoun – pour bann dimoun otreman kapab ki annan abilite spesyal. *Physical Planning Bill* i ti'n anmenn en lamannman pou promouvwar *accessibility to all*.

Onorab Cosgrow ki'n dir, petet en zour. Mon pa konnen si sirkonstans lavi i pou anmenn li kek par. Ki kalite propozisyon eski in soumet apard bann kestyon ki vid? Naryen !

Lo nou kote nou annan bann dimoun ki pou anmenn propozisyon. Ki pou anmenn sizesyon. E kot i mal, nou pou dir i mal. E in annan lenstans lo kote *ASP* kot zot ti'n bezwen met en pe lord. I ti'n annan pa mal mezir. Nou ti'n met devan nou konsern poudir revwar sa bann mezir.

E le lesansyel in ganny fer kot mezir in ganny revwar pou fer li pli aksesib. Me nou ti bezwen met lord. E dan sa travay ki pe al ganny fer, i pou annan lord. E pour bann dimoun ki merit ganny ede, i ava ganny ede aköz se sa ki nou, nou krwar ladan. Mersi Mr Speaker.

(APPLAUSE)

MR SPEAKER

Onorab Georges, ou annan laparol.

HON BERNARD GEORGES

Mersi Mr Speaker. Mr Speaker, mon'n ekout atantivman sa deba lo sa Prozedlwa ki devan nou ozordi. E permet mwan o konmansman pour mwan remersye Minis avek ou lekip. Bann ki'n travay lo sa Lalwa. Bann ki'n elabor sa Lalwa.

Permet mwan osi pou remersye Onorab Hoareau avek Onorab Henrie parmi tou lezot ki'n koze apre midi. Akoz zot, zot in pran zot letan pou eksplik avek nou isi dan Lasanble e avek Lepep Seselwa deor, egzakteman kisisa ki dan sa Lalwa –

Pandan ki *Leader* Lopozisyon parey i pe fer la, pe koze avek son bann zanmi. Pa pe ni ekoute. Mon'n dir li. Onorab, ekoute ou a aprann en keksoz silvouple.

(laughter)

HON BERNARD GEORGES

Mr Speaker, sa ki devan nou la ozordi set en Lalwa enportan. I en pti Lalwa.

(Interruption)

HON BERNARD GEORGES

I en pti Lalwa, me i en Lalwa avek en –

(Interruption)

MR SPEAKER

Onorab Pillay, ou ava aret enteronpe silvouple. *Ok.* Mon adres ou, ou dernyen fwa lo sa size. Mersi. Onorab Georges silvouple, ler ou bezwen koze koz ek Speaker. Pa avek lot kote latab. Onorab Georges, kontinyen silvouple.

HON BERNARD GEORGES

Mersi Mr Speaker. Mr Speaker, mon ti pe dir sa set en Lalwa ki son *reach* i al lwen e son lenspirasyon i enportan. E i tris ki Lopozisyon ozordi apard enn – e mon ava retourn lo li taler, in swazir pour zot zis anmenn tou sort kalite largiman kont en Lalwa ki kler dan son lentansyon e dan son direksyon.

E i kler ki zot in fer sa akoz zot pa'n konpran oubyen zot pa anvi konpran sa ki dan sa Lalwa. Ou war Mr Speaker sa zafer donn lasistans. I en kestyon difisil sa. I en kestyon ki nou pa kapab zve avek e nou pa devret e nou pa merite fer politik avek.

Akoz okenn nasyon, okenn Gouvernman ki apel son lekor en nasyon solid oubyen en

Gouvernman demokratik, i bezwen annan an premye lye proteksyon bann kous pli vilnerab dan son sosyete. E i bezwen annan.

Si en Gouvernman napa sa ; si en Gouvernman pa sey fer pli byen ki posib pour li asire ki larzan *taxpayers'* i ganny servi dan en fason optimonm pou ed bann dimoun ki pli bezwen, sa Gouvernman pa devret kapab apel son lekore en Gouvernman efektiv.

E Mr Speaker, mon dir sa akoz malgre tou sa bann demagozi ki'n ganny dir la apre midi, mwan mon'n war zis en Gouvernman dan sa bann peryod letan ki fek pase, ki annan egzaktaman sa manda dan son lespri e lafason ki i administre e i aplik Sekirite Sosyal avek proteksyon sosyal dan nou pei. E sa se sa Gouvernman *LDS* ki la ozordi.

(APPLAUSE)

HON BERNARD GEORGES

E mon pa dir sa pou fer politik Mr Speaker. Mon dir sa akoz i vre. E bann dimoun i konnen ki i vre. *Of course* i annan problem. Napa en Gouvernman-

Bomaten Minis Rangasamy in aksepte. E tou Minis i aksepte. E tou dimoun

ki viv dan okenn pei i aksepte ki keksoz annan de fwa pa al osi vit. Oubyen bann lobligasyon pa ganny desarze osi byen ki zot devret. Sa i arive partou. Me, ou kapab amelyore sa keksoz.

Sa ki enportan – sa ki enportan se ki en Gouvernman i pran son letan. E ler letan in arive, i pa per pour li dir, nou kapab fer en keksoz pli byen; nou kapab fer li pli performan e anmenn en Lalwa devan nou Lasanble pou fer sa arive. E set egzaktaman sa ki nou'n vwar la apre midi.

Akoz Mr Speaker, apre tou sa demagozi ki'n ganny dir lo lot kote latab par 3 lo 4 dimoun ki'n koze, en sel keksoz i reste ki zot, zot pa'n vwar. E sa se ki sa Lalwa ozordi i annan en bi e en bi selman. E sa se pou moderniz en sistenm ki an plas.

En sistenm ki ti la, me ki pa ti pe perform dan son meyer kapasite. E sa ki pe arive ozordi, atraver bann teknisyen ki'n travay lo sa Lalwa, se pou moderniz son laplikasyon pou fer ki, sa ki merite i ganny tou sa ki zot merite. E sa ki merit mwens i ganny mwens. E sa ki pa merit ditou pa ganny ditou.

That Mr Speaker is the intention of this law. E nou perdi li. Nou perdi li si nou sey noy sa lide senp dan en kantite parol e ganny demagozi politik parey

nou'n vwar Lopozisyon fer apre midi. E sa i tris pour mwan.

I tris Mr Speaker akoz nou bliy – ou plito, zot bliy bann dimoun ki zot sipoze pe defann. Bann dimoun ki zot sipoze pe lager pour zot. Zot bliy zot, akoz? Akoz zot anvi vin fer en politik bonmarse dan en Mardi apre midi dan Lasanble Nasyonal.

E sa Mr Speaker, i en moman latristes pour nou lo sa kote latab ki anvi travay, ki anvi moderniz Sesel, ki anvi anmenn bon Lalwa e ki anvi fer sir ki bann dimoun ki vilnerab i ganny sa ki zot bezwen ler zot bezwen, dan lakantite ki zot bezwen.

Mr Speaker, mon konpran – mon konpran lo lot kote latab akoz zot santi zot anbarase. Zot santi zot anbarase akoz se nou ki pe anmenn en keksoz ki zot, zot pa'n fer.

Se nou ankor enn fwa – se sa Gouvernman LDS ki ankor enn fwa i vin aranz keksoz ki zot, zot pa'n kapab aranze pandan 43 an ki zot in la.

E nou konpran zot lanbara akoz zot bezwen koz dan lafason ki zot koze, san anmenn en propozisyon pour en amelyorasyon devan. Ni enn zot pa'n anmenn.

Tou sa ki zot in fer se dir, akoz sa pa bon? San ki zot in

kapab anmenn en lide pou dir, la, la lafason ki nou kapab amelyor li.

E sa Mr Speaker i montre en diferans ant sa Lopozisyon ki ti la dan 6em Lasanble ki ti fer sa. E sa Lopozisyon ki la ozordi ki pa fer li. E Mr Speaker, zot pou ganny pini par Lepep Seselwa ler eleksyon i arive.

(APPLAUSE)

HON BERNARD GEORGES

Akoz Lepep pe vey zot laba deor. Lepep pe ekoute tou sa bann parol ki zot pe koze, san anmenn okenn satisfaksyon pou ed okenn dimoun laba deor.

Mon'n dir Mr Speaker ki i annan en dimoun apre midi ki'n koz konvenableman. E sa se Onorab Aglae. E ou konnen kwa Mr Speaker, i kler, i enteresan pou vwar ki mannyer deba in ale lo kote Lopozisyon. 3 Manm – e touzour menm 3 ki'n antre proporsyonnel. Ki napa en distrik.

Ki pas devan laport tanzantan. Annefe - annefe lot zour Onorab Pillay ler i ti vin Les Mamelles, en nespes *Blitz* ki zot in vin fer Les Mamelles.

(laughter)

HON BERNARD GEORGES

In antre kot Madanm Albert in dir; Madanm Agricole, pa i gou war ou! Pandan en bon pe letan mon pa'n war ou !

(laughter)

HON BERNARD GEORGES

Sa madanm in bezwen dir li –

(Interruption)

HON BERNARD GEORGES

Sa madanm in bezwen dir li, non, non, mwan mon madanm Agricole mwan. Madanm Albert i reste dan lot *flat* o bor.

(laughter)

MR SPEAKER

Onorab...

HON BERNARD GEORGES

Ou konpran Mr Speaker?

MR SPEAKER

...retourn lo *Bill* silvouple.

(laughter)

HON BERNARD GEORGES

Mersi.

(Interruption)

HON BERNARD GEORGES

Onorab – Onorab...

MR SPEAKER

Order!

(Interruption)

HON BERNARD GEORGES

Onorab Aglae...

MR SPEAKER

Onorab, silvouple kontinyen avek ou soz. Onorab Pillay, silvouple aret enteronpe.

HON SEBASTIEN PILLAY

(Off-Mic)

Be dir li aret nonm mon non dan son labous.

MR SPEAKER

Onorab.

(Interruption)

MR SPEAKER

Onorab Georges, ou a rebran lo *Bill*.

HON BERNARD GEORGES

Onorab Aglae Mr Speaker i konnen. Akoz Onorab Aglae in ganny elekte dan son distrik. I konnen son dimoun li. I konnen, i santi sa ki son dimoun i dir li.

E se pour sa rezon ki ozordi apre midi Onorab Aglae si nou ekout li byen, i pa'n kritike li. I pa'n kritike li. In koz konvenableman. In koz byen. In

dir i annan serten keksoz ki fodre amelyore.

E se sa Mr Speaker diferans ki nou vwar ant sa bann dimoun ki vin fer politik ek sa bann dimoun ki vin isi pou travay pour bann dimoun ki'n elekte zot dan zot distrik.

I malere ki zis enn zot ki'n kapab fer li apre midi. E Onorab Aglae, pa premye fwa ki mon dir ou. Ankor enn fwa mon dir ou; *Well done*. Ou'n byen travay apre midi.

(APPLAUSE)

HON BERNARD GEORGES

Olye sa Mr Speaker – olye sa, ki nou annan? Nou annan en bann vye ritournel ki Sekirite Sosyal i lenvansyon Mr Rene. Non *but come on, seriously? Seriously* Mr Speaker?

Mr Rene, parey i kontan fer, in kopi Sekirite Sosyal lo bann lezot pei ki ti'n deza en tradwir Sekirite Sosyal konmansman par Lanmerik an 1935. E Mr Speaker ou konnen ki dil? Kapitalis, sosyalis, eksetera.

Premye pei pou entrodwir Sekirite Sosyal, Lanmerik. Li menm li pei pli kapitalis dan lemonn antye. Ou war? Sekirite Sosyal pa en kestyon politik sa. I pa en kestyon kapitalis. I pa

en kestyon sosyalis. I en kestyon ed sa ki pli vilnerab.

E set egzakteman sa ki Mr Rene pa'n fer isi. Akoz Mr Rene olye ed sa ki vilnerab avek Sekirite Sosyal, i ed tou dimoun. Sa dimoun ki annan mwens travay - ou ki'n ariv 63 an i napa travay ditou, i ganny son larzan.

Sa enn ki milyonner ki pe mars dan *Lamborghini*. Li osi i ganny menm larzan ki sa enn ki vilnerab. Ki mannyer ou apel sa? Sanmenm sa – sanmenm sa ki zot apel en sistenm sosyalis?

Kot sa ki annan i annan. E sa ki napa i annan menm kantite ? Set egzakteman sa ki sa *Functional Assessment Board* pe fer Mr Speaker. I pou assess pou dir, sa ki bezwen plis i ganny plis. Sa ki bezwen mwens i ganny mwens. Sa ki pa bezwen ditou pa ganny ditou. *That is the future.*

Pa zis partaz larzan ki nou napa avek tou dimoun bonnavini. E fer ki sa enn ki pa bezwen i ganny menm kantite ki sa enn ki bezwen. Se sa Mr Speaker, ki nou pe sanze la ozordi. E se sa ki Lopozisyon pa'n konpran apre midi, apard enn.

E apre Mr Speaker, zot vini zot dir nou akoz sa Lalwa, nou pe obliz Fon Pansyon antre anba sa Lalwa. Be lekel ki obliz

lekel antre anba sa Lalwa? Fon Pansyon li, i pa'n ganny kree par en Lalwa li? Pa i annan en Lalwa ki regle Fon Pansyon?

Fon Pansyon, pa en *agreement* ant bann dimoun ki kontribye - ant bann kontribyab Fon Pansyon. Fon Pansyon i ganny regle par en Lalwa. E dan sa Lalwa, pa ti annan en *Medical Board*? Pa i annan en *Medical Board* dan sa Lalwa anba Seksyon 40 ki nou pe sey sanze ozordi? Pa i la li deza?

Be lekel ki'n met sa *Medical Board* la? Bann kontribyab oubyen sa Lasanble ki ti met sa *Medical Board* la? E mon pe demann kestyon sa bann ki pe dir, akoz nou pa'n al verifeye al koz avek bann kontribyab pou met sa *Board*?

Be zot, zot ti al koz avek zot ler zot ti met *Medical Board* dan zot Lalwa zot? Ou war Mr Speaker, sa ki – ou war annan de fwa nou koze, san konnen ki nou pe dir.

Mr Speaker, sa ki kler Onorab Pillay, akoz se ou ki'n anmenn sa largiman ki bet e ki enbesil. Se ki Lalwa Fon Pansyon i annan en Lalwa. E *Medical Board* i vin anba sa Lalwa.

E sel keksoz ki nou pe fer ozordi se nou pe sanz sa Lalwa. Tir *Medical Board* e ranplas li par en lot keksoz. Apard sa

napa naryen Mr Speaker ki sanze.

E permet mwan – permet mwan an konklizyon. Permet mwan an konklizyon Mr Speaker, reponn sa kestyon ki sanmenm sa Onorab in demande.

Arh, nou, nou ti'n promet R10 mil. Nou, nou ti'n promet R10 mil pour tou dimoun. Napa okenn landrwa kot ou pou war ki parti *LDS* in dir ki tou dimoun i bezwen ganny – serten dimoun in dir. Serten. E mwan mon enn sa bann dimoun ki'n dir kler ki saler minimonm isi Sesel i merite dan sa tarif. Me sa pa en kestyon nou ki i ti dir. Pa sa en kestyon nou ki ti dir Mr Speaker. R10 mil Sekirite Sosyal.

Me mon ava fer zot rapel sa ki nou, nou ti dir. Sa ki nou, nou ti dir se ki Sekirite Sosyal i bezwen sorti R3 mil, mont R5 mil! Sa wi nou ti dir!

(APPLAUSE)

HON BERNARD GEORGES

E ou konnen ki'n arive Mr Speaker? Ozordi dimoun pe ganny R5 mil Sekirite Sosyal gras a *LDS*.

(APPLAUSE)

HON BERNARD GEORGES

E ou konnen kot nou ti asize sa lepok Mr Speaker? Nou ti asiz laba nou. Dan Lopozisyon nou ti fer Gouvernman travay.

Akoz? Akoz nou ti vin avek bann bon lide. Nou ti vin avek bann bon lide parey trezyenm mwan, ki apre zot in akiz nou ki nou'n vole avek zot. Me ki zot, zot in pran avek nou. Se nou lide Mr Speaker ki ti fer Gouvernman *US* travay!

(APPLAUSE)

HON BERNARD GEORGES

E se pour sa rezon ozordi ki mon war li tris ki sel keksoz ki zot in kapab fer apre midi, se politik bonmarse san anmenn en propozisyon pou sanz sa Lalwa e pou amelyor li.

Alor Mr Speaker, mwan mon pe dir avek zot, vot kont si zot anvi. *Abstain* si zot anvi. Fer sa ki zot anvi. Minis ou Lalwa pe ganny siporte e i pou pase akoz i en bon Lalwa pour Sesel. E sa ki bon pour Sesel i bon pour *LDS*. Mersi Mr Speaker.

(APPLAUSE)

MR SPEAKER

Mersi. Mon ava envit Minis pou fer son repons lo deba silvouple.

MINISTER **PATRICIA**
FRANCOURT

Mersi Mr Speaker. Mr Speaker, mon remerci tou bann Onorab avek zot bann kontribisyon ki zot in fer. I annan bokou bann sizesyon, bann lide. E mon lekip avek mwan nou'n pran tousala *onboard*. E i annan bann bon sizesyon ki'n *come forward*.

Me selman parey mon ti dir dan mon *opening speech*, i en *Bill* byen detaye. So si ou lir li, ou *go through it properly*, ou pou war en kantite bann keksoz ki zot in demande oubyen zot in *query* lo la, i deza ladan. Me selman mon remerci zot.

Mon *remind* Lasanble *that* sa *Bill is* – i pa lo *ASP*. I pa lo bann *benefits* oubyen lo bann politik ki pe ganny fer. *It's about the Medical Board*. Therefore, mon larepons pou reste *focus* lo sa *Bill* ki nou'n prezante ozordi.

Mon pou *focus* en pti pe lo bann pwen pertinan ki *related to the Bill as mon feel*, mon tim osi i *feel this is en very serious Bill*. I pa en *Bill* pour nou zwe avek, oubyen *come* avek bann keksoz ki pa *factual* oubyen ki pa ofe.

So bann dimoun ki'n serye in koz lo sa *Bill*, *total respect to you*. Akoz i konsern en group dimoun ki vremen vilnerab e nou bezwen donn zot sa respe letan nou pe koz ek zot.

Pa *turn it around* pou fer li vin en lot size ki pa fodre.

So bann kestyon Mr Speaker, ki annan pou fer avek modalite bann *tools*, oubyen modalite *the Bill itself*, letan nou ava al dan *Committee Stage*, PS Valentin ava adres sa dan en fason en pti pe plis detaye.

Mr Speaker, pou *pick up* en pe lo bann pwen ki'n ganny resorti. En kestyon ti ganny leve, eski sa nouvo *Board* pou mentenir *confidentiality* – konfidansyalite aplikan, e pou fer li vin – olye fer li vin piblik atraver bann mesaz. I pa nou lentansyon pou fer sa. Nou konpran i annan *sensitivity* avek sa size.

Me selman annan de fwa letan nou'n *exhaust* tou bann resours pour ou kontakte sa dimoun, ki ou pa ganny sa. *Whether* son telefonn nimeron in sanze. Oubyen ou'n ekrir, napa larepons, i bann dernyen opsyon.

Me selman nou *take* sa *onboard* aköz i annan en *sensitivity* ki vin avek. Alor nou bezwen regarde ki mannyer nou kapab fer li pli meyer, pour nou kapab fer li dan en fason *discreet*, parey nou dir. So nou pran sa *onboard*. E mon konnen poudir *the Board will think about that*.

En lot kestyon e klarifikasyon ki'n monte, se dimoun ki avek problem tande oubyen *autism*. E *again*, tousala i bann *needs* pertinan ki dimoun i annan.

Parey nou konnen, sa bann dimoun pou ganny evalye par bann profesyonnel pour en desizyon ganny pran. Nou bezwen *trust* poudir sa group ki pou lo sa *Board* i en group profesyonnel. E zot konn zot louvraz vreman byen. Alor nou bezwen *trust* zot letan zot pe fer sa. E zot pe fer sa dan tou senserite.

Konsern lo kote Fon Pansyon – konsern ki Fon Pansyon in antre ladan, e Gouvernman pe dir Fon Pansyon ki pou fer. Mon fer rapel Lasanble ki sa diskisyon in ganny fer avek Fon Pansyon e *Board* Fon Pansyon.

Alor annan respe pour sa *Board*. Letan ou war zot osi zot in kominik avek Gouvernman. Zot osi bann profesyonnel ki'n asize kot-a- kot pour en bon pe letan. *Almost a year and a half*, in regarde kwa ki bon *on going forward* lo sa *Bill*.

So i pa en desizyon ki Gouvernman in ale zis in antre ladan in dir fer sa. En *Board* ki endepandan. Alor letan zot fer desizyon zot in fer desizyon, ki zot *feel* i bon pour tou dimoun.

E ozordi nou war *CEO SPF* i pe asize la ek son tim pe asize laba. Savedir si zot pa ti an konformite oubyen si zot pa ti pe *agree* avek nou, nou pa ti a war zot la pe asize ansanm avek nou.

Aprè mon fer rapel Mr Speaker poudir sa Program Reform avek sa bi pou fer Fon Pansyon ek Sekirite Sosyal vin pli soutenab, ti'n enn ki'n ganny aprouve en ta letan pase. Parey i annan zot ki'n dir. En lot administrasyon avan nou.

E son lenplimantasyon in konmanse an 2021 akòz *COVID 19* i enn ki ti met retar. Me selman sa Gouvernman i *bold*. Sa Gouvernman i courageous, parey nou dir. I vini i pran bann keksoz ki kekfwà ti'n ganny *park*. Prezan i vini i ale i al fer enplimantasyon i al travay lo la.

So, i pa en kekyon ki nou nou'n vin anmenn sa. Fodre nou drwat e nou aksepte sa bann keksoz letan i ganny dir.

En lot konsern ki bann *tools* ki pou ganny servi ki Onorab Aglae in demande? E ti en kekyon vreman fantastik akòz sa i donn plis detay. Letan nou al dan *Committee Stage*, PS Valentin i ava koz lo la.

E nou'n fer resorti osi Mr Speaker, ki sa *Bill is a very good Bill* ki pou anmenn bokou *efficiency*. I pou anmenn *reform*

ki program *World Bank* in demann nou e zot ki swiv *ASP* e sa *Social Reform Program*. Zot pou war poudir *we are on trac* avek sa program. I pa en keksoz ki nou pe zis envante. I en keksoz ki la.

E sa *Bill* ozordi pe eksplik byen bann prosedir e tou bann fason ki bann prensip pour *assessment* bezwen ganny marse. E nou ganny bokou led avek *World Bank* kot i donn nou gidans. E nou bezwen annan en respe pour bann *international bodies* osi ki vini ki donn nou sa bann gidans pour nou kapab fer keksoz byen.

Aprè sa *issue of ASP* Mr Speaker, *not respecting decision of Medical Board*. I pa vre. Mon bezwen dir, i pa vre! Akòz sa ki *Medical Board* i dir, i sanmenm. Nou, nou napa okenn abilite pour nou kapab sanz desizyon *Medical Board*. So sa mon bezwen dir kategorikman, pa bezwen *distort* laverite. I pa vre!

(APPLAUSE)

MINISTER PATRICIA
FRANCOURT

Mr Speaker, *again*, zis pou fer resorti petet zot bliye bann program ki Departman Lanplwa i annan avek diferan bann group ki nou klasifye konman *less able* oubyen –

nou, nou apel sa en *Inclusion Agenda* ki mon konnen Onorab Zialor i koz for lo la.

Nou *target* bann group ki nou konnen poudir i deza annan *vulnerability*. Zot in bezwen war plizyer fwa nou al Praslin, nou al La Digue, lo Mahe.

Bann group dimoun ki annan dezabilite i en group ki nou *train* vremen byen. I dan nou Bidze. I kout nou. Me selman i *worth it at the end of the day*. Akoz laplipar sa dimoun nou kapab apre plas zot dan loubraz.

Savedir nou fer sir poudir tou group *across the Board* i ganny sans pou ganny loportinite lanplwa. E nou travay vremen byen avek bann *establishments*.

Sirtou bann lotel, ki nou war bokou sa bann dimoun i resepsyonnis oubyen i pe fer en loubraz ki i kapab avek son abilite. *Rather* nou pe get zis son dezabilite. So sa bann program i mars vremen byen.

Petet osi Mr Speaker, mon ava fer en koreksyon. Mon krwar i annan en konfizyon *between the Vetting Committee* ki fer avek *Welfare* ki ganny *referred by the Occupational Health Unit*.

So sa, sa enn ki *is the Vetting Committee* ki asize pou

vet sa benefit ki pou gannyen. *Whereas the Medical Board* li menm li *is the Medical Board*. So annou pa fer konfizyon ant sa 2.

Sensitization of sa bann prosedir. Wi. Pour bann dimoun ki pe demande, eski nou pou bezwen fer plis *sensitization* lo la? *Definitely*. E nou, nou krwar avek Minister Lasante, parey nou ti fer letan *ASP* ti annan bann *statutory rates review*.

Nou ti envit zot tou isi dan Lasanble pou *attend*, pou donn zot plis *awareness*. Pou donn zot plis ledikasyon dan *purpose* ki zot osi zot kapab al deor, edik zot bann *constituents* dan en fason ki zot konn keksoz konm fodre.

E mon pe *hope*. Mon met sa lapel ki mon demann Lopoziyon pou zot *attend*. Ti annan zis detrwa zot konpare avek lot group ki ti annan bokou – bokou plis ki zot.

(Interruption)

MINISTER **PATRICIA**
FRANCOURT

Be si zot tou zot ti'n *attend* mon krwar zot ti ava pli *informed*. Olye sorti pou dir keksoz ki pa – be nou pou mazin pou nou fer ankor. So letan nou envite nou envit zot tou pour zot

kapab vin ganny lenformasyon en pti pe plis konkret. So *definitely, sensitization* en program pou bezwen ganny – in ganny devlope pour nou kapab travay lo la.

Mon siport bann Speakers' ki'n dir pou dir i annan – sa *Bill* i annan en siport *merit of the Bill*. Nou pe moderniz en sistenm pou fer sir ki i *fair e impartial*, parey nou dir, pour nou kapab *improve* en pti pe bann determinasyon lo bann endividi pour *invalidity and disability*.

So, bann pwen pertinan ki mon'n adrese Mr Speaker, i bann ki'n *come up* ki mon *feel* i direkteman lye avek sa *Bill*. E parey mon dir, letan nou ava al dan *Committee Stage PS Valentin* i a pran tou bann bout medikal.

To conclude Mr Speaker, sa *Bill* i en *Bill* ki mon konnen i pou anmenn bokou *efficiency* parey nou dir. Tou sa bann dimoun lo sa *Board* i bann profesyonnel ki pou annan bann leksperyans ki vreman *vast*.

E zot konpran bann bezwen *of* bann endividuel ki pou vin bann aplikasyon kot zot. I en *Board* ki byen ganny *trained* e zot konpran mannyer bann *assessment* ek bann

determinasyon i ganny fer parey en *Board* i sipoze konnen.

E si zot refer lo sa *Bill* lo seksyon 10, i byen detaye. Mon pa pou al ladan aköz i byen detaye. I donn ou *step by step* kisisa ki zot regarde *in terms of the assessment*.

Tou bann Seksyon i vreman kler e konsiderasyon in ganny *taken* avek bokou – avek lenportans. Be osi avek bokou *care*, parey nou dir.

I en *Bill* ki pou annan bann koerans, parey nou dir. I pou annan *consistency*. E nou konnen poudir en keksoz ki annan *consistency* e i kler, i pou annan bann *benefits* bokou pli efektiv.

Again Mr Speaker, zis pour mwan dan mon konklizyon. Sa tranzisyon, nou bezwen fer sir poudir sa tranzisyon napa okenn *gap*. I bezwen annan kontinite.

Seychelles Pension Fund avek Minister Lasante pou fer bann *joint decisions in regards to the new Law*. I en koze ansanm.

Sa Gouvernman i travay dan en fason *coherent*. Dan en fason sistematik, parey nou dir. E nou pe plan *ahead*. Nou pa zis regard ozordi. Apre 1 an, 2 an, 3 an. Nou pe get lwen devan nou e ki mannyer keksoz i devret marse. E sa i anmenn

nou bann *outcome* bokou pli pozitiv, parey nou dir.

Mr Speaker, mon le osi fer resorti poudir *World Bank* avek tou son bann rekomandasyon pour sa bann *social reforms* i apresye, e i *congratulate* nou ki nou *on track*. Napa naryen ki nou pa fer *in terms of* son *targets* ki i *set* pour nou. *To the point* ki zot servi nou konman en bon legzanp letan zot al deor dan bann leres pei. *So it's very good* sa ki nou pe fer e nou pe fer li byen dan en fason profesyonnel.

I annan bokou sa bann rekomandasyon lontan i la. Me selman in ganny *park somewhere*. Petet bann desizyon difisil pour *previous* administrasyon pran.

Me *definitely* sa Gouvernman pa per bann desizyon ki *tough* e difisil. So nou fer sir poudir nou annan sa kouraz pour nou kapab enplimant bann keksoz ki benefis pei.

Alor Mr Speaker, mon refer resorti ankor. *ASP*, zis en lenformasyon, i travay dan en fason transparan. Nou'n fek prezant nou bann *statistics* avek *Cabinet*. Nou'n menm donn *press conference* lo la. Nou'n menm met lo nou *website*.

So si zot le konn *anything to do with ASP* ki bann keksoz *factual*. Al lo nou *website* zot ava war lenformasyon ki konkret. Nou napa naryen pour nou kasyet. E nou pe travay dan en fason vreman byen.

To conclude Mr Speaker, nou *feel* poudir sa *Bill is a very good Bill*. I pli fasil annan de fwa pour nou dir; wi, *it's a very good Bill* e *agree with it*. Olye al *round and round in circles* e dir bann keksoz annan de fwa ki *very detrimental* oubyen ki pa vre.

So, mon annan *whole confidence* ki sa *Bill* ozordi letan i ganny pase, i pou anmenn en gran diferans pour sa 2 group ki pli vilnerab dan nou pei. Mersi Mr Speaker.

(APPLAUSE)

MR SPEAKER

Mersi Minis. Avek sa nou'n konklir lo deba. E mon ava apel bann Manm pou vot lo *general merit the Bill* pour *Second Reading*.

Manm ki an faver lev lanmen silvouple? Mersi. Manm ki kont? Lo *general merit Functional Capacity Assessment Board Bill, 2024* – 19 Manm in vot pour, 0 kont e 8 in *abstain*. *Bill* in aprouve lo *general merit* par Lasanble. E

Madam Clerk a fer *Second Reading*.

MADAM CLERK

Mersi Mr Speaker.

A Bill for an Act to establish a Functional Capacity Assessment Board to assess the functional capacity of a person in order to determine whether that person is eligible for invalidity or disability benefits under the Social Security Act and the Seychelles Pension Fund Act, and to provide for other connected or incidental matters. Mersi Mr Speaker.

MR SPEAKER

Mersi. Bon, nou a termin la pour ozordi. Mon remersye bann zofisye avek Minis pour zot partisipasyon. E bann Manm pour zot deba. Nou a pran *Committee Stage* demen matin 9 er. Lasanble a *adjourn*.

(ADJOURNMENT)

.